

KUTEETA BWÀ KWENZELA

NZAMBÌ MUDIMU KACIYI

DISWA DYÀ NZAMBÌ



Bambi naanyi, ne nwênù balunda baanyi badi aku abu, ndi ngamba ne ndyèsè bwa kwikala kaaba aka mu dinda emu. Edi dileejjibwa bu nanku, mona's, ncyèna mumanye ne mmunyi mûngiikalàku ne nsòmbelu wa ufika pa cyòci aci.

² Kadi basòmbe anu mwaba wawa munkaci mwa kuyiikila, Mwaneetu Nolan, ncyèna ngeela meeji ne nkaadiku mutuutakeene ne muntu anu menemene (Twètù bònsò tudi benjiibwe mu misheete ya madyoto mishiilangane, kadi kùdì Nzambi anu umwèumwè awu.) bu mudi Mwaneetu Jack Moore, um-hum, ee, cya bushuwa ne yèyè udi...Mwaneetu Nolan uvwa anu wamba ne: “Kacya ngíkala nende mwaba ewu...” (yèyè awu mmuku wende), kadi mushindu mwine uvwaye muyiile mwa kumunanga ne kuneemeka lungenyi lwende ne bikwabo's we. Nenku aci, mèmè ndi mwa kutwa “amen” ku cyòci aci. Bintu bilenga byàbùngì...bikondo bya dicyonkomoka bitudi bapicishile pamwe, mèmè ne yèyè, ne Mwaneetu Brown, Mwaneetu Boutliere mwab'ewu. Balume balenga baa Nzambi bândi munange bulelela ne mwoyi wanyi wònsò.

³ Ne pashiishe ndi—ndi mmona ne twètù bònsò katwena twenda tushaala bânà to, ee, ndi ngeela anu meeji ku cikondo mpindyewu pandi ntangila mutudi tushintulukka kubangila kukaadi bidimu bitwe ku makumi abidi patuvwa twenda tukosolola mu bipeela, ne bikwabo pamwe bu nsongaalume ya bitende. Kadi biikale bamanye ne kudi Buloba mutwikala katuyi mwa kukulakajaku to. Netukatwilanganemu cyakabidi dîngà dituku.

⁴ Makeelela diloolo pâmvwà nguumuka ku tabernacle, kuvwa inàbànzà mutekete mulaadika paanyima pààpa pa kalaalu kaa dibunya, nenku ki yèyè kwamba ne: “Mwaneetu Branham, kukaadi bidimu...” Ngeela meeji ne yèyè uvwa mutekete luse. Kwambaye ne: “Wèwè wákangambila...” Nyewu ngápù mwoyi mpindyewu diyi dyàkangambilà mukaji awu, cintu kampanda bu eci, ndi ntekemena ne ncyèna ncyambulula bibi to. Yèyè kwamba ne: “Ne dîsaamà dîmvwà naadi edi divwa mbwa kiipacila kampanda,” anyi cintu kampanda, bwa ne yèyè uvwa mwa kupeta mwànà. Kadi kavwa mufwanyine kuumvwa

mushindu kaayi uvwa cyôci aci mwa kwenzeka cibi yêye mwikale mu mushindu awu to.

⁵ Mwaba awu kuvwa kwimane nsongaalume wa citende, wa citende ne mulenga kwisù, kwambaye ne: “Mémè ki mwine mwânà wâkapetayè awu.” Yêye ne: “Mémè ki mwine mwânà wâkapetayè awu.”

⁶ Nenku bintu byàbûngì menemene mbyenzeke mu lwendu elu, katwena nansha ne dîbà mwaba ewu dya kubilonda to. Netùkabyàkwîle dyamwamwa.

⁷ Nenku dyâpà dya Beena Kantu-ku-byanza edi, mémè nci tu wa mu bulongolodi kampanda nansha bumwe to, ngeela meeji ne mmunudi nwênù bônso bamanye, kadi ndi. . . Aka ki kasumbu kamwepele kândiku mémè muswikakane naaku, kântù mupetele karta kaa buumambala, kadi. . . Bôbò kabàtu bàsungulujangana bilondeshile mangumba to, kadi anu kaa beena kantu-ku-byanza. Bôbò batu cintu cinene cya mushinga kûndi mémè ne mushindu wa mudimu wa bwambi utu Mukalenge wetu ne Taatù wetu mumpeeshe. Cidi. . . kacivwa menemene bwa ne nci tu munange bulongolodi to; cidi anu mmudimu wa bwambi udi mumpeebwe, nenku mémè nciyi ne lulamatu ku dibiikila adi to, dîbà adi nêngûikalè muntu mubule lulamatu kudi Nzambi.

⁸ Nenku, ndi munkaci mwa kwela meeji, kumpala kwa mémè kuumuka ku Tucson, pàmwâpa bààbûngì baa kunudi bavwapu, dituku dikwabo mwua nsanganyiibwa, mu Los Angeles mwikale nyiisha mu dyâpà adi. Nenku kuvwa. . . Mwua mfuma ku dyamba bulongolodi pàmwâpa mêyi mashile ndambu—ndambu. Mémè—mémè ncivwa ne meeji a kwikala mushindu awu to. Wêwè ne meeji awu bwa kwikala ne lwonji, pa dîbà adi's mwua mufwanyine kwikala mwena lubombo. Kî mbîmpè wêwè kwenza nanku to, to, aci's cidi anu kukisa kwa muntu. Kadi mwua mwakule pa mucu wûmvwà mumone mu lupangu lwa Mwaneetu Sharrit. Úvwa mukwame bimuma mishindu mishiilangane mitwe ku itaanu. Kî mémè kwamba ne: “Kacya bandela nci tuku mwanji kumona mucu wa mushindu wawa to.” Úvwa. . . úvwa mukwame bimuma bya mbòmà, mukwame madimà a mpusu, mukwame tundeleyenya, oranges ya mitwile mbidi, oranges, byônso bikwame ku mucu umwepele awu. “Ee,” mûngààkambà, “ncyà bushuwa ne ncyèna—ncyèna ngumvwaku aci to. Wawa mmuci wa mushindu kaayi?”

“S'mmuci wa orange.”

Ki mémè ne: “Ee, kadi bimuma bya mbòmà byabya?”

Yêye ne: “Eyowa's.”

Mémè—mémè ne: “Mbyenzeke nanku munyi's?”

Yêye ne: “Abi's mbisomeka.”

Ki mémè ne: “Kaa, ngûmvù.”

9 Yèyè ne: “Byònsò abi mbya famiye wa madimà, ne mucu kana wònsò wa famiye wa madimà udi . . . udi mwa kusomekiibwaku.”

10 Mêmè kwamba ne: “Ngũmvù.” Pashiishe mêmè kubanga kwela mbila ndambu, nudi bamanye’s, bwalu mêmè ntu ne dibinduluka ne disaluka.

11 Pa nanku, yèyè ne: “Mbwalu kaayi abu?”

12 Ki mêmè kwamba ne: “Ee, mvwa ngeela anu meeji cyanaana ku cintu kampanda.” Ki mêmè ne: “Mpindyewu ndi muswe nkweleku lukonko.” Mêmè ne: “Mpindyewu, cidimu cidi cilonda peela bilongò, kakwakwikala oranges, oranges ya mitwile mbidi, bimuma bya mbòmà, madimà a mpusu to; nekwikale kwònsò anu oranges bwalu mmuci wa oranges, kí mmwômò anyi?”

13 Yèyè ne: “To, to. To, ditamba ne ditamba didi dikwama anu byadi bimuma.”

14 Mêmè kwamba ne: “Ngũmvù.”

15 Pa nanku aci cicivwa anu cyumvwika cîmpè cya menemene’s, bwalu mêmè ntu . . . nudi bamanye ne mêmè ntu ne . . . ncyà bushuwa ne mêmè ntu mupete dipolome dya ku Hartford ne a ku bilongelu bikwabo byònsò bitumbuke ebi, nudi bamanye’s. Pa nanku—pa nanku mêmè ntu . . . ntu ntangila *bufuki*, ki cilongelu citumbuke cya citambe bwîmpè cînkaadiku mêmè mupete bwa too ne mpindyewu, cilongelu citumbuke cya Mufuki. Pa nanku pântù ntangila aci, ntu mpeta mayiisha aanyi ku mushindu wûntù mmona bufuki bukwata mudimu awu.

16 Ki mêmè ne: “Ee, aci cidi cyenza anu ne ndyūmvwèku bîmpè bya menemene’s.”

17 Yèyè ne: “Mbwalu kaayi abu?”

18 Mêmè ne: “Mvwa mwele anu meeji ku cintu kampanda.”

19 Pa nanku, dituku adi, mvwa nyiisha pa cyôci aci. Ki mêmè kwamba ne: “Mpindyewu, nudi numona’s, pavwa ekeleeziya ucibangilaku, ùvwa . . . Yesu wakamba . . .” Mvwa nyiisha pa Yone 15. “Mêmè ndi Mwonji wa mvinyo, nwênù nudi matamba. Nenku ditamba dyònsò didi kadiyi dikwama mamuma adi nedikoshiibwe, dyoshiibwe.”

20 Ki muntu kampanda kwenzaye bu wannyenguvulu nshingu pa ciine aci, kwambaye ne: “Udi umona’s, paanyi’s mvwa ndyambidila ne padi anu muntu ne wamanyi kuujiibwa tente ne Nyuma Mwîmpè ne kusungidiibwa bulelela, mùdi mwambe, ‘kí mmufwanyineku kukuumuka to.’”

21 “S’ncyà bushuwa.”

22 Yèyè ne: “Kadi bishi bwa *aci*?”

23 Mêmè ne: “Mpindyewu ukaadi wakwila pa cyena bwalu cishiilangane. Yèyè udi wakula pa bidi bitangila dikwama dya mamuma mwaba awu, kí m’Mwonji wa mvinyo to; Yèyè udi wakula pa bidi bitangila dikwama dya mamuma, kadi kí mbwa

Mwoyi to. Yèyè mmwambe ne: ‘Ee, tapa anu mucu awu bwa kukolawu, ukwame mamuma.’”

24 Yèyè kwamba . . .

25 Ki mèmè kwamba ne: “Mpindyewu, udi umona’s, mucu ewu, paakabangawu, bavwa bônso beena Kilisto bashuwashuwale, baa mu Bible. Pashiishe kulwaku ditamba dyakabiikilabo ne ndya ba-Luthériens, ba-Méthodistes, ba-Baptistes, ba-Presbytériens: madimà a mpusu ne bikwabo byônso.” Ki mèmè kwamba ne: “Udi umona’s, dyôdi adi didi ditancila anu ku dîna dya bwena Kilisto, kadi diikale . . . Didi ne mwoyi ku Mucu awu, kadi diikale dikwama mamuma aadi dyôdi diine a mushindu wa cyena mangumba. Wamonu anyi? Kadi” mèmè ne, “mucu wa orange awu wôwò anu mudidinge mupatule ditamba dikwabo dya ku wôwò mwine, nedikwame oranges anu mwakakwamawu ku cibangidilu amu.”

26 Kwenzekabi ne, nyawu kuvwa kusòmbè mwaba awu, mfumu kampana wa munene . . . bumwe bwa ku malongolodi etu adi matambe bunene a cyena Mpenta awu. Ncyèna mumanye ne ndi mwa kucyamba bishi bwa muntu ne muntu kuumvwaye ne kî mmwenenu wùntù nende wa—wa mèmè kwikala—mèmè kwikala mbengangana ne bânà beetu baa balume, bânà beetu baa bakaji abu nansha; aci ncyà mafi. Mèmè batu bangumvwa bibi bikole, kadi ncyèna mumanye ne mbwa cinyi to. Nwamonu anyi? Bantu batu beela meeji ne mèmè nciu nansha ngiitabuja ne bantu badi ne cya kuya mu ekeleeziya to. Aci’s cidi mu ntanta wa kilomeeta mùlyô mujima ne Bulelela. “Tudi ne cya kwikala tudisangisha, ne ciine aci misangu yàbûngi bu mutudi tumona dituku dyenda diseemena.” Nwamonu anyi? Tudi ne cya kwikala tudisangisha mu bwobumwe. Tudi bafwanyine kwikala katuyi . . .

27 Bu ne mvwa musòmbèle mu cimenga kampana mudibo kabayi ne cintu nansha cimwe to anu . . . ee, ekeleeziya kampana (Ncyèna muswe kuteela dîna kampana to), kadi anu ekeleeziya kana yônso ewu, bôbô biikale biitabuja cintu anu cimwepele ne, Yesu n’Nzambi, bikwabo byônso biikale bya mashimi, mèmè ndi mufwanyine kuya mu ekeleeziya awu. Pândi nciyi mwa kupeta mulungu mujima wa dyâmpà, nê—nêngàngatè kapesè. Nwamonu anyi? Nénye kateeleja, kakuukwila Mukalenge, ne kuMuleeja mûndi ngenza wanyi paanyi mudimu. Ndi muswe bwa Yèyè amanye ne ndi ne mwoyi. Ndi—ndi . . . muswe bwa bantu bônso bamanye ne ndi ku luseke kaayi. Ndi ndisangisha ne beena Kilisto, ne kwôkò aku nkuukwila ne—ne nkwačilaku Mukalenge mudimu.

28 Kadi bwalu’s mbukole be, mèmè . . . bivwa bintacisha bibi be, ki pasiishe mèmè kulwa kujandula ne nansha Mukalenge wetu bavwa anu baMuumvwa bibi mu maalu àbûngi be. Yèyè uvwa mufwanyine kwamba cintu kampana, kadi bôbô

bafwanyine . . . baMuumvwa bibi. Ndi ngeela meeji ne bidi bikengela bwa kwikalabi anu mushindu awu. Kadi aba badi ne lungenyi nebiikale mwa kuumvwa. Nwamonu anyi? Ki cidi Bible mwambe. Bôbò abu nebàCyūmvwè.

²⁹ Pa nanku mu dinda emu pâmvwà ngamba cyôci eci . . . Ki mêmè kwamba ne: “Mpindyewu, badi—badi ne mwoyi ku dîna dya bwena Kilisto, kadi biikale bakwama mamuma a mushindu wa mashimi. Cidi ne mamuma a cyena mangumba. Balongolola cintu, kadi kwikala ne mwoyi ku cyôci, ne biikale ne mwoyi ku Mwoyi mwine.”

³⁰ Ki cîmvwà nteeta kwamba makeelela diloolo awu ne, nyuma awu udi mwa kwikala mubatiijiibwe mu Nyuma awu kadi kayi anu mwena Kilisto to. Nwamonu anyi? Wêwè udi ne mwoyi anu ku Mwoyi umweumwe awu, kadi mamuma audi ukwama ngadi amba cyûdi. Nwamonu anyi? S’ncyá bushuwa. Nwamonu anyi? Badi mwa kwenza bimanyînu byônsò abi, ne kusambidila babeedi, ne kwondopa babeedi, ne kutabeeja mêtù, ne kwipata baadémons, ne—ne kwenza bintu byônsò ebi, biikale ne mwoyi anu ku Mwoyi umweumwe udi mwômò amu awu, kadi ciikale anu didimà dya mpusu. Nwamonu anyi? Ncyá bushuwa. “Ku mamuma, nkunudi numanyikila,” mwakamba Yesu. Nenku dîbà adi tudi tusangana ne . . .

³¹ Nenku ndi mwenze anu nguumuka pa cibumba cya ku cyambilu anyi, mulombodi munene ewu ujuuka, wamba ne: “Kavwa ne meeji a kwamba aci to.” Yêyè ne, “Tudi bamanye ne twètù bônsò tudi basomekamù.” Ee, ncyá bushuwa ne tudi basomeka, basomeka ku cikuuku, aci ncyá bushuwa; kadi kî mmu Mwonji wa mvinyo to, mutudi basomeka. Ki pashiishe kwambaye . . . kubangaye bu—bu udi ungandamuna ndambu ne mêtýi a dipeetu’s.

³² Kadi kuvwa nsongaalume mukwabo mwaba awu, ngeela meeji ne ùvwa mmulumyana kampana uvwa umwe wa ku badi bende luumu baa mu sèndèmâ. Dîna dyende n’Danny Henry, ne yêyè uvwa nsongaalume wa ba-Baptistes. Ee, kulwaye pa cibumba cya ku cyambilu apu bwa kungeelaye citupà, kadi kwambaye ne: “Mwaneetu Branham, ndi ntekemena ne eci kacyna cimweneka cya cinyangakaja cijila to, kadi” yêyè ne “ndi ngeela meeji ne aci ncifwanyine kwikala bu nshapita wa 23 wa Bwakabuulwibwa.”

³³ Ki mêmè kwamba ne: “Twasakidila.”

³⁴ Ki kubangaye kwamba cintu kampana cikwabo kadi kubangaye kwakula mu myakulu, nsongaalume wa ba-Baptistes. Nenku mmwenze anu wakula, kuvwa mwaba awu muntu—muntu mukaji wa muneemu mu Louisiane emu, uvwa mwena France, mumweneke mukaji munene wa katanku nanku awu, kufundaye dyandamuna.

³⁵ Ee, pashiishe kuvwa mukwabo nsongaalume musòmbelwà apa mwikale mwena France, kufundaye cyakambaye aci. Kupalakajabo byakafundabo abi, ne byònsò bibidi bivwa bya mwomumwe.

³⁶ Ki pashiishe, nsongaalume munene wa nsuki mitookoloke uvwa mwimanyine paanyima lwà mundekeelu menemene, ku Cafétéria kaa Clifton, kulwaye wenda utwa ngendu. Yèyè ne: “Enzaayibi tũng mmone bidi bifunda abi. Ndi muswe bwa mmone ne bivwa mbinganyi.”

³⁷ Nenku busatu bwabo bònsò bavwa bamba cintu cya mwomumwe pa bivwa bitangila dyandamuna adi. Yèyè awu uvwa mwandamunyi wa beena O.N.U., mwandamunyi wa mu Français. Nenku civwa cyamba nunku:

Bwalu udi musungule njila mubumbakane ne mubulakane ewu, njila mutambe kwikala mukole, udi mucyènzè ku disungula dyebe wèwè mwine. . .

Kadi ndipangadika kaayipu dya butumbi dyùdì mwangate's we, bwalu n'NJILA WANYI MÈMÈ.

Nwamonu anyi? Ki kwambaye. . .nenku kutungunukaye ne pashiishe kwambaye ne:

Eci mu cyòci ciine, ki cyafikisha ku dyenzeka, ne cyenza ne cifikisha, ku dyenzeka, bucimunyi bulenga bwa dikema mu Dinanga dya Nzambi.

³⁸ Nudi numona's, misangu yònsò, nansha mu Français, mwaku wa pa mwanda kumpala kwa mwambikila mwòmò amu mu—mu—mu dyandamuna adi. Pa nanku mu cyòci aci ncivwa mufwanyine kwamba. . .Mòsà, wàkenza disungula dyende, byakakengela bwa kwenzaye disungula dyende adi. Bidi bikengela bwa twètù bònsò kwenza masungula etu ne kwenza ne mwetu mwònsò mutudi mwa kwenza amu. Ne Nzambi. . .Mèmè ntu nmemeka mukenji wa muntu kana yònsò udiye mupeeshibwe pa bidi bitangila Nzambi. Ntu. . .nansha wòwò awu mwikale wa bishi, mèmè ndi nguneemeka ne mwoyi wanyi wònsò.

³⁹ Mpindyewu, ndi mmona mwaneetu wa balumè kampanda wa citende mulwe kukaadi mutanci, Mwaneetu Stringer, ngeela meeji wa ku Louisiane. . .anyi ku Mississippi, mututwadile ndambu wa fòtò kaaba aka yinwätùmònu tubandila ayi. Yivwa ya Mwanjelo wa Mukalenge, paakamwenekaYe. Mbanganyi bakaadiku bumvwe balonda bwalu abu? Ngeela meeji ne muntu yònsò wa kunudi kaaba aka ukaadiku mucyũmvwè. Nukaadi bacipete pa mukaba wa mèyì, ne bikwabo.

⁴⁰ Mpindyewu, bavwa bacingambile mu dinda kampanda pa dībà dikumi, mèmè mwimane mu cibambalu cyanyi mu Indiana. Kungambilabo ne mwawa mwa kusanganyiibwa mu Tucson, ne neciikale dinda bwebwebwe, ne nèngùikalè munkaci mwa

kudituula mpoopu (citudi tubiikila kwòkò aku ne, mpotaya-mbwa aci) ku mukolo wa mupanu wanyi. Ki Banjelo mwandamutekete kulwabo ne kwenzabo dikubakuba, ne buloba kwenzabu dikubakuba ne bikwabo byònsò, bwa... mbwebwe kubunguluka yumukila ku mikuna, ne Banjelo mwandamutekete kwimanabo mwab'awu.

41 Ki mèmè kwamba ne: "Ee. . ." Mèmè kwambila mukajaanyi, ne yèyè mwine udi kaaba kampanda mwab'ewu mu dinda emu: "Longolola bintu byònsò bwalu kakwenaku mushindu wa muntu nansha umwe kupandukaye ku cyòci aci to," mèmè ne, "pangapatuku mu cyòci aci. Nyaaya ku Tucson, mudimu wanyi wajiki pa buloba apa. Nkaadi ngaalukila Kwetu bwa kuya kashaala ne Mukalenge Yesu."

42 "Ee," mwakambaye ne, "udi mutwishibwe anyi?"

43 Mèmè ne: "Eyowa. Eyo, muntu nansha umwe kènàku mufwanyine—kènàku mufwanyine kutwala cyòci aci nansha. Kakwenaku mushindu wa kucitwala to."

44 Mvwa mfuma ku diyiisha *Bikondo Mwandamutekètè Byà Èkèleeziyà*. Pòpò apu ki pàmvwà mubiikile mwaneetu wa balume wa bukitu awu, Mwaneetu Jack Moore bwa kumwela lukonko pa ciine eci, Yesu, mu Bwakabuulwibwa 1, mwimane mwaba awu ne nsuki mitooke ne byònsò.

45 Mèmè kwamba ne: "Yèyè uvwa Nsongaalume." Nenku kwòkò aku nkwakalwa dibuulula dya ne civwa nkafulu kaa nsuki kavwala, ne kavwa n'Yèyè to; Yèyè mmwashiibwe kafulu kaa nsuki (kadi mèmè nciyi mwa kucyumvwaku to), ciikale Bunzambi bwa Kumutu kwa bònsò. Nenku banzuji baa kale bavwa bàkàvwàla mu Izaleela, bivwa bikengela bwa kwikalabo ne nsuki mitooke. Nenku butooke abu budi buleeja bukezuke. Ne banzuji baa mu Angleterre too ne leelu ewu, mu tubadi tutumbuke twa Angleterre, batu bavwala kafulu kaa nsuki mitooke patubo bamweneka, bwalu kakwena mukenji mukwabo kumutu kwa wabo bòbò awu pa buloba ebu to. Nwamonu anyi? Nenku bòbò ki banzuji baa kumutu kwa bònsò.

46 Nenku ndi mvuluka ne mvwa muye ku Arizona kwaka ne bikwabo byònsò, ntu ngenza ne mwanyi mwònsò bwa... Mufwanyine kufwa bwa bwòwà. Mèmè kuya ku disangisha dya mu Phoenix. Nenku nuvuluke ne, ngákayiisha diyiisha edi ne, *Bakalenge, Tukàadi Dìbà Kaayi?* Nudi nuvuluka aci anyi? Mèmè kwamba ne mvwa mumone cyòci aci, mèmè kwamba ne: "Kumpala kwa kwenzekaci, vulukaayi, EMU MMUDI MUKALENGE WAMBA: 'Cintu kampanda neciikale mwa kwenzeka.'" Pàmwàpa nudi ne mikaba ya mèyi mu nzubu wenu wa disombeshilangana mikaba ya mèyi amu mpindyewu. Nenku mwòmò amu mèmè kwamba ne: "Vulukaayi mpindyewu bikeena-kumona bitu kabiyi bipangila abi. 'Cintu kampanda neciikale mwa kwenzeka.' Vulukaayi!"

47 Ki ndambu wa matuku paanyima paa cyôci aci, mvwa ngumvwa dibinduluka, ki mêmè kudyambidila ne: “Ncinyi eci? Nêngiikalè mwa kufwa anyi? Piikalabi. . . Ndi ntekemena bwa byenzekeku ne lukasa lwônsò bwa mmoneku mwa kupatuka mu cyôci. Ncyèna muswe kunengakanamu to.”

48 Ki dinda kampanda Mukalenge kwambaye ne: “Bànda ku lusongo lwa mukuna wa Sabino Canyon.”

49 Nenku mvwa nsanganyiibwa kuulu aku mwele byanza muulu, nsambila. Mêmè kuumvwa cintu kampanda cidikuma mu cyanza cyanyi. Civwa mmwele wa mvita. Mpindyewu, udi anu mwa kudifwanyikijila mùdi mufwanyine kudyumvwa’s, mwimane kuntwaku nkaayeebe kadi ki keele aka mu cyanza cyebe amu kiikale *mona* bule. Mêmè kuwupwekesha e kuwutangila. Ûvwa anu nkeele keetu aka, kamwe kaa ku twabwina. . . wa bwalu mêmè ntu ne bwôwà bwa keele, nansha bishi. Nenku ùvwa ne—ùvwa ne—ne cyamu, cintu kampanda bu kamwe kaa ku twele etu, cyenze bu cyamu cya cyesu anyi cintu kampanda, mutwe ngwengwengwe ne mubumbakane. Ûvwa ne cikubi ku nyungulukilu kwawu *eku*, kùvwà balwanganyi baa mvita baa babidi babidi abu biikale naaci, bwa kudikuba bwa kabàlu kuditapa ku byanza, ne—ne mwikale ne masanga ku cilabi eku. Ûvwa mukumbanangane mu cyanza cyanyi anu menemene. Ee, mêmè kudikupula kwisù ne kutangila paanyima.

Anu pa mwine mwaba umweumwe awu, dituku dikwabo, mvwa mumone kankuci kakese katooke, kiikilepù. Nènnùlondèlè abu bwalu pashiishe.

50 Nenku mvwa mukwate cyôci aci mu cyanza, ndyambidila ne: “S’mbwalu bwa dikema’s. Mpindyewu, Mukalenge, ndi. . . ndi njimija lungenyi anyi? Kakwena muntu nansha umwe kaaba aka to. Ndi nsanganyiibwa mu ntanta wa kilomeeta ne kilomeeta ne muntu kana yônsò kadi mona ne mwele wa mvita ngwôwò ewu. Mvwa mwele cyanza muulu, kadi wôwò ewu kwăfùminiyiwù nkwèpi?” Ki mêmè kudyambidila ne: “S’ncintu cidi citamba kukemesha’s. Mpindyewu tangilaaku mwab’ewu, s’mmwele wa mvita.” Nwamonu’s, mudikùmemù, ne ùvwa mmwele wa mvita’s. Ki mêmè kwamba ne: “Mwab’ewu kapeenaku muntu nansha umwe mwimanepu to. Nyewu nsanganyiibwa kuulu kwa mbwebwe eyi, mubànde ku lusongo menemene lwa mukuna.” Bya bwalu kuyi mwa kumwenaku Tucson pa mwine mwab’awu to, ùvwa kule menemene mwinshi.

51 Mêmè kudyambidila ne: “Mpindyewu, aci’s ncintu cya dikema’s. Mpindyewu, cidi ne cya kwikala mu nyungulukilu emu mu mwaba kampanda, Kampanda wa mufwanyine kufuka ne kwenza mwele wa mvita ne kuwunteeka mu cyanza.” Mêmè kwamba ne: “Ncifwanyine kwikala anu Nzambi mwine wâkafùkila Abraham cimpanga cya mukooko, uvwa mwa kufuka nshindi ayi awu,” yinuvwa bumvwe bwalu bwayi ayi. Ki mêmè

kwamba ne: “S’ki cyamu ncyôci eci, byamu bya mishindu isatu mishiilangane biikalemu, ne ndi muwukwate mu cyanza anu menemene mudi cintu cikwabo kana cyônsò cîndi mufwanyine kukwata mu cyanza eci.”

⁵² Ki mêmè kuumvwa Dîyì, dyamba ne: “Aci m’Mwele wa mvita wa Mfumu awu!”

⁵³ Ki mêmè kudyambidila ne: “Mpindyewu, Aci cyâfùminyi kwèpi? Civwa anu muntu mwamwa mu mbwebwe yaya mwaba kampanda’s.” Ne mêmè mvwa kacya ngukwata mu cyanza mushindu ewu, ki mêmè kwamba ne: “Mwele wa mvita wa mfumu kampanda.” Kadi dya nkenzakana anyi, mwele wa mvita awu bu muye muulu bu muye panshi. Ki mêmè kwamba ne: “Mwele wa mvita wa mfumu kampanda.” Awu’s mbwa . . . batu bavwijangana mulwanganyi wa mvita wa pa kabalu ne—ne mwele wa mvita, ngeela meeji ne aci ncyà bushuwa, mu busalaayi anyi mu mushindu kampanda, batu bavwijangana naawu mulwanganyi wa mvita wa pa kabalu, nudi bamanye’s. Ki mêmè kwamba ne: “Ee, pâmwâpa civwa mbwa cyôci aci’s. Cidi pâmwâpa cyumvwija ne bidi bikengela bwa mêmè kutentekela bambi byanza, anyi cintu cya mushindu awu, bwa ne, bwa kubavwija bambi.” Nenku pa dîbâ adi mêmè . . .

⁵⁴ Dîyì kwandamunadi, dyamba ne: “Mwele wa mvita wa Mfumu awu!” Kaciyi mfumu kampanda to; Mwele wa mvita wa Mfumu awu! Nwamonu anyi?

⁵⁵ Mêmè kudyambidila ne: “Mpindyewu, anyi ndi mupatuke mu mêmè, lungenyi lunjimine, anyi kudi cintu kampanda munkaci mwa kwenzeka, kudi muntu kampanda mwimane mwab’ewu ku luseke lwanyi eku.”

⁵⁶ Nenku bânâ beetu, bintu ebi’s mbilelela. Ncyêna—ncyêna mumanye mushindu mwine wa kunwambila to, nwênù’s nukaadi misangu yônsò babimonemone byenzeke misangu yônsò mushindu awu. Nenku cidi . . . Ncivwa mufwanyine kucyumvwaku to. Pa nanku . . . Ndidyumvwa ditambe kwikala dya pabwadi.

⁵⁷ Ki mêmè kwimana mwaba awu. Mêmè kudyambidila ne: “Mpindyewu, Yèyè mene utu mwakulaakule naanyi mu nsòmbelu wanyi mujima, kacya pâncìvwâ mwânâ wa balume mukese, mukese menemene awu, mmwimane kaab’aka mene, kadi mêmè nciyiku mwa kuMumona to nansha kakese.” Mêmè kwamba ne: “Mwele wa mvita wa Mfumu awu?” Awu’s mmufwanyine kwikala . . . Nzambi ngudi Mfumu awu. “Kadi mwele wa mvita ewu ncinyi?”

⁵⁸ “Dîyì, n’Diteekiibwe mu cyanza cyebe wêwè.” Dyôdi ne: “Kuciinyi ne ndufu to, mmudimu webe wa bwambi.”

⁵⁹ Kaa, ekelekele! Mêmè kutuuluka ku mukuna awu e kuya, ngenda ndila mwadi, ngeela mbila mikole, ya yipanda mutu, ngenda ntupikila pamutu paa mbwebwe. Mêmè kupweka

kuya, kwambila mukajaanyi, kwamba ne: “Ncyakufwa to, wamonu’s, m—m—mmudimu wanyi wa bwambi,” (Mémè mvwa mumwambile bwa kulwaye ne Billy Paul apa, ne kwangata bânà. Mvwa mwambe ne: “Mpindyewu, ncyêna ne kantu to, kadi ekeleeziya neatangile bwalu bwenu bwa nwênù bônso kanulaadi ne nzala to ne bikwabo, nenku nên—nêntuutakeenè neenu dyamwamwa dya mukalu.”) Nenku—nenku yêyè. . . Mémè kwamba ne: “To, ncyakufwa to, ncintu kampanda cya citangila mudimu wanyi wa bwambi.”

⁶⁰ Ndambu wa matuku paanyima paa cyôci aci mvwa mpatuka mu disangisha kampanda; mvwa mupete mukenji wa ku nshinga wa mabeji asatu, mufumine lwà mu Houston emu, mu Texas. Nenku muntu uvwa mundyule bikole menemene diloolo divwa Mwanjelo wa Mukalenge mukwaciibwe fôtô adi awu, fôtô Wende wâkawkaciibwa mu Houston mwamwa awu, kumbiikilaye, kwambaye. . . mutume mukenji wa ku nshinga, mwakamba mukajende ne: “Ndi mumanye, Mwaneetu Branham, bwa ne wêwè udi ne mudimu. Mwanaanyi wa balume (mwânà wa balume wa mwanaabo ne Ted Kipperman wa bakaji) udi usanganyiibwa mu mulongo wa badi ne cya kufwa mu nkwaswa mutwa ku nzembu.” Yêyè ne. . . (Ambaayibi tũng bu ne ùvwa m’Billy Paul?) Yêyè ne: “Yêyè ne nsongaakaji mutekete kampanda badi ne cya kufwa.” Ne nwênù bônso nutu bacibale mu cibejibeji, mu bushuwa bwa bwalu. Ki yêyè ne: “Ditekemena dimwepele ditudiku twêtù naadi ndya wêwè kulwa kwenza disangisha ne kusangishaku bantu pamwe.”

⁶¹ Ne Raymond Hoekstra pende ukaavwa mumfundile misangu ne misangu, kadi nudi bamanye’s, nkaavwa mumane kulongolola bwa ne paanyima paa diine disangisha adi nye mu lwendu lwa ditwa buluwà ne Mukalenge Mc Anally ne bakwabo abu. Ki mémè kudyambidila ne: “Ee, mémè mudidinge anu mulekele bânà abu bafwa nciyi ndyenzejaku ne mwanyi mwônso to, ncyakupetaku kabidi mushindu wa kuya katwa buluwà to.”

⁶² Pa nanku mémè kwamba ne: “Mbîmpè, nêndwe.” Mémè kulwa ku Houston, kwenza disangisha adi, ne mu bushuwa bwa bwalu. . . kabaakabashipa to, bavwa anu. . . baakabapeesha cibawu cya buloko bwa kashidi. Nenku ki civwabo baswe bwa bôbô kwenza ncyôci aci, kubafundila buloko bwa kashidi. Pa nanku aci ncyá benzemu bidimu makumi abidi ne cimwe, ngeela meeji, mu—mu Texas.

⁶³ Pa nanku, ki mu dipingana, mémè kubànda ku mukuna aku kadi mémè kukuya ne Mwaneetu Fred Sothmann. Yêyè udi kaab’aka mu mwaba kampanda. Mwaneetu Fred, udi lwà penyi? Apa nunku. Mwaneetu Fred Sothmann, Mwaneetu Gene Norman; dîngà dituku, dituku diibîdi dituvwa basômbe kuntwaku, Mwanjelo wa Mukalenge kupweka buludi mu cituudilu mutuvwa tusanganyiibwa amu, ne kubanga kwamba pa bivwa bitangila bânà baabo balela ne maalu avwabo benza.

64 Mêmè kuumuka ne kwalukila pa kakuna. Nenku mêmè nkaavwa mumane kupeta wanyi ngulube wa diitu, kadi mvwa nteeta bwa kwenda kwipatangana ne mukwabo bwa kumusaka kùvwà Mwaneetu Fred. Pa nanku mêmè kujandula mwaba uvwayi yidiila ku luseke lwa kakuna aku, nenku mêmè kwamba ne: “Ee, mpindyewu, nênkwambilè cingênzà mêmè, Mwaneetu Fred.” Mêmè ne: “Mpindyewu, wêwè udi uyiila lwà pa kiine kaaba aku mu dinda.” Tutu tuyapu patu kwisù kutooka, ne tubànda mukuna awu. “Nenku ndaaku kuntwaku padi kwisù kutooka, mêmè nênyiilè ku luseke lukwabo alu. Mpindyewu, ncyakwasa mêmè ngulube to, kadi yôyi minyeemene lwà kuneeku, mêmè nêntuutè cingoma kumpala kwayi aku bwa kuyaaluja. Wêwè neusungule wa munene awu.”

65 “Mbîmpè,” mwakambaye.

66 Ki Mwaneetu Fred kuyaye kuntwaku. Kadi Mwaneetu Gene Norman (Ncyêna ngeela meeji ne Mwaneetu Gene mmulwe to, mmulwe anyi?), yêyè uvwa—yêyè uvwa usanganyiibwa ku luseke lukwabo. Bââbûngi baa kunudi mbamanye Gene Norman, mulunda wa katapula-kateeka wa bââbûngi, mwaneetu mulenga be. Kadi kupwekaye kwinshi ndambu. Kwine aku, yôyi ngulube ayi, kayivwaku mene diine dinda adi to. Nenku mvwa mwa kumona Mwaneetu Fred, mêmè kumukupa cyanza, mwikale usanganyiibwa mu ntanta bu wa kilomeeta mujima ne citupa nanku awu ne mwaba wûmvwà mêmè awu. Ee, mêmè kudyambidila ne: “Kudiyi mwa kwikala miye ki kwèpî’s?” Mêmè kupweka e kubwela mu mukidi munene, nenku mêmè kupwekamu, kudyambidila ne: “Nêntangilè bwa kumona mwaba udiyî yisanganyiibwa.” Mêmè kubanga dyalukila ngenda mbànda. Civwa mpaanyima ndambu paa kwisù kumane kutooka, dîbà dikaavwa anu dibange kwenda kupatuka.

67 Mêmè kunyunguluka cipongopongo cinene, kaa, ekelekele, cya nkama ne nkama ya makàsà, mwikale anu mbwebwe minene mu lupongo lunene alu, bimanu binene abi. Kadi kuulu kukaavwa bu kuvwa kwenda kushaala . . . dîbà dikaavwa dyenda dibànda’s, twipacila dîbà mwandamutekete, ngeela meeji, anyi cintu cya bu nanku awu. Nenku mêmè kusòmbela panshi ne mwikale nkenzakana, kwenzekabi ne mpwekeshe mèsù ku mukolo wa mupanu wanyi kadi ki lupota-lwa-mbwa ndwòlò alu’s, mpoopu awu. Ki mêmè kwamba ne: “Udi mumanye’s, aci’s cidî cimweka cya cikemesha. Udi mumanye’s, Mwanjelo wa Mukalenge mmungambile ne mvwa mwa kwikala mu ntanta wa kilomeeta mitwe ku makumi asambombo ne inaayi ne Tucson mu buludi bwa pankaci paa nord ne esete, mwikale ndituula lupota-lwa-mbwa ku mukolo wa mupanu.” Nudi nucivuluka anyi? Nudi nucivuluka anyi? Eyowa’s, mukalenge. Nwamonu anyi? Mêmè kwamba ne: “S’ncyà cikemesha’s.” Mvwa mulukwate ku cyanza.

68 Kadi ndi mwenze anu ntupula mèsù, mêmè kumona ngulube mitwe ku makumi abidi mu ntanta wa mètres matwe ku nkama inaayi ne makumi ataanu ne mwaba wûmvwà awu, yipatuka yenda yidya tubeji tukese twa difuke etu ne kusòmbayi. Mêmè kwamba ne: “Mpindyewu, bu mêmè anu mwa kufika ku dipeta Mwaneetu Fred ne kumwambila bwa kunyungulukilaye lwà pa mwaba wawa, yêyè’s neapetele wende ngulube anu mwine mwaba wawa. Kadi ndi mumanye ne yêyè udi usanganyibwa mu ntanta wa kilomeeta mujima ne citupa anyi isatu ne mwaba wûndi mêmè mpindyewu ewu. Pa nanku,” mêmè ne, “bu mêmè mwa kukosolwela pa lusongo lukese lwa kakuna elu mu mushindu wa yôyi kayiyi yimmonaku to, mbàndila lwà ku luseke lwa kaamuci kaa mupenga aka,” mêmè ne, “mêmè munyungulukile lwà ku elu luseke, nyewu kudi mupwa wa tushà mupwekele ku elu luseke, ndi mwa kukùbàndila lubilu ne kupatuka mu njila awu. Nenku nêndembelejè kaadibeji kakese kaa mukanda mwaba ewu mwaba wûndi mwa kumanyina kamwe kaa ku tujila twa dipatukila, mu lupongo alu, ndi mwa kufikisha Mwaneetu Fred kwaka anu pa dîbà.”

69 Mêmè kwimansha lupota-lwa-mbwa alu panshi, mupwe mwoyi Cyôci aci. Nenku mêmè kubanga dikosolwela pa kakuna apu anu bipeepele bya menemene ne kutangila paanyima, yôyi kayivwa mimmona to, nenku mêmè kupweka lubilu ne kufika mu mupwa wa tushà awu. Mvwa mwase cifulu cinene menemene cifiike. Mêmè kubanga ngenda mbànda lubilu nkosolwela mu lupongo alu ne lukasa lwônso, ki cintu aci kwenzeka’s.

70 Buloba bwônso kunyukushiibwabu, myaba yônso. Mbwebwe ya bunene *ebu* yituuka yimata panshi, lupwishi lubuuka mushindu *ewu*. Dyà ntangila anyi, kumpala kwanyi kuvwa kwimane Banjelo mwandamutekete; anu mushindu uvwabi menemene. Mêmè kudyumvwa bu ne mvwa mwimane muulu mushiye buloba panshi. Dyambedi, mêmè kwela meeji ne muntu uvwa mungaase cingoma, nudi bamanye’s, bu mûmvwà mwase cifulu cifiike aci; mmweka bu ngulube wa cisuku, nansha bishi, s’nudi bamanye ne yôyi yitu mifiike. Mêmè kwela meeji ne muntu uvwa mungaase cingoma, cya . . . cya pabwîpi menemene. Kadi mêmè—mêmè kumona pa dîbà adi ne civwa ncinyi. Ee, mbyenze anu . . . Mêmè kupeta mudimu muntuma naawu, mu Mufundu wa ne: “Bitampi Mwandamutekete bidî biikale maalû masokoka mwandamutekete awu.” Nwamonu anyi?

71 Muntu mukwabo wakangambila, ne: “Mpindyewu . . .” Kaa, wamba ne: “Ee, mpindyewu, dîngà dituku Mukalenge pâmwâpa (bu mùdî umona bikeena-kumona, Mwaneetu Branham) neakubuulwile cîdî bintu ebi, nenku tudi bônso mwa kuseemena menemene pabwîpi ne Nzambi ne kupeta bukole butambe butudi naabu mu dyakula dya mu myakulu ebu ne bikwabo.”

72 Mêmè ne: “Kabyena mwa kwikala mushindu awu to.”

⁷³ Bwalu, nudi numona's, ndi mèmè ngiitabuuja ne Dîyi didi Bulelela. Ne Bible mmwambe ne: "Ewu yònsò wadidinga kusakidila dîyi dimwepele anyi kuumushila Dîyi dimwepele ku Dyòdi adi awu." Bikengela ciikale mu Dîyi edi. Nwamonu anyi? Mmaalu masokoka atu bantu bapange kumona awu, bwalu anu mwômò amu mene ki mudi mulwe Diyiisha dyanyi dya *Dimiinu Dyà Nyòka* ne Diitabuuja dilelela dya dikuubiibwa dya mwena kwitabuuja adi.

⁷⁴ Ncyèna nkèèka bânà beetu ba-Presbytériens mwaba awu, ne bamwe baa ku nwènù bânà beetu ba-Baptistes pa mushindu unudi nwènù nwangata dikubiibwa awu to. Ncyèna ngamba eci bwa kwikala mupangakane to, kadi kanwena bacyàngàte mu cyòci menemene to. Nwamonu anyi? Ncyà bushuwa. Nwamonu anyi? Kadi, mvwaku anu paanyi mucyàngàte bibi, mèmè ewu. Kadi padi Mwanjelo ufumina mu Dyulu wimana ukwambila, ne ki cyòci ciine eci mu Mifundu, Aci's ncilelela. Nwamonu anyi? Ncyà bushuwa. Nwamonu's, Yèyè utu anu misangu yònsò wamba bikumbanangane ne Mifundu.

⁷⁵ Mwômò amu mèmè kucitangila too ne pàakabàndà cijengu aci muulu, kubangaci kubànda muulu lubilu, ne bôbò kwandamukabo bu kubènkè bwa kabuyi buumvwika to, bwenze bu difwima. Anu menemene mushindu... Mbanganyi bavwa bamone fôtô waCi wàkakwàtabò mu Houston awu? Pamwe ne bònsò's. Nwamonu anyi? Ee, mushindu awu menemene ki uvwa cyòci eci. Cyòci cyakandamuka ne kushaala cintu cimwecimwe aci, kutungunukaCi ne kwenda kubànda anu kubànda muulu.

⁷⁶ Mwawa ngenda nyeema anu kunyeema, nkeba bwa kupeta Mwaneetu Fred ne bakwabo abu. Paanyima paa mutanci, bu tusunsa makumi asatu nanku awu pashiishe, mèmè kupeta mushindu wa kumumwena pa bule kwinsi, ukupa byanza; ne Mwaneetu Gene wenda ulwa, mwikale ukupa byanza. Baakamanya ne cintu kampanda civwa cyenzeke. Ki pashiishe mèmè kupetangana naabo. Mwaneetu Fred nyèyè wawa musòmbè mwaba *wawa* mene.

⁷⁷ PavwaCi cyenda cibànda apu, mèmè ncivwa mumanye ne nzubu ya dijoojela ne bikwabo ayi, too ne mu Mexique, yivwa yikwata fôtô awu to. Cikandakanda cya *Life* ncimupatule pavwaCi cyenda cibànda apu. Ne bààbùngi baa kunudi... S'ki cikandakanda cya *Life* ncyòci eci cipatule fôtô waCi. Cintu cya kaciyi cyumvwika mwab'ewu, ne bôbò mbambe ne kí mbamanye ne ncifumine kwèpi to; cidi mu butumbuke bupitepite bule. Cidi cisanganyibwa kumutu kwa bipaapu ne bikwabo byònsò bwa kwikalaci... Cidi mu butumbuke bupite bule bwa kwikalaci difwima, bwalu cidi mu butumbuke bwa kilomeeta makumi anaayi ne mwandamukulu ne kilomeeta makumi anaayi ne isatu mu bucyama paanyima paa Cimane kufika muulu mu butumbuke abu. Kamwena nansha citaleela anyi cintu nansha cimwe muulu mwamwa to, nudi numona's.

⁷⁸ Kadi ki bôbò kwela meeji ku ndeke; pa nanku kuyabo kakenketa myaba yônsò, kakuvwa kubuuke ndeke nansha umwe diine dituku adi to. Nwamonu's, bikengela anu bakenkete, bwa dinyukushiibwa dya madidiishi ne bikwabo abi. "Kî nkubuuke ndeke to." S'ki cyôci eci mwab'ewu mu cikandakanda aci, nêcinwâmbilè cintu anu cimwecimwe aci. Nenku—nenku ki kwikalaci cyenda ciya anu kuya. Nenku leelu ewu anu mu. . .

⁷⁹ S'ki cyôci eci mu cikandakanda cya *Maalu À Mamanya*, mudici ne, kabeena mwa kuumvwaku to. Kî mbamanye ne Cidi ncinyi to.

⁸⁰ Tucson, ku cilongelu citumbuke, mulunda wanyi kampanda uvwa mukuye dituku dikwabo ne uvwa uyiikilangana naabo pa bwine bwalu abu. Bôbò kwamba ne: "Katwenaku mwa kuumvwa cidi. . ."

⁸¹ Mêmè kwamba ne: "Kwambi cintu nansha cimwe to, kabyakwikala ne dikwacisha nansha dimwe to. 'Kanwedi masanga enu panshi kumpala kwa ngulube to.'" Nwamonu anyi? Cidi mbwa Ekeleeziya, bwa Basungula, badi babiikidiibwe bwa kupatuka. Nwamonu anyi?

⁸² Nenku pathiishe muntu ne muntu uvwa ulwa, wamba ne: "Mwaneetu Branham, ndi mmona fôtô webe mwaba ewu. Ndi mmona *cikampanda*. Ndi. . ." Nwênù mbadi bamanye mudici. Kadi mulanjilanji muleemule awu—awu bu mudi mwaneetu ewu naawu mwaba ewu udici. . . Mfwilaayiku luse. Mushindu uvwa Ci cibange kwenda kubànda's ngwôwò ewu, cibànda muulu lubilu. Mu bushuwa bwa bwalu *eci* civwa ku luseke lwa dyabalume. Ne nwênù bônsò's nudi bavuluke ne ngâkamba ne: "Mwanjelo uvwa mutambe kwikala wa pa bwende awu ki uvwa wakula naanyi, uvwa ku luseke lwa dyabalume," nansha mene kumpala kwa kwenzekaci. Nudi bavuluke anyi? Mapwapwa ende avwa matuma paanyima mushindu *ewu*. Ki mapwapwa a Mwanjelo awu menemene pàakabândaci muulu apu. Nwamonu's, pavwaci. . . Pa nanku baakabanga kukwata maafôtô bwalu civwa citambe kwikala cya kaciyi cyumvwika to. Kadi fôtô wa ndekeelu, pàakaDyénzàCi mu mwenekelu awu mu maulu mwamwa ne bikwabo, nyôci eci mùdì cikandakanda cya *Look* mwab'ewu cicipatule. Nudi numona mushindu udici cibànda muulu anu menemene pa dîbà dyabangibo kucimona apu, nudi numona's. Nenku ki fôtô wa—wa mushinga ne wa ndekeelu nyêyè ulwâlwa awu, paaluci kwangata mbungakeenu awu.

⁸³ Kî mbamanye ne ncifume penyi ne nciye penyi to, kî mbanji kumanya to. Maalu a mamanya mmabwikidijibwe mukana anu bya menemene ebi pa bwalu abu, kabayi bamanye ne cidi cyenzeke ncinganyi to. Kadi twêtù tudi bamanye: "Nekwikale bimanyinu muulu mu maulu." Twêtù tudi bacimanye. Nwamonu anyi? Ne Yêyè ngwâkalaya bintu ebi. Nwamonu anyi? Ne

cintu cimwepele cidi cyenze ne cyôci eci bacitâbilè bwa kucikwatabo...

⁸⁴ Mpindyewu, ndi mumanye ne tudi anu twètù nkaayeetu kwetu kumbelu mwab'ewu mu dinda emu. Bu mèmè kacya mukokeku ntema yenu nwênù bânà beetu baa balume anyi bânà beetu baa bakaji kûndi mèmè bu cimanya-byônsò, swayi numfwileku luse. Ncyêna ne meeji a kwenzaku nanku to. Ndi mwimane... musômbe mwab'ewu mu dinda emu ngaakula kumpala kwa bantu badi bamanyi baa mabàla, bantu badi ne meeji matwe; mèmè—mèmè ndi muntu mupange mukanda, nciyi nansha mumanye kushindumuna Mifundu yanyi bîmpè to. Ndi ne nshapita wa kubala mu dinda emu, ndi...mvwa muswe kulomba umwe wa ku bânà beetu baa balume mwab'ewu bwa kuwumbadilaye, bwalu ncyêna nansha mumanye mwa kushindumuna mênà àdimu to, Kulondolola wa Kumpala 13, (pawikala mwa kwanyisha, Mwaneetu Jack, udi mwa kubanga kuwukeba), bwa cyena-bwalu cyanyi. Mèmè—mèmè ncyêna nansha mumanye mwa kushindumuna mênà awu to, ndi mmushiila yêyè bwa kucyenzaye, bwalu yêyè mmumanye mwa kuàshindumunaku.

⁸⁵ Kadi ndi mumanye ne ndi ngaakula ne bantu baa meeji matwe. Kadi, bânà beetu, bintu ebi mbyenjiibwe bwa ne kanwikadi nwâlwa kutangila ku dipanga dyanyi dya mukanda, kadi nwitabuuje ne ndi nzwambila Bulelela. Nzambi ngudi unzwambila Bulelela awu. M'Bulelela abu. Nwamonu anyi?

⁸⁶ Mpindyewu, pândi ngaakula bwa mangumba, ncyêna ne meeji a kwamba ne nwikale ne lwonji mu mushindu wa ne... To, ncyêna ne meeji a ne kanwikadi nuya mu ekeleeziya wenu to. Ikalaayi nuya mu ekeleeziya wenu, ki cinudi ne cya kwenza aci. Kadi kanuyi kashaala baa mu malongolodi awu to, bwalu dîngà dituku nênwâmbilè ne nêncijaadikè ku Mifundu ne, ncimanyinu cya nyama wa lwonji. Nenku vulukaayi anu ne, ncimanyinu aci.

⁸⁷ Ndi nyiisha...Ncyêna mufwanyine kuciyiisha mu ekeleeziya wa Mwaneetu Jack to, nansha mudîbi ne yêyè mmufwanyine kungambila ne: "Ciyiishe anu kuyiisha's"; kadi ndi nya ku tabernacle, neciikale bule bwa mēbà matwe ku anaayi. Nenku cyena-bwalu cyanyi cidi ne: "Nyama wa lwonji ku cibangidilu ne nyama wa lwonji ku ndekeelu, pa kwenda kulonda mupwa wa nyoka." Nwamonu anyi? Cidi cyangata mēbà matwe ku anaayi. Ndi ne Mifundu yanyi myadija yônsò. Nyama wa lwonji kuumukila anu ku cibangidilu, úvwa nyêyè nyama wa lwonji wa mu budimi bwa Edena awu, nyêyè nyama wa lwonji wa ku ndekeelu awu, ne nêndeejè ne yêyè awu mmuntu mutendeleedi ne dingumba kampanda (udi mwenze diine dingumba adi awu); ne kwenda kulonda buludi mupwa wende, ne kunujaadikilaci ku Mifundu ne nyêyè. Nciwva mumanye cyôci aci to anu too ne padi Nyuma Mwîmpè mulwe kucimpeesha dituku adi kuntu kwaka apu.

⁸⁸ Mpindyewu, mu cyôci eci, mvwa ntangila cyôci eci dituku dikwabo, mwimane, ne Cintu kampanda kungambila ne... pâmvwà nci tangila, ki mêmè kudyambidila.. Mwaneetu Hickerson, umwe wa ku balubuludi baanyi...anyi wa ku balami baa mu ekeleeziya ku Jeffersonville...Piikalabi ne nci tu ngi tabuuja diya dya mu ekeleeziya, mêmè ntu ngenza masangisha mu ekeleeziya bwa cinyi? Tudi baenzè mu ditunga dijima, biikale bàtèèlejila ku nshinga diloolo dikwabo adi, mu ntanta wa kilomeeta nkama isatu ne makumi abidi yônsò kuvudija ku nkama isatu ne makumi abidi muvwa umwe wa ku maeeleeziya aanyi mêmè.

⁸⁹ Mpindyewu, ewu—fôtô ewu, mvwa mwimane, mumutangileku, nenku Cintu kampanda...Mvwa mwimane mu cibambalu cyanyi. Cintu kampanda kwambaci ne: “Mukùdimwinè ku dyabalume.” Mêmè kuteeleja.

⁹⁰ Ndi mumanye ne aci cidi cimweka bu ne mmuntu kampanda udi ne mutu munyunguluke ndambu, kadi, nudi numona’s, bu mûmvwà mwambe diloolo dikwabo adi, bintu byônsò binene ebi mbitambe kwikala bya mamanya a mu tulaasa... Mpindyewu, mêmè ncyèna mbengangana ne aci to. Vulukaayi ne, bikengela twikale tutuma bânà beenu balela mu tulaasa bwa balongeshiibwe ne bikwabo, kadi nênwâmbilè anu patudi twakulangana apa ne, kacyakwikala ne dikwacisha kudibo mu buloba buciwawwa to, bwalu nemwikale dishidimuka dikwabo, ditambidile kudi edi nunku kule ne kule. Dyôdi dishidimuka adi kadyakwikalaku ne... Kamwakwikala tulaasa to, kamwakwikala lufu to, kamwakwikala mpekaatu to. Mu edi dyôdi mudi byônsò abi; nansha twètù balwe bashidimuke mushindu kaayi, mudi lufu lwenda lwambatangana anu kwambatangana dîbà dyônsò. Nwamonu anyi? Mu dyôdi adi kamwakwikala lufu to. Kadi mpindyewu bidi bikengela twikale ne tulaasa, bikengela twikale tuvuala bilâmbà, twikale... .

⁹¹ Mvwa muswe kwakula mu dinda emu pa *Edènà Wa Sàtaanà* (bààbûngì bàà kunudi badi ne mukaba wa mÿyi pa bwalu abu), *Edènà Wa Sàtaanà*. Yèyè ukaadi mwenze budimi bwa Edena bukwabo, nenku mbimwangate bidimu binunu bisambombo bwa kubwenza, anu mwakenza Nzambi Bwende pende ku cibangidilu. Nzambi wakenza Wende Edena, kadi Sataana wakamunyanga. Mpindyewu Sataana mmwenze Edena wende yèyè, kadi Nzambi neamubutule (ncyà bushuwa) ne neateeke Wende Yèyè.

Cintu kampanda kungambilaci ne: “Mukùdimwinè ku dyabalume.”

Mêmè kudyambidila ne: “Ngeela meeji ne ndi mmutangila mu mushindu mujaalame’s.”

Cyôci ne: “Mukùdimwinè ku *dyabalume*.” Nwamonu anyi?

92 Mêmè kudyambidila ne: “Pàmwápa Díyì adi ndiswe kwamba ne mmukudimwine *ku* dyabalume.” Nenku ndi mwenze anu nkudimuna, nudi numona ne ncinyi: *Mutù wà Kilistò* ne bidimu makumi asatu ne bisatu, muzola kudi Hofmann. Mwab’ewu, tangilaayi mwômò emu, monaayi mwedi Wende mufiike, mpala Wende, mèsù Ende, dyúlù Dyende, ne bikwabo byònsò. Monaayi citupa cya nsuki Yende mwab’ewu cidì cipatuke. Ne Yèyè mmuvwadika kafulu kaa nsuki kaa Banjelo aku bwa kuleeja ne Mukenji wa ne Yèyè udi Nzambi m’Bulelela. Yèyè udi Nzuji wa Kumutu kwa bònsò wa cibwashibwashi, Nzuji wa Kumutu kwa bònsò wa Dyulu ne buloba. Yèyè udi Nzambi, ne kayi cingà cintu to anu Nzambi. Yèyè udi Nzambi muleejiibwe patooke mu mmwenekelu wa buntu ne ubiikidiibwa ne m’Mwânà wa Nzambi, ne mwine Mwânà ewu uvwa Muntu. Nenku piikalabi ne aci kacyenaku cyenza ne Mukenji wetu wikale wa cya bushuwa menemene to: mumanyishiibwe kudi Mifundu, mumanyishiibwe mu mudimu, mumanyishiibwe kudi Bwikadi Bwende, umwèumwè awu makeelela, leelu, too ne kashidi. Ki bwa cinyi Bitampi Mwandamutekete abi bidi Bulelela, bânà beetu. Wèwè udi mufwanyine kubenga kubiitaba, kadi anji sòmbelàku anu panshi musangu kampanda kadi ubilonge ne mwoyi webe awu mukangula tǔng, anji lekela anu Nyuma Mwímpè akulombole kubangila anu ku . . .

93 Mwab’ewu, musangu uvwa Mwaneetu Jack . . . Mwawa mumubiikile kumpala kwa mêmè kuyiisha ciine eci ne mwakule nende musangu kampanda pa ne “Kafulu kaa nsuki katooke aka kavwa ncinyi?”

94 Kwambaye ne: “Ee, Mwaneetu Branham, mêmè ndi ngamba ne civwa mmu Wende . . . paanyima paa dibiika Dyende dya ku lufu mu mubidi Wende mutumbishiibwe awu.” Mwaneetu Jack ngûmvwà ngaakula nende awu. Nenku kudi . . . Kakwenaku muntu kampanda nansha umwe pa buloba apa ûndì mufwanyine kutamba kweyemena pa bidi bitangila malongesha ende a teoloji ne bikwabo mûndì mufwanyine kweyemena Mwaneetu Jack Moore ne Mwaneetu Vayle to, ne bantu baa bu—bu nanku awu, beena teoloji baa cya bushuwa badi babalebale mikanda ya mishindu yònsò ne mmwenenu mishiileshiliangane ya ku bintu byònsò. Ee, kadi, nudi numona’s, nansha ne ciine aci, wa bwalu mwikale mulunda wanyi wa katapula—kateeka, nci—nci—ncivwaku mufwanyine kuciitaba to, kuvwa cintu kampanda mwaba awu civwa kaciyi cifwanyine kuciitabaku to.

95 Ne pashiishe paakalwaci, cyôci eci, pa dîbà adi mêmè kumona ne ncinganyi. S’ki mwedi Wende mufiike ngwôwô ewu. Nudi nuCimona, ngeela meeji. Nwamonu anyi? Mwedi Wende mufiike ne nsuki mifiike ayi, mèsù Ende, dyúlù, byònsò, anu mu byôbì menemene, mene ne ndambu wa nsuki Yende yìdì lwà ku luseke elu. Yèyè udi Nzambi! Nwamonu anyi? Ne Yèyè udi umwèumwè awu makeelela, leelu, too ne kashidi. Nenku

ki cikandakanda cya *Look* ncyôci eci . . . anyi cikandakanda cya *Life*. Ngeela meeji ne eci ki cya . . . Nyewu ngâpù mwoyi ne ncyà nomba kaayi mpindyewu; kaa, cya matuku dikumi ne mwandamutekete a ngondo Mwitânù, cidimu cya 1963. Apu mpaakatukaci, piikala muntu ujinga kupeta cikandakanda aci. Mfôtô anu yêyè umwèumwè awu udi ne Rockefeller ne— ne mukajende biikale basanganyibwa lwà paanyima paaci apu awu. Kadi eci ncikandakanda cipyacipya cya *Maalu A Mamanya* cidi cyamba ne “cicidi anu bwalu busokoka.”

⁹⁶ Ndi mwambe bintu ebi bwa cinyi? Bwa byamona mwa kunupeesha ndambu wa mmwenenu pa maalu atudi tuteeta kwamba, adi Nzambi umanyisha ne mu maulu ne pa buloba ne ngaa cya bushuwa aa. Dijingulula edi, bikeena-kumona, tudi ne ditentula ku bûngi bwadi, tutu naadi misangu yônso. Kadi nwavulukaayi ne, kumpala kwa kwikalaku ndola wa mafi, bikengela kwânji kwikala ndola wa cya bushuwa; bikengela kwânji kwikala ndola wa cya bushuwa, ki pashiishe kutentwilabo pa yêyè awu. Bidi anu bu mutuwva ne Môsa wa cya bushuwa ne Aalona wa cya bushuwa, pashiishe twêtù kupeta Yambele ne Yane paanyima paabo bôbò. Nudi numona mushindu udi byônso abi bilwa anyi? Badi bacimona ne pashiishe bateeta bwa kutentula cyôci aci, padibi bulelela ne kudi cya ku cibangidilu anu *cimwepele*. Ncyà bushuwa. Ncyêna ngamba aci bwa kutapangana ku mwoyi anyi bwa kukèèkangana, anyi kuteeka cintu kampanda pa mwaba ùdì kawuyi waci to, kadi anu bwa Bulelela; mûndi mumanya ne mêmè . . .

⁹⁷ Ndi mutangile ku bukulakaji, ne ndi mumanye ne matuku aanyi kaàcyèna mapitepote bûngi to. Bidi ne, bu Yesu mwa kunenga, ndi mwa . . . ndi mufwanyineku kushaala ndambu; kadi ndi mumanye ne dîngà dituku mwoyi ewu newutuute bwa musangu wawu wa ndekeelu, nenku nêmbwelè mu cibambalu cinene, cya midimà cidibo babiikila ne ndufu. Kadi aci paalwaci, ncyêna muswe bwa kwikale cintu kampanda cya bikengela mêmè kutangila paanyima, bwa kukeba bwa kucinyingaleela to. Ndi muswe ne, pângââfikà pa diine dibà adi, ngiikale mutooke ne mukezuke ku ngàsà wa Nzambi. Ndi muswe kudjìngila mu mizabi ya bwakane Bwende, pângââbwelàmù, mwikale ne cintu cimwepele eci mu meeji ne: ndi muMumanye mu bukole bwa dibiiika Dyende dya ku lufu; ne paabiikilaYe, nêmpatukè munkaci mwa bafwe ne nêngiikalè ne mwoyi pamwe Nende bwa kashidi. Nenku ki kaanyi kiipacila mwab'ewu mpindyewu bwa kufikisha muntu yônso . . . kabiyi bwa kushintulula teoloji yenu anyi cikampanda nansha cimwe to, kadi bwa kuvudija diitabuuja dyenu mu mulayi wa Nzambi wa dituku edi.

Mpindyewu tusambilaayaaku:

⁹⁸ Nzambi munanga, twêtù tudi cisamba cidi ne kusakidila mu dinda emu, kadi nansha nanku, Mukalenge, tudi ne mwoyi mu buloba bwa midimà budi . . . Kakwena nansha umwe wa

kutudi mwab'ewu mu dinda emu, Taatù, udi kayi udyumvwa ne tudi—tudi baswe lwendu lwa lutambe kwikala lwa pamwe Neebe to, ne tudi baswe ditulenga Dyebe adi—adi mu nsòmbelu yetu didi mwa kutuvwija babwengeteke ne banefuke bwa Wamonaku mwa kutushintulula dîbà kana dyònsò, kutufwimba bwa kutuvwija bânà baa balume ne baa bakaji baa Nzambi. Aci—aci's ki kiipacila keetu mwab'ewu, Taatù, aci—aci's ki kaanyi kalumbilà kamwepele kândi naaku kaa kuteeta bwa—bwa kwikala ne mwoyi kumpala Kwebe ne kupeta Dîyi Dyebe ne kuDyambila balume ne bakaji bàdi . . . kabiya bwa kwikala muntu mushiilangane to kadi bwa kuteeta bwa kufila luumu kudi Ewu udi mumpe Mwoyi awu. Enzaku nanku, Mukalenge.

⁹⁹ Swaku bwa kakwikadiku muntu mwaba ewu leelu ewu . . . Anyi—anyi piikalabi . . . Nyewu batuteejila ku nshinga mu dinda emu cyakabidi, mu ditunga dijima. Swaku bwa kakwikadiku muntu udi mu ntanta udi dîyi dyetu difika mufwanyine kabwela mu cibambalu cinene aci kayiku muKumanye mu bukole bwa dibiika Dyebe dya ku lufu to. Kwòkò kwikale bangènzàmpèkààtù mwaba kampanda mu ditunga dijima, bàdi . . . anyi mu citanda emu, mu dibalaasa dinene edi, basòmbè mwab'ewu mu dinda emu. Piikalaku badi kabayi baKumanye to, swaku bwa edi diikale dituku didi kondò kaabo kaa mwoyi kanyukushiibwa, katabuluka, ne bafika ku dimanya ne kî mbamanye ne mmu kansunsa kaayi katudi mwa kubiikidiibwa anyi kututuminabo dîyi bwa kuya kalumbulula bwa nsòmbelu yetu to, ku Dyulu. Ne piikalabi ne dyetu dîna dicidi anu mu mukanda wa cicolakola awu, twètù's netwikale baa kabutu; kadi piikaladi mu Mukanda wa Mwoyi wa Mwânà wa Mukooko, Mwoyi mulelela awu, pa dîbà adi tudi basungidiibwe.

¹⁰⁰ Nenu swaku, Mukalenge, bu mudi Mwoyi awu wenza lwendu kuumukila ku kabeji ukabwela mu bungungu bwa bilòngò, too ne mu cizubu, pashiishe mu lutete, patudi twenda tupita mu dinda emu apa piikalaku Mwoyi kampanda ùdi ne cya kubwela mu lutete mucikàle mushaale mu cicolakola aci, uwupatuleku leelu ewu, Mukalenge, swaku bwa kulondawu lwendu lwa lutete alu, bwalu tudi tulomba nunku mu Dîna dya Yesu. Amen.

¹⁰¹ Nwamfwilaayiku luse bwa mûndi mwangate dîbà bûngidi mushindu ewu. Nkaavwa mene mupwe too ne mwoyi ne eci ncikosela dîbà ku cisanji pambelu pààpa, dîbà dya bàdi bateeleja ku telefone.

¹⁰² Mpindyewu tubuululaayaaku bwa kubala kwetu. Nenu wêwè Mwaneetu Jack, udi ne Bible webe mwaba awu anyi? Pâncidi nkeba bwa kupeta Mufundu wanyi apa, nêndombè Mwaneetu Jack bwa kubalaye Mufundu ewu bwalu mêmè ncyèna mwa kushindumuna bîmpè mènà aa to. Eyo. Mmu

Kulondolola wa Kumpala 13. [Mwaneetu Jack Moore udi wamba ne: “Nshapita mujima anyi?”—Mf.] Uh-huh.

[*Nenku Davidi kukonkaye baakapiteena baa binunu ne baa nkama, kabidi ne mulombodi yònsò.*]

[*Nenku Davidi kwambilaye disangisha dijima dya Izaleela ne: Piikalabi bimweka bimpè kunudi, ne ciine aci ciikale cya kudi MUKALENGE Nzambi wetu, tumwangalajaayi mukenji too ne ku baabèndè kudi bânà beetu badi mu myaba yònsò, badi bashaale mu buloba bujima bwa Izaleela, ne bóbò kabidi abu pamwe ne baakwidi ne beena Lewi badi mu nsesa yabo ne myaba ya ku ncyama, bwa kudisangabo paabo kutudi.*]

[*Nenku twalujaayi cyakabidi Musheete wa cipungidi wa Nzambi wetu kutudi, bwalu katuwwa—katuwwa bawukonke mu matuku a Shawula to.*]

[*Nenku disangisha dijima kwambadi ne nebènzè nanku, bwalu cintu aci ciwva cijaalame ku mèsù kwa bantu bònsò.*]

[*Pa nanku Davidi wakasangisha Izaleela mujima, kuumukila ku Shiiho wa Ejipitu too ne ku cibweledi cya Hemata, bwa kuumusha musheete wa cipungidi wa Nzambi ku Kiiyata-yelima.*]

[*Nenku Davidi wàkabànda, ne Izaleela mujima, ku Baalaha, mbwena kwamba ne, ku Kiiyata-yelima, uwu wa Yuda, bwa kubàndabò kuntwaku ne musheete wa cipungidi wa Nzambi MUKALENGE, udi mushikame munkaci mwa bakeluba, mwena dînà didi disòkiibwàpu.*]

[*Nenku baakambwila musheete wa cipungidi wa Nzambi mu ditempu dipyadipya bawupatule mu nzubu wa Abinadaba; nenku Uza ne Ahio mbavwa bendesha—bendesha ditempu.*]

[*Nenku Davidi ne Izaleela mujima baakimba kumpala kwa Nzambi ne bukole bwabo bwònsò, ne misambu, ne nzenze, ne bisanji bya nshinga yàbùngì, ne makasa, ne byamu bya dikumakaja, ne mpandalala.*]

[*Nenku paakafikabo pa cishiipwidi cya Kidona, Uza wakoolola cyanza bwa kukwata musheete wa cipungidi, bwalu ngombe yakatondoka yamba kudishinda.*]

[*Nenku ciiji cya MUKALENGE cyakateemena Uza, ne yêyè wakamutuuta, ne bwalu wakatwa cyanza ku musheete wa cipungidi, ne yêyè wakafwila mwaba awu kumpala kwa Mukalenge.*]

[*Nenku Davidi wakabungama, bwalu MUKALENGE wakenzela Uza nanku: ki bwa cinyi mwaba awu wakabiikidiibwa ne Peeleza-uzà too ne lelu ewu.*]

[*Nenku Davidi wakapeta diciina dya Nzambi dituku adi, wamba ne: Nèmfikishè musheete wa cipungidi wa Nzambi kwanyi mêmè mushindu kaayi?*]

[*Pa nanku Davidi kaakafikisha musheete wa cipungidi kwende yêyè mu nsesa ya Davidi to, kadi yêyè wakeepuka naawu mu nzubu wa Obeda-edoma mwena Giti.*]

[*Nenku musheete wa cipungidi wa Nzambi wakashaala ne famiye wa Obeda—Obeda-edoma mu nzubu awu munda mwa ngondo isatu. Nenku MUKALENGE kubeneshaye nzubu wa Obeda-edoma, ne byônsò bivwaye naabi.*]

103 Twasakidila, Mwaneetu Moore, bwa dimbadila dya Mufundu awu. Mpindyewu, numfwilaayiku luse bu mûmwà nciyi mwa kudibadila cyôci aci, kadi mêmè—mêmè ncivwaku mwa kucyenza to.

104 Mpindyewu ndi muswe bwa nwênù kubuulula pamwe naanyi mu Maako 7.7, nenku netubale mvensa mwandamutekete ya kumpala ya Maako Munsantu ku nshapita wa 7.

Pashiishe Bafaalesa kulwabo kudiye bônsò pamwe, ne bamwe baa ku bafundi, bàvwà bafumine ku Yelusalema.

Nenku yêyè paakamonaye bamwe baa ku bayiidi bende badya mampà ne byanza ne manyaanu, mbwena kwamba ne, kabayi boowe byanza, baakangula katanyi.

Kadi Bafaalesa, ne beena Yuda bônsò, bôbò kabayi boowe byanza to . . . misangu yàbùngì kabeena badya to, biikale balama—biikale balama bilele bya bakulu.

Ne pavwabo bafuma ku cisalu, bôbò kabayi boowe byanza to, kabeena badya to. Nenku bintu bikwabo byàbùngì bivwa—bivwabo . . . bidibo bapetele kudi . . . bapete bwa kulamabo, . . . kusukula kwa mpanza, ne kwa ngeesu, ne byesu bya cyamu cya kabanda, ne meesa.

Pa dibà adi Bafaalesa ne bafundi baakamukonka ne: Bwa cinyi bayiidi beebe kabeena benda bilondeshile cilele cya bakulu, kadi biikale badya mampà kabayi boowe byanza?

Yêyè wakandamuna e kubambilaye ne: Yeshaayi mmwambe anu bimpè ciprofeta bwenu nwênù beena lubombo aba, bu mudibi bifundiibwe ne: Bantu aba badi banneemeka ne mishiku, kadi mwoyi wabo udi kule naanyi.

Ki bwa cinyi badi bankuukwila mu cijengu, biikale balongesha mikenji ya bantu bu ne ki dilongesha.

Tusambilaayi.

105 Nzambi munanga, twaku Dìyì Dyebe mushinga mpindyewu, ne swaku Dyòdì dikumbaje cidiDi dilongolwela aci. Kwata neetu mudimu bu byamu bya mudimu bwa kuDyamba, ne maci etu bwa kuteelejawu bya kùdì Wèwè, ne myoyi yetu bwa kuDyacidilayi. Tudi tulomba mu Dîna dya Yesu, bwa butumbi bwa Nzambi. Amen.

106 Mpindyewu, cyena-bwalu cyanyi bwa katanci kakese aka cidi nenku. . . Mèmè. . .

107 Badi batuteejila ku nshinga ku telefone wa ditunga dijima mu dinda emu. Ne ndi ngumvwa bamba ne mulunda wanyi mulenga, Roy Borders, udi munkaci mwa kuteeleja awu, ùwva mutacishiibwe bikole bwa bya makeelela diloolo awu abi. Mèmè nkaavwa mupwe too ne mwoyi ne tuvwa ku cisanji. . . anyi ne eci bavwa bàcitéèlejila ku nshinga makeelela diloolo awu. Roy, mwaba wònsò uwikala usanganyiibwa awu, pawikala lwà mu San Jose mu ekeleeziya wa muntwamu awu, anyi mu ekeleeziya wa Mwaneetu McHughes, anyi nî mmwaba kaayi wònsò uwikala awu, kuciinyi nansha, mwaneetu wanyi, byònsò nebiikale anu bilenga. Sòmba talala, wèwè anu. . . Yèyè neacingambile, Roy; kulubakanyi to, mwanaanyi wa balume, ikala ne diitabuuja kudi Nzambi.

108 Cyena-bwalu cyanyi mu dinda emu cidi ne: *Kuteeta Bwà Kwenzela Nzambi Mudimu Kaciyi Diswa Dyà Nzambi*. Mpindyewu, aci's neyena-bwalu cya pabwaci, kadi ndi ne dyeyemena dya ne Nzambi neatubuulwileci mpindyewu. Nwavulukaayi: "Kuteeta bwa kwenzela Nzambi mudimu kaciyi diswa dya Nzambi." Mpindyewu, aci cidi cimweka cya pabwaci menemene. Kadi, mu cyòci eci, pàmwàpa Nzambi udiku mwa kutukwacisha.

109 Cikwabo cintu cîndì njinga kwamba mu dinda emu, ncyá ne tudi ne disanka dya kwikala munkaci mwetu ne mulunda wanyi, mulunda munanga wa dikema, nsongaalume. Bààbûngì baa kunudi nwènù bàdì bàtèèlejilà ku cisanji mpindyewu badi mwa, anyi, ku nshinga ku telefone, mbamanye ne nganyi mwine ewu. Leelu ewu mmufikilu wa dilediibwa dyende, wákumbaji bidimu makumi citeema ne bisatu, Mwaneetu Bill Dauch udi musòmbè mwaba ewu kumpala kwanyi ewu, udi ne bidimu makumi citeema ne bisatu.

110 Kukaadi bidimu mulongolongo kwakamba ngangabuka ne: "Kèna mwa kwikala ne mwoyi to." Nyewu mfuma ku dimumona musòmbè mwaba ewu mpindyewu. Yèyè ukaavwa upuuyakeene ku mbombone, ki mukajende mulenga kwìsù wawa kumbiikilaye e kwamba ne: "Mwaneetu Branham, wèwè utekemenaku bwa kumona mulunda webe mununu, Bill awu, mwikale ne mwoyi, anu wèwè mulwe dyakamwe."

111 Ki mèmè. . . Umwe wa ku ndundu yanyi ya pambelu ya mashinyi uvwa mupandike ku luseke, lukata lwanyi luvwa lufwe

lwônsò, ki mêmè kusunsula ndundu wa pambelu wa mashinyi aanyi ne lubilu bwa kufika kudiye. Ncicivwa anu mfuminaku ku mpompi wa—wa—wa tusoloonyi, ku cyujijidi cya tusoloonyi, ne mfumina ku ciseesukidi kûmvwà mwimane mu Ohio nteeta bwa kufika kudiye, kadi ndi mwenze anu mpatukamu nunku mêmè kumona cikeena-kumona. Nenku ki Mwaneetu Dauch udi mwimane wawa, mwimane mu ekeleeziya mwikale mwolole cyanza; kushintulukabi, nenku mêmè kukumona ukosolola mùsèèsù ne undabula ku cyanza. Cyôci kwamba ne: “Nda ukamwambile ne: ‘EMU MMUDI MUKALENGE WAMBA.’”

112 Ûkaavwa ne bidimu bitwe ku makumi citeema mwine musangu awu. Kupetaye disaamà dya mwoyi mwimane ne dipacisha dya mwoyi, ne diimana dya mwoyi mu kaabujima. Ngangabuka wa luumvu lulenga lwebe lwa eyo. Muntu awu kèna . . . katu yèyè muswe . . . To, ncyakwamba aci to. Yèyè udi anu muntu udiku ne mushindu wa kwangata ngangabuka yônsò udiye muswe awu. Ûvwa ne ngangabuka mulenga wa dikema wa beena Yuda wâkatwilangana naanyi mu cibweledi amu ne kwambaye ne: “Bwende yèyè kakucyena mushindu wa kwikalaye ne mwoyi to.”

113 Kadi ki mêmè kubwela ne kubweja cyanza cyanyi mwinshi mwa ntenta wa mbombone amu, kwamba ne: “Bill, udi ungumvwaku anyi?” Kushikulaye mutu. Mêmè kwamba ne: “EMU MMUDI MUKALENGE WAMBA: ‘Kwakufwaku mpindyewu to.’”

114 Lumingu lumwe kuumukila apu, mêmè mubànde mu cyambilu bwa kuyiisha Diyisha dyanyi, ki Mwaneetu Dauch ulwâlwa ewu wenda wenda tamakatamaka mu citanda amu. Kadi pângàakayà ku nzubu wa Cidiilu wa Furr, dinsambu dya . . . Ndi nswa kwamba ne Blue Boar, mu Louisville dinsambu adi, ki yèyè ewu upatuka mu kashinyi, ulwa wenda upwaka ne mùsèèsù, mwolole cyanza; anu menemene bilondeshile Dîyi dya Mukalenge. Ne ciine aci kukaadi bidimu bisatu anyi binaayi; kadi’s ki yèyè ewu mwende njila bulayi mulwe kusômba kaaba aka, muneemu mu Shreveport (ukosolola ditunga dijima, kayi wendela nansha mene mu ndeke to, mu mashinyi) uh-huh, musômba kaaba aka mu dinda emu. “Mufikilu wa dilediibwa mulenga awu, Mwaneetu Dauch.” Aci ncy a cifumina mu ditunga dijima’s, cyumukila myaba yônsò. “Nzambi akubeneshe!”

115 Ngâkamubâtiiza, paanyima paa yèyè mumane kwikala Trinitaire, ngâkamubâtiiza pavwaye . . . muvwa mmu dimwe dya ku masangisha aanyi a ntwadijilu, paakakengelabi bwa Mwaneetu Banks Wood kumwambilaye bwa kwangataye bilâmbâ byende yèyè (yèyè’s mmuntu wa munene, anu munudi bamone amu), nenku yèyè kubwelaye mu ciina cya mâyi ne mêmè kumubatiiza pakaavwaye ne bidimu biipacila ku makumi mwandamukulu ne bitaanu anyi makumi citeema nanku awu, mu Dinà dya Mukalenge Yesu. Ûvwa wamba ne kavwaku mwa

kudyumvwa bilenga to anu too ne paakapetaye dikubiibwa dya cintu kampanda adi. Pa dībà adi ki kupetaye dituku dya dileediibwa diikalaye kayiku mwa kukulakaja to. Ncya bushuwa, Buloba bunene abu. Wa bwalu ùdi ùtèkemena ne neikale ne mwoyi too ne ku dimona dya Dilwa dya Mukalenge; s'bidi anu mwa kwenzeka. Kadi bu yèyè mwa kulaala tulu, yèyè. . . ne twètù biikale batabale mwine musangu awu, neañji yèyè kulwa dyambedi. Cya bushuwa. Pa nanku, Mwaneetu Dauch, kakwena mushindu mpindyewu wa kucipangilaku to. Wèwè's udi anu mu njila menemene. Shaala anu mwab'awu, mwaneetu wanyi, ne Nzambi akubeneshe. Ne mèmè ndi ngeela Mukalenge twasakidila bwa muntu mwimpè wa mushindu wawa, ne bwa dimupa dya bidimu byònsò ebi.

116 Mu Mukanda wa Kulondolola: “Kuteeta bwa kwenzela Nzambi mudimu kaciyi diswa Dyende to.” Nzambi mmudishikamine, dyambedi, tudi baswe kwanji kuumvwa cyòcì aci. Bantu leelu wa Ndaaya ewu badi badikonka ne mbwa cinyi katwenaku mwa kupeta ditabuluja. Nudiku nwitabuuja ne Nzambi mmudishikamine anyi? Nwamonu's, Bible udi wakula mu mushindu ewu.

117 Kadi twètù tudi tuteeta. . . Mùmvwà nnyiikilangana ne kasumbu kaa bânà beetu baa maalu malenga, bânà beetu baa ba-Baptistes, kî nkwanji kwenza ntanta mule to, nenku bavwa bamba ne: “Mwaneetu Branham, tudi mwa kupeta ditabuluja anu patudi twangata Dìyì, ku mwaku ne ku mwaku, ku dibeji ne ku dibeji, ku dileeta ne ku dileeta.”

118 Ki mèmè kwamba ne: “Ndi paanyi ngitabuuja nanku's, ku dibeji ne ku dibeji.” Yèyè ne. . . Mèmè ne: “Bòbò's bakaavwa bateeteteete kwenza cyòcì aci anu kwine kwònsò aku.”

119 Yèyè ne: “Kadi's tudi ne cya kupeta dyumvwija dya Dìyì dya mu cyena Ngelika, cidi cyena Ngelika cyamba aci.”

120 Mèmè ne: “Mèmè ncyèna mubale bipitepите búngì to, kadi ku dibala dya maalu malonda a ekeleeziya, ne *Nsangilu wa Nicée*, ne *Nsangilu wa Kumpàlà kwà Nicée*, ne *Baataatù bàà Nicée*, ne bikwabo, s'baakakokangana *kuntwaku* mpaa bidi bitangila ciine cyena Ngelika aci. Aci kukaadi bidimu binunu bibidi. Ewu wamba ne: 'N'Ciswe kwamba *cikampanda*,' ne mukwabo ne: 'N'Ciswe kwamba *cikansanga*. Mwaku wa mu cyena Ngelika mmuswe kwamba *cikankenga*.'”

121 Anu mudi wetu mwakulu ewu; mwaku ewu *see [kumona—Muk.]*. Paudi wangata mwaku ewu *see [kumona]*, udi mufwanyine kuswa kwamba ne “mushiki wa mâyi,” “ngũmvù,” anyi bintu byàbúngì. *Bored*, ncifwanyine kwikala ne, “mutubule disoso, kwendakana,” anyi—anyì “udi munsuuye,” anyi “udi mufute mfranga ya didya dyanyi,” anyi ncifwanyine kuswa kwamba nì ncinyi cyònsò. . . bintu byàbúngì. Nenku maleeta makeke majikuke awu, ne bikwabo, s'bidi anu bishintulula

dyumvwija dyônso nkòòng. Pa nanku kanwadyakucyenzaku mushindu awu to. Nzambi ngwàkaCifunda mushindu awu, bwalu...

¹²² Nenku Dîyi dyônso ndisonsola, ne Yêyè wakamba ne: “Ndi nKwela twasakidila, Taatù, Wèwè udi musokoke maalu aa ku mèsù a beena lungenyi ne batalame, ne muswe kuàsokolwela” (amen) “bânà baa bwena badi baswe kuyiila.” Ndibuulula dya cidiYe, bu mûmwà mwambe diloolo dishaale ne: “Mmuswe kuCisokolwela bânà.”

¹²³ Mêmè ne: “Kabyakukumbanaku to, mukalenge.” Mêmè ne: “Ditabuluja kadyakulwaku to padi Nzambi, Nzambi mudishikamine awu, kayi muditume to; nenku pa dîbà adi Yêyè mmufwanyine kwangata kaacidingidingi kampanda kàdi kakayi kamanye nansha mwa kufunda dîna dyaku to, kadi kucyenza ne kòkò aku, kàdi kakayi kamanye nansha Anglais miine milenga to bwa cyena Ngelika kaayi katwambi to.”

¹²⁴ Ki cyakenzaYe mu cikondo cyakayiisha Peetelo dya Mpenta adi, nudi bamanye’s, yêyè kavwa nansha mumanye mwa kufunda dîna dyende to, mupangi ne kayi mulonge to. Kadi Nzambi utu wenza bintu mu mushindu wa pabwawu menemene bwa wetu ngeelelu wa meeji wa mamanya a mu mitu ewu. Cyôci aci ki cidi cicivwija Nzambi. Bu ne Yêyè wakangata musumbà wa beena teoloji ne beena myânzù mitumbuke, ne bakwabo, nunku’s mbambe ne: “Kaayifa wa meeji matwe awu, nudi numona’s, mmucyenzè anu mu cyôci menemene.” Kadi Nzambi wakapweka e kwangata balobi baa mishipa bavwa kabayiku bamanye nansha kufunda mênà abo to, nenku ki cyakangataYe ncyôci aci. Ki Nzambi nyawu, Yêyè udi wangata cintu kampanda cidi cintu cyanaana aci ne wenza cintu kampanda ku cyôci aci bwa luumu Lwende Yêyè mwine. Yêyè wakangata cimvundu cinene kadi kwenza Edena. Uh-huh, n’Nzambi.

¹²⁵ Mpindyewu, piikalaku ne kudiku kampanda udi ne byamu bilamakaja bwa ditabuluja, s’mmwaneetu wa ngiikadilu milenga ewu, Billy Graham. Kadi byamu bilamakaja bidi anu bîmpè, kî mbyamu bilamakaja byàcyëndeshà to, bidi bikengela bukole bwendeshi bwa kucyendesha. Udi mwa kwenza mashinyi a kadyendelandela, kuteekamu nkwaswa milenga, kwenza maapistons ne—ne kujaadikilangana ku maalu a mamanya cidi mashinyi awu mwa kwenza; kadi bukole bwendeshi bwôbù kabuyimu to, cidi anu cintu cifwe cyetu eci.

¹²⁶ Pa nanku, mu ditabuluja dya mu Galles, dimwe dya ku matabuluja etu a ndekeelu kumpala kwa dyetu dya beena Mpenta edi, muntu nansha umwe kaakamanyaku ne cyàkajuulà ditabuluja adi ncinyi to, civwa anu musumbà wa bantu cyanaana.

¹²⁷ Mpindyewu, patwasanga bônso...mulunda wetu, Billy Graham, usangisha ba-Presbytériens bônso, ne ba-Luthériens,

ne beena Mpenta, ne bintu byònsò pamwe, ubwela mu cimenga kampanda benzamu disangisha dinene dya bantu binunu, ne bantu binunu makumi asatu balwa (munda mwa mbingu ibidi) bafila myoyi yabo kudi Kilisto; dya nwalukila mu mbingu mikwabo ibidi yidi yilonda kanuciyi nupeta nansha umwe to. Nwamonu's, ki byamu bilamakaja mbyòbì abi. Kadi Nzambi mu ngàsà Wende mudishikamine awu akule anu ne kaacidingidingi kampanda, mutudi mwa kwamba, kaamuntu cyanaana; Nyuma Wende adidinge anu apone mu cimenga kampanda ne balume bàpanga mwa kuya ku midimu, bakaji bàpanga mwa kusukula malongo, beena mudimu bakaji bàpanga mwa kulongolola malaalu, bikale beela mbila mikole badila myadi ne byanza byabo byela muulu. Aci's nditabuluja, aci's mmu diswa dya Nzambi.

¹²⁸ Bavwa balonda bamba ne bamwe baa ku bantu banene baa luumu baa mu ekeleeziya baakaya ku Galles bwa kuumvwabo, anyi kudifwanyikijila civwa byamu bilamakaja byònsò abi bivwa cinyi mu diine ditabuluja adi, mu cikondo cya ditabuluja dya Galles adi. Nenku paakatuulukabo mu mazuwa a màyi amu baase bifulu byabo bileebile abi, ne nshingu yabo ya nkoolò ayi, kumonabo, mu mùsèsèsù amu, kampulushi kampanda kenda kapweka, kenda kanyungulula kakombo kende kaa matraki kaakatuma eku kaakatuma eku mushindu ewu, kenda keela mwonzu, bôbò kwamba ne: “Mulumyana wetu mulenga, udiku mwa kungambila mwaba udi ditabuluja dya Galles disanganyiibwa anyi?”

¹²⁹ Yèyè ne: “Eyowa's, bânà beetu, nwênù's nudi biimane munkaci mwadi!” Uh-huh, uh-huh, uh-huh. Kwambaye ne: “Umvwayi ne, *mémè* ewu ki ditabuluja mene dya Galles adi,” yèyè ne, “bwalu's ditabuluja dya Galles adi didi munda mwanyi mémè emu.”

¹³⁰ Ki budishikaminyi mbwôbù abu! Ki cidi Nzambi wenza ncyôci aci, ne Yèyè nkaayende ngudi ne bukenji bwa kutuma ditabuluja. Kî nkupeta bya ditwangaja dya byamu bilamakaja to, nkusambila bwa Nzambi atume bukole bwendeshi—bukole bwendeshi.

¹³¹ Yèyè utu ubuulwila Dìyì Dyende anu munda mwa badyanjila-kulongolola. Mpindyewu, pândi ngamba mwaku ewu wa *kudyanjila kulongolola* . . . Mpindyewu, mmwaku mubi wa dyamba bantu bitwilangane, nangananga patudi ne misùmbà ya bantu basopakane munkaci mwa ba-Arminiens ne ba-Calvinistes. Nenku kacyi. . . Nkaadi munulombelombe bwa kanwikadi nwela meeji ne mémè ndi muCimanye cyònsò to, kadi misùmbà yònsò ibidi ayi yidi mu ntuapakanyi bilondeshile Mifundu. Ngàsà ncidi Nzambi mungenzele, byenzedi ncìndi mémè ngenza bwende Yèyè. Nwamonu anyi? Pa dîbà adi nwaCyùmvù. Wèwè mubànde ku dimwe dya ku matamba awu, ncyà bushuwa ne neukadisangane ukaadi kundeekeelu

kwa ditamba adi kuciyi kabidi ne mushindu wa kwalukila to. Mukanda wa Efeso udi wòwò ubitwangaja pamwe, mündi mémè ngeela meeji.

¹³² Mpindyewu, kadi mwaku awu, pândi ngwangata, *mudyanjila kulongolola*, kanwikadi nwela meeji ne mémè ndi. . . wòwò awu ki mwaku umwepele wündi mémè mumanye bwa—bwa kwenza ne. . . Ndidyanjila-kumanya dya Nzambi, nwamonu's, bwa ne Yèyè uvwa mumanye. Yèyè—Yèyè kèna mwa kwamba. . . Yèyè—Yèyè wakafwa bwa bônso kusungidiibwabo, ki cyakenzaYe, kadi ku didyanjila-kumanya Dyende Yèyè uvwa mumanye ne nganyi uvwa mwa kusungidiibwa ne nganyi uvwa kayi mwa kusungidiibwa. Nwamonu anyi? Ki cidìYe mumanye ncyôcì aci, mémè ncyèna mucimanye to ne wèwè kwèna mucimanye to, pa nanku tudi tukwata mudimu bwa lupandu lwetu ne diciina ne dizakala.

¹³³ Mpindyewu, kadi Nzambi ukaadi ne Dîyì Dyende dimana kuteeka, ne mmuteeke nanku mu bikondo byônso. Didyanjila-kumanya Dyende ndidi diMufikishe ku diteeka mu ekeleeziya, ne munda mwa bantu, bintu kampanda bikaavwaYe mumane kwenza kacya ku cibangidilu. Ne pa dîbà adi Evanjeeliyo udi uyiishiibwa ku *aci* cikondo aci awu udi ubuuludiibwa anu kudi bôbò bantu abu, bakwabo bôbò kabeena baCimona to. Nwamonu anyi? “Ndi nKwela twasakidila, Taatù, mÛdì musokoke bintu ebi ku mèsù kwa beena lungenyi ne batalame, ne mwikale uCibuulwila bânà badi baswe kuyiila.” Nwamonu's, ki didyanjila-kulongolola ndyôdì adi. Kabiye ne Yèyè wakacyenza, munudi nwamba ne: “Nênkusùngùlè wèwè, kadi wèwè ncyèna nkusungula” to. Ku didyanjila-kumanya Dyende, Yèyè uvwa mumanye cyúvwà wèwè mwa kwenza.

¹³⁴ Ku diikala Dyende dya kayi mikalu. . . Nudi nwitabuuja ne Yèyè kèna ne mikalu anyi? Kayi nanku to, Yèyè kèna mwa kwikala Nzambi to. Nenu, elaayibi meeji ne, mwikale kayi ne mikalu: Yèyè uvwa mumanye nkùpà yônso uvwaku mwa kwikala pa buloba, bûngì bwa misangu yivwa nkùpà ayi ne cya kupodya, bûngì kaayi bwa mafuta buvwa mu nkùpà ne nkùpà yônso, kabeji ne kabeji kônso kaa cisoosa pavwaye mufwanyine kusomba; ki diikala kayi ne mikalu ndyôdì adi. Kadi twètù tudi ne mikalu, tudi twenda tutetukila mu mîdimà. Nzambi utu mutufwanyikije ne mikooko, nenu tudi ne cya kwikala ne Mulombodi. Ne mwine Mulombodi awu kí mmuntu to, Mulombodi awu n'Nyuma Mwîmpè, Nyuma wa Kilisto munkaci mwetu. “Mu katanci kakese emu baa pa buloba kabeena baMmona kabidi to.” Buumùntù Bwende bwa mubidi awu wakabandishiibwa kuulu ku Nkwasa wa butumbi wa Nzambi, kuvwa Nyuma *usanganyiiibwa* pa Nkwasa wa butumbi; mpindyewu Kilisto udi pa Nkwasa wa butumbi apu, Yesu. “Mu katanci kakese emu baa pa buloba kabeena baMmona kabidi to, kadi nwènù nenuMmone, bwalu Nèngùikalè neenu too

ne kunshiikidilu kwa buloba, munda mwenu mene.” Nkwasa wa butumbi wa Nzambi, wa Kilisto, mmwibakiibwe munda mwa mwoyi webe; ne Yêyè mmusòmbe pa Nkwasa wa butumbi wa Nzambi, kadi mu Bukalenge bwa bidimu cinunu Yêyè udi ùsòmba pa Nkwasa wa butumbi Wende Yêyè mwine; bwalu, Yêyè wakadicipa ne Neajuule Muntu ewu, Mwan’Ende, Mwânà wa Davidi, bwa kusòmbyè pa Nkwasa Wende wa butumbi.

¹³⁵ Mpindyewu, Yêyè udi ubuulwila bintu ebi ku didyanjila-kumanya Dyende aba bakaavwaYe mulongolwele biine bintu ebi, bwa cyanaana kabeena baCimona to. Biimane mwaba awu mene, baCitangile, kadi kabayi baCimona to.

¹³⁶ Mbanganyi bakaadiku bamone dizola dya ngombe mu cisuku adi, didi dikengela bwa wêwè kwikala utangila utangilula adi? Kacya nukaadiku bamone cyôci aci anyi? Anyi, bamone dizola dya Kilisto mu cisuku, anyi mu dyulu, anyi mu matutu? Nwamonu’s, muzodi awu mmucijaalamiye bikole mu mushindu wa ne bikukengela bwa kucitangila anu mu mushindu kampanda. Ee, pa dîbà adi, paudi anu ucimona musangu umwe, kwèna mwa kumonaku cîngà cintu to anu cyôci aci. Musangu wônsò wûdi anu utangila, ki cyôci aci. Mbanganyi bakaadiku bamone mazola awu? Ee, ncyà bushuwa ne nukaadi baàmòne.

¹³⁷ Ee, mushindu awu ki udi Kilisto, Yêyè mwine, Evanjeeliyo, Mukenji. Paudi anu umona Mukenji wa dîbà, kakwena cîngà cintu cyûdi mwa kumona pa kuumusha Wôwò to. Ki cyônsò cidîku ncyôci aci. Bikwabo byônsò mbijimine, bikwabo byônsò bidi anu bikwaci bya mwaba cyanaana, nwamonu’s, nwamonu’s, paudi anu umona Mukenji!

¹³⁸ Ki cidi—mwakadibi mu cikondo cya Noa. Pavwa Noa ne kasumbu kende...monaayi ne mmunyi...Paakamonabo Mukenji, cintu cikwabo nansha cimwe kaciyakiikala ne mushinga to. PaakaWumona kasumbu kaa Môsà, cintu cikwabo nansha cimwe kaciyakiikala ne mushinga to. PaakaWumona kasumbu kaa Yone, cintu cikwabo nansha cimwe kaciyakiikala ne mushinga to. PaakaWumona kasumbu kaa Yesu, cintu cikwabo nansha cimwe kaciyakiikala ne mushinga to. PaakaWumona kasumbu kaa bapostolo, cintu cikwabo nansha cimwe kaciyakiikala ne mushinga to. PaakaWumona kasumbu kaa Luther, kasumbu kaa Wesley kuWumona, kasumbu kaa beena Mpenta kuWumona, cintu cikwabo nansha cimwe kaciyakiikala ne mushinga to, baakatapuluka ne bintu byônsò. Bwa cinyi? Ku didyanjila-kumanya Dyende Yêyè wakadyanjila kulongolola bintu ebi bwa kwenzekabi.

¹³⁹ Yêyè utu usungula muntu Wende Yêyè mwine ku didyanjila-kumanya Dyende. Anu mudiYe mwambe mu Loomo 8 emu ne, Esawu...bwa—bwa disungula dya Nzambi kushaaladi dya cya bushuwa. Bwa ne Esawu ne Yakobo bônsò babidi baakalediibwa kudi baledi baa cijila, bânà baa mapasa, bwa

disungula Dyende kushaaladi dya cya bushuwa ne dilelela, Yèyè wakamba ne: “Ndi mukine Esawu, ne munange Yakobo,” kumpala kwa bânà baa balume bônso babidi abu kulediibwabo. Nwamonu anyi? Yèyè mmumanye cidi mu muntu, Yèyè uvwa mucimanye kacya ku cibangidilu ne civwa ncinyi, ki bwa cinyi Yèyè udi mwa kwenza bwa bintu byônso kukwatabi mudimu anu menemene pa dîbà dya ntanku. Tutu bônso tulwa babinduluke ne tulubakana; kacya kanutuku banji kuMumona Yèyè mulubakane to. Kabatu. . .Nwamonu anyi? Bintu byônso bidi bikwata mudimu anu mu mushindu mujaalame, anu mu byòbì menemene, ku dituuta dya ntanku.

¹⁴⁰ Bintu bidi ne cya kwenzeka ebi, bakaji bônso badi ne nsuki mîpì aba, ne balume aba badi bavwale byabo . . .benze bu badi ne nsuki mifwanangane ne ya bakaji baabo aba. Ndi mbamona, kakuyi mpatà to, biikale ne bikùdí mu nsuki yabo, bayenza mvwangala lwà mu mpala emu. Dikudimika kaayi dya maalu! Abi’s ki bipeta bya mu Edena wa Sataana mbyòbì abi. Nenku benza anu mudi mukaji: mukaji udi uteeta kukosa nsuki yende mudi bayende wenza amu; bayende pende ulekela yende nsuki yikola mudi ya mukajende amu. Ne mukaji udi uvwala bilàmbà bya mulume, ne mulume pende uvwala bilàmbà bya mukaji bya mwinshi. Nwamonu’s, s’ki bwalu mbwòbò abu. Mukaji wenda ushaala ne bulume, ne mulume pende wenda ushaala ne bukaji. Nwamonu’s, cidi ng’Edena wa Sataana, bibengangana ne civwa Nzambi mucyènzè ku cibangidilu. Aci’s m’Bulelela.

¹⁴¹ Mêmè nciyi mubange to, katwakubwelaku mu bwalu ebu to. Kadi bintu ebi, ne mushindu udiYe ne cya kubyenza, ne wabyenza mwine nganyi, aci mmushindu udiYe Yèyè mwine musungule, Yèyè ngudi usungula. Ki mushindu udiYe Yèyè muswe bwa byenjiibwe.

¹⁴² Anu mûmvwà muumvwe Mwaneetu Pearry Green, mpaasata wetu wa ku Tucson, uyiisha diloolo dikwabo pa mushindu udi Nzambi mwenze bintu mu mushindu kampanda (Nyewu ngápù mwoyi civwa mene cyena-bwalu cyende aci.), kadi uvwa wamba ne: “Mushindu awu ngudi Nzambi mubiswe, mushindu awu ngudi Nzambi ubyenza.” Ee, s’ncya bushuwa.

¹⁴³ Mpindyewu, nganyi munkaci mwetu emu wâMwambila ne Yèyè mmupiile? Nganyi pende wadidinga kwimana kumpala kwa Nzambi, kwamba ne: “Udi mupiile, Mukalenge, bivwa bikengela Wèwè kubyenza mushindu wûndi muswe mêmè bwa kwenzekabi, mushindu udi Docteur *Kampanda* mwambe ne bivwa ne cya kwikala byenjiibwe”? Nganyi mwine awu udi ne byeledi bya meeji bipampalamuke, bwa kwambaye cintu bu nanku awu? To, wèwè kwèna mufwanyine kupatuka kucyamba nansha, kadi peebe’s ki mûdi wela meji!

¹⁴⁴ Byenze bu pa Diyiisha dyanyi dya *Mufwilakanyi Nè Kilistò* ne: “Nekujuuke baakilisto baa mashimi.” Mpindyewu,

kavwa Yèyè mwambe ne *ba-Yesu* baa mashimi to. Nwamonu's, muntu nansha umwe kî mmufwanyineku kushaala mupuwe bamubiikila ne "Yesu," mu cibiikidilu cya Mukalenge to. Kadi *baakilisto* baa mashimi mbwena kwamba ne "beela maanyi."

¹⁴⁵ Kaa, bôbò, muntu ne muntu udi udicinkila ne udi ne dilaabiibwa: "Butumbi kudi Nzambi's we, yèyè udi mwa kwenza *cikampanda* ne kwenza *cikansanga!*" Kadi anji mwele anu ku diteeta dya Dìyì kadi ujandule kudiye mupatukile, nwamonu's, pa Mukenji wa dîbà.

¹⁴⁶ Bavwa ne dilaabiibwa mu cikondo cya Yesu, kadi kadiyi dipetangana ne Yèyè to.

¹⁴⁷ Bavwa ne dilaabiibwa mu cikondo...Nansha Daatana's uvwa ne dilaabiibwa mu cikondo cya Mòsà. Wakamba ne: "Mpindyewu, kwediku wèwè meeji ne wèwè ki helè udi wa cijila munkaci mwetu nansha, Nzambi udi naabo bûngi cyanaana. Netwikale anu mwa kujuula bulongolodi kampanda mwab'ewu, kasumbu kaa bantu."

¹⁴⁸ Nzambi wakambila Mòsà ne: "Tapuluka nende," nenku Yèyè kukangula buloba ne kubaminabu. Yèyè uvwa mufile Dìyì Dyende dya ku cibangidilu kudi Mòsà, muprofeta Wende; ki mushindu umwepele ngwôwò awu wàkacyènzàYe, ne mushindu umwepele wikalaYeku ne cya kucyenza. Yèyè katu ushintulula ndongamu Wende nansha, nwamonu's.

¹⁴⁹ Pa nanku yetu mmwenenu yitu mibi, Yende mmwenenu yitu ya cya bushuwa, misangu yònsò. Nenku kanuteeci kuMwambila mudiYe "mupiile" nansha. Nansha twela meeji ne muntu kampanda ngudi mutambe kukumbanyina, kî ntwètù badi ne cya kwamba ne udi mutambe kukumbanyina nkampanda to. Mpindyewu, ki mwaba unudi nukabwelela mu bulongolodi ngwôwò awu.

¹⁵⁰ Mwaneetu mutekete kampanda mùle tente ne Nyuma udi mwa kubwela mu cimenga kampanda ne kujuula bulongolod-. . .kujuula ka—kasumbu kalenga kaa bantu. Nenku bakatwilangane mu cisangilu cya muyiiki, ne bânà beetu baa cijila bônsò badisangishamu, nudi bamanye's, bamba ne: "Nudi bamanye mudi bwalu anyi? Mêmè ndi ngiitabuuja ne *Jones mwànà ewu,*" (udi yèyè anu mwànà musungula munkaci mwabo's) "ndi ngeela meeji ne yèyè nguwabi bikengela bwa kwikalaye ne tabernacle munene mulenga awu, mùndì mêmè ngeela meeji. Kanwenaayiku peenu nwela meeji ne aci ncyà bushuwa anyi?" To, ekelekele. Ki yèyè uyaaya wawa. Kadi pashiishe disangisha dyumba ditangalaka. Nwamonu anyi? Tapululaayi bôbò aba! Nzambi ngudi utapulula, Yèyè ki Udi Ucyenza. Kadi bwònsò bwabo, muntu ne muntu, mbaswe kwangata *ewu mwànà,* kumuteeka lwà kumutu *eku,* ne *ewu nunku lwà kwinshi eku.* Awu mmwenenu's ngwa muntu.

151 Muntu udi ne nsapi, kadi mu bushuwa bwa bwalu Nzambi ngudi mulame nsapi ayi. Baakapa bayiidi, ekeleeziya munsantu awu, nsapi; kadi tangilaayaaku numone musangu anu wa nzànzànà wakakwatabo naayi mudimu, paakadishinda Yudaasa mu dishipa dya mukenji. Baakadisangisha e kwelabo nshoobo; biine abu bânà beetu baa cijila's. Udi mufwanyine kwamba ne bôbò abu kabavwa bânà beetu baa cijila nganyi? Nganyi udi wamba ne kabavwa baa cijila? Kadi baakeela nshoobo, ne yakakwata Maatiya. Kadi pavwaye...Mwine awu cyakenzayeku mene ncinyi? Nansha cimwe. Kadi Pôlò nguvwa musungula! Amen. Ki civwa disungula dya Nzambi ndyôdì adi: mwena Yuda mukese, wa dyûlù dikonyangale, mwelulwidyanganyi, wa cilunji cibànde. Kavwa m'Maatiya to, D.D. awu, nudi bamanye's, yêyè—yêyè uvwa...M'Pôlò. Nzambi uvwa musungule Pôlò; ekeleeziya yêyè udi usungula, uvwa musungule Maatiya. Nwamonu anyi? Kanwenaku ne bukenji bwa kwambila Nzambi mudiYe "mupiile" to. Yêyè ngudi mumanye cidì cikengela kwenza, Yêyè ngudi mumanye cidì muntu mwenjiibwe naaci.

152 Nganyi udiku mufwanyine...Ekeleeziya awu uvwaku mufwanyine kusungula Pôlò anyi? Kaa, to, nansha bishi. Bamba ne: "Mulumyana awu's ki udi utwela bônso mu buloko ewu."

153 Kadi Nzambi wakamba ne: "Mêmè nêmmuleejè ciikalaye mwa kukenga bwa bwalu Bwanyi." Yêyè ngudi mumanye cidì bwalu ne ncinyi.

154 Eyo, nansha twêtù twela meeji ne kampanda ngudi mukumbane, Nzambi ngudi mumanye ne nganyi udi mutambe kukumbanyina bwalu Yêyè ngudi mumanye mwoyi wa muntu, Yêyè ngudi mumanye.

155 Nansha ditabuluja, anyi bintu ebi, kabyenaku byenzeka pa dibà ditudi twêtù tudyelela meeji ne ki divwa dikengela bwa kwenzekabi to. Tudi tudyambidila ne: "Mpa dibà edi mene mpindyewu, butumbi kudi Nzambi!" Ntu mmona mu mîpà etu ne bikwabo bya Beena Kantu-ku-byanza ebi ne: "Kulwalwa kataataka, aleluuyah, ditabuluja dinene!"

156 Kanuseeswishibu nansha: "Yêyè ukaadi mumane kulwa, ne baakaMwenzela cikaavwa cimana kulongolola." Nwamonu anyi? Kadi bôbò badi badyelela meeji ne kudi ditabuluja. Didi munkaci mwa kwenzeka anyi? To! Dikaadi dyenzeke, difwe, dikaadi dijike. Uh-huh. Monaayi, eci ncikondo cya dilongolola dya myêndù, cya dipatuka ne dibwela. "Aba badi bindila Mukalenge nebavwijulule makanda abo mapyamapya."

157 Monaayi mwab'ewu mu cyena-bwalu cyetu eci, monaayi Davidi, mfumu wa Izaleela awu, yêyè ngwâkapeta dibuulula dya kwaluja musheete wa cipungidi wa Nzambi kwende yêyè; muvwabi ne, kabavwaku bawukonke mu matuku a Shawula to bwalu Shawula uvwa mutwe cimpingâ. Pa nanku kabavwaku

bakonke musheete wa cipungidi to nansha kakese, cipungidi, mu matuku a Shawula, bwalu yêyè uvwa mutwe cimpingà ne muye kule ne Nzambi. Pa nanku Davidi, ne lukasa lwônso, mwikale ne disonsodiibwa. . . Mpindyewu monaayi eci, ncyena-bwalu cya njiwu mikole be paudi kuyi ucyangata mu mushindu mujaalame. Nenku ndi ndyumvwa ne dibà dilwalwa diikalàbi bikengela bwa twètù kwikala bantu bakole pamutu paa kwikala bânà baa mu maboko. Uh-huh. Bivwa bikengela twètù kwikala tudya byakudya bikole pamutu paa kunwa mabeele.

¹⁵⁸ Monaayi Davidi, mfumu wa Izaleela awu, mfumu awu ucivwa ufuminaku anu ku dyediibwa maanyi bu mfumu; anyi ku disungudiibwa bu mfumu, Shawula. . . Samwele ngwâkamwela maanyi ku diswa dya Nzambi; ne kakuyi mpatà to yêyè nguvwa mfumu musungula kudi Nzambi, kakuyi mpatà ku bwalu abu to. Kadi ki yêyè ewu's, disonsodiibwa dimulenge. Bwalu abu buvwa bubuulwila Davidi. Yêyè ngwâkapeta dibuulula, muntu mukwabo nansha umwe kaakambaku kantu nansha kamwe pa bwalu abu nansha. "Tuyaayi tukangate musheete wa cipungidi, bwalu ndiswa dya Nzambi bwa twètù kwikala ne musheete wa cipungidi awu kutudi eku, bwa twètù kwikala tukonkela Nzambi ku musheete wa cipungidi awu." Cintu cya bukutu bwâbûngi, bwâbûngi be. Kanwenaayiku peenu nwela meeji nanku anyi? Eyo.

¹⁵⁹ Vulukaayi, kadi, yêyè bu mfumu, ne mupete dibuulula adi, wakapatuka mu mikalu ya kaaba kende. Kuvwa muprofeta mu ditunga amu dînà dyende Natana, yêyè awu nguvwa muteekiibwe bwa kupetaye dibuulula. Kwôkô cintu kampanda cya kwamba, Yêyè uvwa mwambe ne: "Mukalenge kêna wenza cintu nansha cimwe padiYe kayi mwanji kucibuulwila basadidi Bende baprofeta to." Kadi, nudi numona's, Davidi yêyè bu mfumu, mwikale ne dilaabiibwa pambidi pende. . . Mpindyewu, aci m'Mufundu anyi? Ne dilaabiibwa pambidi pende, ne mupete dibuulula dya cya bushuwa; kadi kadivwa mu dyôdi to: Bwalu Natana nguvwa muprofeta wa cikondo aci; kadi dibuulula kadyakalwaku kudi Natana to; kadi paakalwa dibuulula kudi Davidi, yêyè kaakakonkaku nanshà Natana pa bwalu abu to. Yêyè kufileeja kuya anu kenza civwaye yêyè muswe kwenza aci. Uh-huh.

¹⁶⁰ Kadi anji monaayi anu baakaya Davidi kakonka mu nshapita wa 13 emu: "Kadi yêyè wakakonka baakapiteena baa binunu ne baa nkama," mwalukile kudi disangisha dyende. Nwamonu anyi? "Mpindyewu, kanwenaayiku peenu nwela meeji ne bivwa bikengela bwa twètù kwenza. . .?" Kî nnanku to. Mpindyewu, yêyè uvwa uteeta kwenzela Nzambi mudimu, kadi kî nyêyè uvwa muteekiibwe bwa kuwenzela nansha; nwamonu's, bwalu Nzambi uvwa ne mushindu kampanda.

¹⁶¹ Anu bya mwomumwe ne muvwa Nzambi mwa kwikala mwakule ne—ne mfumu pa bivwa bitangila disaamà dyende

ne dyondopiibwa dyende, kadi Yêyè kaakenza nanku to, Yêyè uvwa ne mushindu mumana kuteeka wa dicyenza, ùvwa ngwa muprofeta Wende. Pa nanku Yêyè wakaakula ne muprofeta, Yeshaayi, wakamwambila bwa kwalukilaye ne kwambila Hezekiya civwa mwa kwenzeka.

¹⁶² Mpindyewu, Hezekiya uvwa wakulangana ne Nzambi cimònààmèèsù, ne—ne Nzambi uvwa mwa kwakula ne Hezekiya, mu bushuwa bwa bwalu, kadi Yêyè wakenza tujila kampanda! Nudi nucyumvwa anyi? Nzambi utu ne mushindu Wende Yêyè mwine mumana kuteeka wa dyenza maalu: dituma dya matabuluja, diyikila, dyakula, cyònsò cìdiku aci. Yêyè utu ne mushindu Wende wa dicyenza, ne twètù katwena kampanda bwa kuMwambila mushindu wa dicyenza to. Yêyè udi ucyenza mushindu udi uMusankisha bwa kucyenzaye awu.

¹⁶³ Pa nanku, nudi numona's, Davidi, mwikale musonsodiibwe... Mpindyewu, nudi bavuluke ne nkaavwaku mwambe, bwa dilaabiibwa, dilaabiibwa dya mafi anyi? Vulukaayi ne Nyuma Mwîmpè udi mwa kulwa kulaaba muntu, kadi ciikale anu pambelu paa diswa dya Nzambi. Mwab'ewu, Cidi cicijaadika anu mwab'ewu mene. Nwamonu anyi? Bikengela bwa tulonde mushindu wa Nzambi wa dicyenza, kî mmishindu yetu twètù to, mushindu wa Nzambi wa dicyenza. Bwalu, Davidi, mwikale mfumu, mwela maanyi, mwela maanyi a Nyuma wa Nzambi pambidi pende (cimfwanyi cya Yesu Kilisto), kadi aku kakavwa kajila kaa Nzambi nansha.

¹⁶⁴ Bwa disangisha dijima kaayi, “cyakabasankisha,” mudi Bible mwambe. Monaayi ne, baakapiteena baa binunu ne baa nkama, kabidi ne baakwidi ne beena teoloji baakadyambidila ne civwa “cilenga be.” Kadi's ki bilongelu byenu bya Bible abi ne bikwabo byònsò, baakadyambidila ne civwa “cilenga be.” Nansha bantu bònsò mene baakiitaba, ne baakwidi, ne—ne bôbò bònsò baakiitaba ne dilaabiibwa dya mfumu divwa dya cya bushuwa. Monaayi! Kadi Nzambi kavwa mulaye bwa kubuulula Dîyì Dyende mu movù waDi kudibo bôbò to. Nzambi uvwa ne Wende mushindu wa dibuulula Dîyì Dyende, kadi kî nkudibo bôbò to. Vulukaayi ne, civwa cibengangane ne Nzambi.

¹⁶⁵ Cintu kampamda cya cifwanangane ne cya mu matuku a Miiika mwânà wa Imla. Nudi bavuluke bwalu abu anyi? Yuda ne Izaleela bavwa bakosoloke, ne bavwa ne makalenge abidi mashiilangane, ne Aakaba uvwa mfumu kumutu kwa bukalenge bumwepele. Ne Yehoshafata uvwa kumutu kwa mukalenge—kwa bukalenge bwa Yuda, ngeela meeji ne ki muvwabi; ne Aakaba uvwa kumutu kwa Izaleela, Yelusalema.

¹⁶⁶ Monaayi, nenkuashiishe ki musumbà wa beenyi ùlwalwà ewu ne kunyengabo citupa cya buloba cifila kudi Nzambi civwa Nzambi mupe Izaleela, kadi beena Peleshete abu kuntwaku, anyi beena Suuliya abu, bavwa balame buloba abu ne biikale

badiishilamu bânà baabo bôbò balela ku buloba buvwa bwa Izaleela abu. Ne pa nanku bôbò bakaavwa dijinga ne buloba abu bwa kwikalabo badiishilamu bânà baabo balela ne famiye yabo bôbò. Nzambi nguvwa mubape. . . Awu avwa mmakenji abo mabapa kudi Nzambi.

¹⁶⁷ Ne pa nanku Aakaba kubiikidishaye Yehoshafata, e kwambaye ne: “Lwâku.” Yêyè ne: “Anji tangila anu peebe kuntu kwaka cidi mwena lukuna wetu wenza. Mbilenga bwa twêtù aba, cisamba cya Nzambi, biikàle ne bukenji bufila kudi Nzambi bwa ne bivwa bikengela twêtù kwikala ne buloba ebu, bwikale bwetu twêtù, bùvwà Nzambi ku muprofa Wende, Yoshuwa, mwabanye buloba ebu, bikengela bwa kwikalabu bwetu twêtù, mbwetu twêtù, bwa bânà beetu balela, kadi apa ba-communistes babwângate ku bukookeshi bwabo bôbò anyi? Ne twêtù tukàadi ne. . . Tukàadi ne nzala wa kavwambu, kadi bôbò bangate makenji etu matupeesha kudi Nzambi. Kwêna welaku peebe meeji ne bivwa bikengela bwa twêtù kukuya ne kunyenga buloba bwetu abu anyi? Bu wêwè mwa kudisangaku ne makole audi wêwè naawu awu: bu ne nwênù ba-Méthodistes, ne ba-Presbytériens, ne bônso aba, ne ba-Presbytériens, ne ba-Luthériens, ne bakwabo, nwênù bàdi bangate nsangilu wa bukwantèdelelu mwab’ewu mpindyewu aba, bu twêtù mwa kudisangaku pamwe, bwa twakwata cintu aci.” (Ndi ngamba ne ngaakula mu lusumwinu mpindyewu.) “S’netuye kabwangata.”

¹⁶⁸ “Mona’s,” mwakambaye, “cya bushuwa’s, s’tudi bônso cintu cimwe.” Uh-huh.

¹⁶⁹ Mpindyewu, Bible mmwambe ne: “Mmunyi mudi bantu babidi mwa kwendela pamwe kabayi bumvwangane?” Nwamonu anyi?

¹⁷⁰ Ki mwaba wakalwa muntu munene awu, mwena Mpenta munene awu, Yehoshafata, kubwelakana ne musumbà mubi ngôwù awu. Ne cyôci aci ncidi cyenzekele beena Mpenta beetu leelu ewu. Kudi ndambu wa bantu baa cya bushuwa muntwamu, kadi bakabwelakane ne musumbà wa cyena mangumba awu. Patukaayi mu cintakanyi aci! Ncyediibwe mulawu kudi Mukalenge!

¹⁷¹ Monaayaaku mpindyewu! Ki yêyè awu mwaba awu, nenku yêyè kwamba ne: “Eyo, aci’s cidi cyumvwika cya meeji.” Yêyè ne: “Makalu etu a mvita’s ngeebe; bantu beetu. Byôbi biine, twêtù bônso’s tudi beena Yuda. Bushuwa’s, netuye neebe.” Kadi kuvwa kushaaleku anu ndambu mukumbane wa ntendelelu mu Yehoshafata bwa kwambaye ne: “Kwêna welaku peebe meeji ne bivwa bikengela bwa twêtù—twêtù kwanji kukonkaku Mukalenge dyambedi anyi?” Nwamonu anyi? “Ndi mêmè ngeela meeji ne ncidi cifwanyine kwikala mmwenenu mulenga’s.”

172 Mona's, ki Aakaba ne: "Cya bushuwa's." Yèyè ne: "Mona's, kaa, cya bushuwa's, s'bivwa bikengela bwa mémè kwikalaku mwele miine meeji awu's."

173 "Ee, kudiku muntu wa Nzambi mwaba kampanda anyi? Udiku ne muprofeta kampanda anyi?"

174 "Aa, ndi naabo kî mbângi kî mbangi nkama inaayi mijima ya Kabamba. Mémè's ndi naabo nsangilu mujima mwab'ewu, dingumba dijima. Mbaprofeta baa beena Ebelu."

175 Mpindyewu vulukaayi ne, Bible mmwambe ne bavwa "baprofeta, baprofeta baa beena Ebelu," kabayi baprofeta baa bampangaanu to, baprofeta baa beena Ebelu; cilongelu cijima cya bôbô abu, seminere wa teoloji.

176 "Ee, lwâku naabo!"

177 Nenku bamfumu abu bavwa bavwale ne basômbe kumpala kwende bwa kukemesha muprofeta. Nenku ki yèyè ulwalwa ewu, ngeela meeji uvwa n'Zedekiya wâkalwa mwab'awu, mfumu munene wa beena nsangilu wa distriki, anyi cyônsò civwaye aci, kulwaye mwab'awu munkaci mwabo amu. Uvwa mudyênzèle nsengu minene ibidi, kwambaye ne: "Nzambi mmwakule naanyi. EMU MMUDI MUKALENGE WAMBA: 'Ne nsengu eyi wêwè neusake beena Suuliya too ne pambelu paa buloba abu.'"

178 "Éyì butumbi's we!" mwàkadyàmbidilà bantu bônsò abu ne aci civwa cilenga be, cîmpè.

179 Tangilaayi numone mudici cikafwanangana ne mpala wa kapaaya awu mpindyewu, pankaci paa cya bushuwa ne cya mashimi. Nenku vulukaayi ne neciponene luseke kampanda anyi luseke lukwabo, too ne mwalwaci kuya kashaala misangu mikwabo cifwanangane ne kapaaya kanoona pankaci paa dishiilangana dya cya bushuwa ne cya mashimi. Bidi bikengela kwikalaci Diyì dyônsò dya Nzambi; kaciya anu cibwîpi ne Diyì dyônsò to, kadi Diyì dyônsò! Nenku cikaadi cipweke leelu ewu, kaciya too ne ku ba-Luthériens to, kaciya too ne ku ba-Méthodistes to, kaciya too ne ku beena Mpenta to, kadi too ne ku cikondo cinoona aci, mu cikondo eci mudi dilaabiibwa dya mufwilakanyi ne Kilisto ditambe kwikala anu menemene, mu mushindu wa difwanyine kuseeswisha ne Basungula mene, nebaponene ku luseke lwa mashimi bôbô kabayi bacitabalele to, bu mudi citupa cya mucu cisongoloke's. Nwatabalaayi! Nwatapaayi ntaala nwadimuka! Katwena ne mwoyi mu cikondo cya beena Mpenta mpindyewu to. Tukaadi bapite aci cikondo, bya mwomumwe anu mudibi ne tukaavwa bapite cya ba-Luthériens, ne bapite . . . Nwamonu anyi?

180 Monaayi. Mpindyewu baprofeta abu kwambabo bônsò ciprofeta, bônsò nkama inaayi, badye buukute ne ku mibongo, balongolola bilenga, baprofeta baa beena Ebelu abu kubapabo bujaadiki, ne diyì dimwe ne: "EMU MMUDI MUKALENGE WAMBA: 'Nda, Mukalenge udi neebe.'"

181 Yehoshafata kwambaye ne: “Ee, aci—aci cidi cyumvwika anu cîmpè. Kadi,” yêyè ne, “udiku ne mukwabo anyi?”

182 “Mukwabo? Twètù ne dingumba dijima mwab’ewu, s’tudi ne nsangilu mujima mukungwile kaab’aka. Tudi tukeba mukwabo wa cinyi?”

183 Yêyè ne: “Aa, kadi paanyi’s mvwa ngeela méeji ne pàmwāpa nkufwanyine kwikalaku mukwabu.”

184 Yêyè ne: “Kaa, eyo, mukwabo udiku, kadi katu yêyè nansha wa mu nsangilu ewu to.” Uh-huh. “Mmuntu mwipata. M’Miika, mwānà wa Imla, kadi mêmè ntu mumukine.” Nwamonu anyi? Yêyè ne: “Kabaakumwakidila mu bwobumwe to, kadi yêyè udi anu muntu mwipata wetu wa cyanaana ewu anu kwine kwōnsò aku. Ne ku musangu ne ku musangu, byende biprofeta bidiye yêyè wamba, yêyè kaakukoleshaku seminere wanyi ku mwoyi to nansha kakese.” Uh-huh. “Kabidi yêyè udi uvwija bintu byōnsò ebi anu bibi, udi yêyè wamba biprofeta anu bya bibi bwanyi mêmè, anu bwa kupanganangana.”

185 “Kaa,” mwakamba Yehoshafata, “mfumu kambiku cintu bu nanku to. Kadi mêmè ndi muswe kwanji kuumvwaku anu cidi mwine muntu naaci cya kwamba.”

186 Yêyè ne: “Ee, netukamwangate’s.” Pa nanku kutumabo muntu mu mwaba kampanda mu cipeela amu, nenku kutumabo muntu.

187 Yêyè awu, kumwambilaye, ne: “Mpindyewu, mu njila webe wa dyalukila mpindyewu, ndi muswe nkwambileku cintu kampanda. Udi muswe kwalukila cyakabidi mu dingumba anyi?” Nwamonu anyi? “Udi muswe kwikala cyakabidi mu bwobumwe ne bōnsò abu anyi? Pawikala muswe, wāmbè anu cintu cimwecimwe cidi mukulu wa distriki wamba aci, wāmbè anu cintu cimwedimwe cidi mwepiskopo wamba aci, apu kaayi nebakwalujemu buludi. Mpindyewu ki dībà dya dicyenza ndyôdi edi.”

188 Kadi nudiku mwa kudifwanyikijila muprofeta mwela maanyi, mulelela wa Nzambi udyā cibanga pa Dìyì dimwe dya Nzambi anyi? Nansha kakese!

189 Yêyè ne: “Bu mudi Mukalenge ne mwoyi, mêmè nêngāmbè anu cidi Nzambi wamba aci!” Bidi bitukengela mwānà wa Imla’s we. “Bu mudi Mukalenge ne mwoyi, mêmè nêngāmbè anu cidi Yêyè wamba aci” Ncya bushuwa: “Cidi Yêyè wamba aci.”

190 Nenku mbenze anu bafika kumpala kwa bantu aku, kwa baprofeta bōnsò abu aku, bōbò kwamba ne: “Mpindyewu, amba cidibo bōbò. . .”

191 Yêyè kwamba ne: “Indila, mpèèshèku bufuku ebu, mmonebi ciikalà Mukalenge mwa kwamba aci.” Pa nanku, bufuku abu, Mukalenge kumumwenekela mu cikeena-kumona ne kumwambilaye cya dyamba.

192 Paakacyabu mu dinda yêyè kwamba ne: “Udi wamba bishi, Imla?” pavwabo bônso biimane pambelu apu... Ndi muswe kwamba ne “Miika, mwânà wa Imla,” mwakambaye, “udi wamba bishi mpindyewu? Nyewu tudi bônso basangile mwab’ewu, baakwidi bônso, ne baprofeta bônso, ne bamfumu bônso, ne bikwabo byônso basômbe basangile mwab’ewu. Mpindyewu udi wambaku cinyi kumpala kwa nsangilu munene ewu?”

193 Yêyè ne: “Nda,” yêyè ne, “kadi ndi mumone Izaleela mutangalaja byenze bu mikooko kayiyi ne mulami to.”

194 Ki Aakaba kwamba ne: “Ngaakwambidi cinyi! Muntu mupidye diitabuuja awu udi yêyè mwa kwamba anu biprofeta bya bibi bwanyi mêmè!”

195 Mmuniy muvwaye mufwanyine kwamba cîngà cintu pavwa Nzambi wamba cintu cyôci cimwecimwe aci? Muprofeta’s udi ne cya kwikala mukana mwa Nzambi mwakula, kaciyi meeji ende yêyè mwine to. Ende... Nudi numona’s, yêyè udi anu menemen-... mutambe kudifila anu menemene kudi Nzambi, mu mushindu wa kayi muswe kutapa nî ncinyi nî ncinyi ku mwoyi to, kadi bikengela kwambaye cidi Nzambi wamba, bwalu yêyè kèna yêyè mwine ne bukontononyi bwaCi to. Nwamonu anyi?

196 Yêyè kwamba ne: “Mpindyewu, ncivwa mukwambile anyi?”

197 Ki pa dîbà adi kulwaku mu—muntu munene awu mwambule lusengu, ne kumunangulaye dipi ku mishiku, kwamba ne: “Njila kaayi udi Nyuma wa Nzambi mulonde pâpâtukuYè munda mwanyi mêmè?” Mu ngaakwilu mukwabo, lekelaayi ngânjî kuteeta bwa kucitookesha: “Tangila kuneeku mu... Tangila kuneeku, ndi muswe nkwambile cintu kampana, Miika. Udiku mumanye ne mêmè ewu ndi mulongeshi munene mu Mifundu anyi? Udiku mumanye ne mêmè ngudi ne dilaabiibwa anyi?” Anyi, “Dibatiiza,” mutudi bafwanyine kucyamba leelu ewu. “Udi mumanyeku ne ndi ne cyôci aci anyi?”

198 Imla kwambaye ne: “Ncyèna ngeela mpatà bwa aci to.”

199 Yêyè kwamba ne: “Kadi teejeja! Nyuma wa Nzambi ngudi mungambile, ne mufile bujaadiki pamwe ne nkama yanyi yônso inaayi yidi mwab’ewu eyi, ne ‘netusake beena Suuliya too ne pambelu paa buloba abu.’ Kadi wêwè udi peebe nganyi bwa kulwa apa kadi kwamba ne mfumwètù munene ewu nebamushipe?” Yêyè ne: “Nyuma wa Nzambi’s ngudi mungambile cyôci aci.”

200 Ndekelaayi ngânjî anu ncitookeshe bwa nwênù kucyumvwa. Ne pâmwâpa tudi tusangana Miika wamba ne: “Makeelela diloolo mu cikeena-kumona, mukalenge, mvwa mumone Nzambi musômbe pa Nkwasa wa butumbi. Nenku mêmè kumona cilwilo cijima cya mu Dyulu cidisange ciMunyungulukile, uh-huh, nenku bavwa benza cisangilu mu Dyulu. Kwambabo ne:

‘Nganyi utudiku mwa kutuma pa buloba bwa kaseeswishaye Aakaba? Bwalu mwinshi mwa Nkwasa wa butumbi emu nyewu mudi muprofeta, muprofeta mulelela, dîna dyende ng’Eliya. Ne yêyè mmwambe ciprofeta ku Dîyî Dyanyi ne mwambe ne “Aakaba mwena lwonji awu, bwalu wakashipa Naabota, mbwa neyilake mashi a mwena lwonji awu,” nenku bidi bikengela bwa twêtù kwenza ne Cyôci aci cyenzeke bwalu Cikaadi cimane kwambiibwa, Cidi ng’ÈMU MMUDI MUKALENGE WAMBA! Bikengela bwa cyenzeke, bikengela bwa kukumbanaci. Kadi netùcyènzè bishi’s?”

201 “Pa dîbà adi lwà mwinshi mu myaba ya yikwacisha bwôwà ya bajimine, lwà mwinshi menemene mwamwa kufuminamu nyuma kampanda wenda ubànda, kwambaye ne: ‘Mèmè ndi museeswishanganyi. Byôbi ne ndi mwa kuKwenzelaku mudimu kampanda, nêmpwekè nye nkabwele munda mwa muprofeta wende amu.’” Bwalu bavwa batambe kudyenza bulongolodi be, mu mushindu wa ne nebateleje cintu anu cimwepele, ne ciine aci ntuumasaluka tukese. “Nenku nêmbàfikishè ku dyamba dya ciprofeta cya mashimi. Ne nêmfikishè Aakaba ku diteeleja bantu baa luumu abu pamutu paa muprofeta Webe mulelela awu; bwalu yêyè neakenkete kantu ne kantu kônsò kadiye wamba ku Dîyî Dyebe, yêyè neakenkete bikeena-kumona *byende* ku Dîyî, neakenkete kantu ne kantu kônsò kadiye wenza ku Dîyî, ne cyôci kacyi cikumbanangana ne Dîyî yêyè kî mmufwanyine kuciteelejaku to. Kadi cyôci . . . mèmè ndi mwa kuseeswisha bakwabo aba, ne nêngiikalè mwa . . . bôbò . . . Aakaba yêyè mmutambe kuteeka dyeyemena dyende mu cisumbu cinene cya dikubiibwa cidi cidyènzè cimuku cyacya, mu mushindu wa ne bôbò nebadisangishe ne nebàdyènzè cimuku. Nenku nêmfikishè Aakaba ku dibateleja bôbò, ùpâtuka uya kuntwaku. Nenku mushindu awu ki utwàcyènzà.”

202 “Nzambi kwambaye ne: ‘Wêwè kadi ki udi mwa kucyenza, wêwè ki museeswishanganyi wa bushuwa; pweka ndaaku.’”

203 Ki pa dîbà adi Zedekiya kumunangula dipi ku mishiku, kwamba ne: “Wêwè uvwa penyi . . .?”

204 Yêyè ne: “Neujandule pawikala ukaadi musòmbe mu buloko bwa munda.” Uh-huh.

205 Yêyè ne: “Ndaaku!” Zedekiya wambila mfumu nanku awu. Yêyè ne: “Ndaaku walukile mu ditalala!”

206 Aakaba kwambaye ne: “Kwataayi mulumyana awu numwele mu buloko. Numwele mu nkanu, nwikale numupa dyâmpà dya kanyinganyinga ne mâyi a kanyinganyinga. Kadi pângiikalà mwalukile ne bucimunyi bwanyi mwab’ewu, bwine bwangambidibo kudi baprofeta baanyi ne ‘ditabuluja edi nedyenzeke cya bushuwa’ ebu,” yêyè ne, “nêntangilè bwalu bwa mulumyana awu!”

207 Teelejaayaaku mēyì a ndekeelu a Miika akambilaye muntu awu: “Bwa wèwè anu mudidinge mwalukile, apu kaayi Nzambi kî mmwakule naanyi to.” Amen.

208 Nwamonu’s, Nzambi utu ne Wende mushindu wa dyenza maalu. Bantu aba bavwa badyambidila ne bavwa benzela Nzambi mudimu. Nwatapaayi ntaala nwadimuka! Kî ndisaluka to, kî ndizuka to, kî mbya didifwanyikijila to, kadi cidi ne cya kwikala “EMU MMUDI MUKALENGE WAMBA,” cidi ne cya kwikala cijaalame. Eyo, nansha bishi . . . Tudi tusangana bintu ebi nanku awu.

209 Monaayi mpindyewu paakelesha Davidi diyì dinene dya patooke edi, ne kumwekaci bu ne civwa cîmpè, cintu cîmpè cya dyenza. Dìbà adi tudi tusangana ne (Ndi nnucyokesha anyi? Dìbà dikaadi dimane kupita bikole menemene mu mushindu wa nciyi mwa kwangata mukwabo anyi?) baakelesha diyì dinene dya patooke edi, yêyè kayi mukonkeku muprofeta to.

210 Mpindyewu, muntu wetu kana yònsò ewu mmumanye ne Amosa 3.7 mmwambe ne Nzambi utu mulaye ne Yêyè katuku mufwanyine kwenza cintu nansha cimwe to padiYe kayi mwanji kucibuulwila muprofeta Wende dyambedi. Munda mwa bikondo bya ekeleeziya tudi bapete balongolodi; kadi mmulaye ku Maalaki 4 ne nekwikale muprofeta kampanda pa buloba mu matuku a ndekeelu (bwalu bìdi bikengela cikumbanangane ne citembelu aci, nwamonu’s) kumpala kwa cikondo cya nshiikidilu kulwaci.

211 Kumpala kwa Yesu kulwaye musangu wa kumpala, Eliya wakalwa, Eliya wa Maalaki 3. Maataayi 11 ngudi wamba nanku: “Panwikala mwa kucyumvwa, yêyè ewu ki udibo bambe ne: ‘Monaayi, Ndi ntuma musanjeela Wanyi—Wanyi kumpala Kwanyi.’” Mpindyewu, Yêyè mmwambe ciprofeta, beena teoloji bônso badi biitabuujja cyôci aci: ne, mu dituku dya ndekeelu, Nyuma wa Eliya udi ne cya kulwa, kabidi. Udi ne cya kulwa misangu itaanu, yidi Nzambi ukwata mudimu ne Nyuma awu: Elisha, Eliya, Yone Mubatiji, ne bwa ekeleeziya wa baa Bisamba bya bende, ne pashiishe bwa beena Yuda mu Bwakabuulwibwa nshapita wa 11. Aci cidi, n-g-â-s-à [Mu Anglais: g-r-a-c-e—Muk.] wa Nzambi, d-i-i-t-a-b-u-u-j-a [f-a-i-t-h], Y-e-s-u [J-e-s-u-s], Yesu, ma—maleeta ataanu. Kacyena mwa kwimanyina pa inaayi to, bikengela cikafike ku itaanu. Nwamonu anyi? Monaayaaku!

212 Mpindyewu, Yêyè ngutu mulaye aci, pa nanku aci cidi cijaalamija Bible anu menemene too ne mu dituku edi, ne Sodomu ne Gomola. Ne Eliya kavwa . . . Kacivwa Eliya to; Civwa n’Nyuma wa Nzambi pambidi paa Eliya; Eliya uvwa yêyè anu muntu. Mpindyewu, tukaadi bapetepete ba-Eliya, ne binkooci bya ba-Eliya, ne binkutu bya ba-Eliya, ne bikampanda byònsò bya ba-Eliya. Kadi Eliya wa dituku edi m’Mukalenge

Yesu Kilisto. Bidi bikengela bwa Yèyè kulwa bilondeshile Maataayi wa dikumi ne mwandamuteket-...Luuka 17.30, mbwena kwamba ne, bidi bikengela bwa Mwânà wa muntu adibuulule Yèyè mwine munkaci mwa bantu Bende. Kayi muntu to, Nzambi! Kadi necilwile mu muprofeta. Mpindyewu, kacya Yèyè katuku mwanji kwikala ne baprofeta banene babidi musangu umweumwe awu to, kacyakacya, pa buloba apa. Nwamonu anyi? Nansha byòbi ne kudi...mitu ibidi—ibidi kayeenaku mwa...Bikengela ciikale mutu anu umwepele. Bikengela Nzambi ikale ne muntu umwepele mu bukontononyi Bwende. Nwamonu anyi? Kudi Nzambi umwepele; kuvwa Taatù, Mwânà, ne Nyuma Mwîmpè, kadi Nzambi umwepele kumutu kwa cyònsò aci, monaayi, kadi mwikale ukwata mudimu anu ne myânzù ayi. Ki mudiYe kabidi mukwate mudimu ne Eliya, Nyuma wa Eliya; Yèyè ngudi mukwate mudimu ne Nyuma awu, kadi Nzambi umwèumwè awu mwikale uMukontonona dîbà dyònsò bwa kuuja Dîyi Dyende.

²¹³ Mpindyewu, monaayi mu eci mpindyewu, Davidi wakeela meeji ne uvwa ne bintu byònsò mu bulongame. Ne yèyè uvwa musonsodiibwe. Nudi numona mudi Nyuma Mwîmpè mwa kulaaba muntu anyi? Kadi bikengela ciikale mu bulongame bwa dilaabiibwa. Nyuma wa pambelu awu udi mwa kulaabiibwa ne Nyuma Mwîmpè, kadi musuuka mwikale anu mufiike fitutu bu dikâlâ. Mpoopu utu ukolela anu mu mâyi amweamwe adi ibaka...abweja mwoyi munda mwa blé awu, miikale abweja mwoyi munda mwa mpoopu; kadi munda menemene mwa mpoopu amu, cidi mmwoyi wa mpoopu. Ûdi ùsànka, ne wela bilòngò, ne upeta mwoyi, ne wenza byònsò bidì blè wenza abi, kadi *musuuka* wende udi *mpoopu*. Nwamonu anyi? Balongeshi baa mashimi badi mwa kajuuka, balongesha malongesha a busatu ne bikwabo bya mishindu yònsò, ne kwikala balaabiibwe kudi Nyuma Mwîmpè, ne kwenza bishima anu bûngì bumwebumwe ne bidi Evanjeeliyo mulelela mwa kwenza abi. Kadi ku Dîyi mwab'ewu, ki cidi cicyenza neyòci aci. Nudi bumvwe cîndi muswe kwamba aci anyi? Mpindyewu, bidi anu bîmpè bwa kulongesha cyòci eci, neela meeji, ndi—ndi nsanganyibwa mu tabernacle wa pambelu paa cyena mangumba mu dinda emu, mu—mu cilaala-beenyi emu.

²¹⁴ Monaayi, tangilaayi citudi twamba. Mpindyewu, ee, teejeaayi. Davidi uvwa ne disaluka dyònsò divwa ditabuluja dilelela naadi adi. Monaayi! Baakeela mbila, bakatuuta mikunda, baakaja maja, ncyà bushuwa ne baakapeta cintu kampanda ku dilaabiibwa adi. Bushuwa's! Cyònsò aci cifwanangane anu ne ditabuluja dilelela, kadi, nudi numona's, Nzambi kavwamu to. Nzambi kavwamu to. Yèyè uvwa ne muprofeta musòmbè anu mwaba awu mu ditunga amu. Bivwa bikengela bwa kwikalabo bamanye. Nwamonu anyi? S'bivwa bikengela bwa Davidi kwikalaye mumanye cyòci aci.

215 Cintu kampanda leelu ewu, tudi ne byamu bilamakaja byônsò, bu mudi mangumba manene, bibilu bya butangadiki bya mu cikondo cyetu eci, kadi cipeta's cidi cimweka anu cya mwomumwe ne muvwaci mwine musangu awu; bipeta byetu bya bibilu byetu binene bya butangadiki, ne tubingila twetu twônsò twa tunene tulenga atu, bitanda byetu binene, ne byetu binene. . . tubiibaka binunu ne binunu, ne tusakidila bidimba ne bintu bikwabo, bidi bimweka anu mwomumwe, byônsò abi anu ditêtemba naka. Ncyêna ngamba aci bwa kupangakanangana nansha, ndi ngamba aci mbwa kwikala ne meeji matooke kumpala kwa Nzambi, Mwena Mukanda wûndi mwimane pabwîpî naawu mu dinda edi ewu. Nwamonu anyi? Byônsò abi mbilwe kumweka anu ditêtemba naka, bipeta anu byôbî bimwebimwe abi.

216 Mpindyewu twănji tumonaayibi cidi cyènzekà padi Nzambi (mu Dyende dîbà ne cikondo) ne baprofeta Bende kabayi batwibwe musinga to, bantu biikale anu kacya beeyemena teoloji, bansaserdose, cyena mangumba bu mutudi twêtù twenza leelu wa Ndaaya ewu emu. Mpindyewu, ne ntema yônsò. Bidi byônsò bilwa cibwejakaji. Bu Nyuma mulelela wa Nzambi mwikalemu, Yêyê neaciludikile anu mu Dîyi; ki ng'anu kaaba kamwepele cyanaana mu Dîyi to, Dîyi dyônsò mu kaabujima bwa cikondo cyônsò mu kaabujima. Nwamonu anyi?

217 Dituku dya Mpenta, Nyuma wakaciludikila buludi anu mu Dyôdi adi, mu Yowela 2.38. Nwamonu anyi? Dituku dya Luther, Yêyê wakaciludikila buludi anu mu Dyôdi adi; Wesley; mu nkwaka wa ndekeelu wa cyena Mpenta ewu; kadi eci ncikondo cikwabo, eci ndibiikila dya kupatuka dya Mukaji musela. Kaciyi cya kukaadi bidimu binunu bibidi ku Mpenta, anyi dyenzulula, anyi dyalukila to. Mpenta. . .

218 Nyuma Mwîmpè uvwa mu Luther, Nyuma Mwîmpè uvwa mu Wesley; n'Dîyi dya Nzambi diikale dilaabiibwa. Kadi Nyuma Mwîmpè wakaalukila kudi bantu baa cikondo aci ne baakabanga kupeta dyalujulula dya mapà. Bôbò kujandula ne, ku didilambula dyabo bôbò biine kudi Nzambi, Nyuma Mwîmpè wakaakwila mu myakulu kudibo. Bavwa batentekela babeedi byanza, ne babeedi bavwa basangala. Baakaja maja mu Nyuma. Nwamonu anyi? Civwa ncikondo cya Dilongolola diikale dyaluja ekeleeziya mu bulongame. Nenu bulongame bwa ndekeelu bwa ekeleeziya buvwa nditeeka dya mapà mu ekeleeziya; anu mwakateeka Luther dibingishiibwa, mwakateeka Wesley dijidiibwa amu, Mpenta wakateeka mapà. Kadi cyakenzabo ncinyi? Cilema cimwecimwe aci, anu mudi bufuki buleeje citembelu ku cicolakola cya blé amu, bôbò baakadivwija dingumba, ciine aci ciikale cibengangana ne Nzambi, cibengangane ne Nzambi.

219 Mpindyewu, tudi tusangana ne pavwa. . . Pashiishe padi bakungwiji baa bikolakola aba badisanga, badi bakwatakaja

mmwenenu wabo bôbò biine. Nenu nansha byôbì ne... Pavwa “cilumbu cipyacipywa cya bakokangana” eci, bu mudibo bacibiikila’s, pavwaci cipatuke mu Assemblées de Dieu, cyakenzabo ncinyi? Kabavwaku mwa kuCyakidila to. Nansha byôbì ne civwa Bulelela bwa bishi, dibatiiza dya mu Dîna dya Yesu Kilisto, bôbò bakaavwa bamane kwikala Nsangilu wa Bônsò. Muntu ukaavwa mumane kucyangata ku bukookeshi bwende, Nyuma ukaavwa mumane kubashiya. Cya bushuwa! Ne pashiishe eci kulwaci... Nkaadi mwakulaakule ne bamwe baa ku balombodi beenu baa batambe bwîmpè; badi bamba ne: “Ee, citudi twêtù bafwanyine kwenza mpindyewu ncinganyi?” S’mbafwanyine kudifwisha bôbò biine bundu. Paabo, s’mbamanye ne m’Bulelela; bôbò kabayi bamanye to, mbampofu mu nyuma ne bapangi pa bidi bitangila Bible. Ncyêna ngamba aci ne meeji mabi to, kadi, ndi ncyamba ne kaneemu kônsò. Bwalu, kakwena mwaba nansha umwepele mu Bible ukaadiku muntu nansha umwe mubatiijibwe basoka myânzù ayi ya ne, “Taatu, Mwânà, ne Nyuma Mwîmpè” to. Ne kacya kabaakakwataku naayi mudimu to too ne paanyima paa nsangilu wa bukwântendeleelu, ekeleeziya wa Katolike wa cyena Loomo. Kateshismu kaabo bôbò biine’s kadi kafila bujaadiki bwa cintu cimwecimwe aci. Ndîyì diswika dya Katolike! Kî ndilongesha dya Bible to, kadi ndîyì diswika dya Katolike. Nenu nwênù ba-Méthodistes nya’ nukaadi bapatule twenu tuteshismu ne bikwabo byônsò anu mwakapatulabo bôbò amu, biikale anu nwenda nuvulangana ku ndambu ku ndambu mu ciine aci. Kadi mpindyewu panukaadi nukafika ku Mpenta, ne numwagalaja amwe a ku mèyi maswika awu, nudi nushaala anu kacya nwakwataku.

²²⁰ Kadi mpindyewu ngudi dibiikila dya Mukaji musela, mpindyewu ngudi Bitampi Mwandamutekete bikangudiibwe, mpindyewu ngudi ne cya kukangudiibwa bintu byônsò nkòong bivwa balongolodi bashiye; nenu anu Maalaki 4 nkaayende ngudi mwa kwenza aci, bwalu bidi bikengela dibuulula dya difumina buludi kudi Nzambi diya kudi muntu nkaaya bwa kwenda nanku. Ncywa bushuwa! Kadyena mwa kulwa kudi kasumbu to, kacypa kadituku dyanji kulwa nanku to. Muntu umwepele! Ki cyakalaya Nzambi mu cikondo cya pabwîpî menemene ne dilwa bwa kwangata Mukaj’Ende musela, Eliyeza kampanda. Nwamonu anyi?

²²¹ Monaayi padi bansaserdose, bambi, ne bakwabo aba, padibo bapeta disonsodiibwa dyabo bôbò biine, ne balaabiibwe anu cya cya bushuwa eci. Davidi’s uvwa mulaabiibwe. Bible mmwambe nanku. Kadi, nudi numona’s, yêyê wakapicila ku mpokolo uvwa kayi yêyê to, wakaya ku kajila kavwa kakayi kôkò to. Yêyê wakalulamijila dilaabiibwa dyende adi ku luseke luvwa kaluyi lwôlô to, kudi bantu ne ku civwabo badyelela meeji, kudi baakapiteena, civwabo bôbò badyelela meeji, pamutu paa kajila

kaa cijila kaa Nzambi bwa kujandula civwa EMU MMUDI MUKALENGE WAMBA aci ne: “Eci ki cikondo bwa cyôci eci anyi? Ewu ki muvù bwa cyôci eci anyi? Eci ndiswa dya Nzambi anyi?”

²²² Nenukù yêyè mwikale muprofeta mulelela wa Nzambi, yêyè neânji kuya dyambedi kumpala kwa Nzambi, kwamba ne: “Taatu, ncinyi eci?” mwàkalwà Natana kwambila Davidi pashiishe amu.

Davidi wakamba ne: “Bidi bîmpè bwa mêmè kwikala musômbèle mu nzubu wa cêdres, kadi musheete wa cipungidi wa Nzambi wanyi mêmè mwikale mwinshi mwa ntenta emu anyi?”

²²³ Kadi tangilaayi Natanaela, wakamba ne: “Davidi, enza cyônsò cidi mu mwoyi webe aci, bwalu Nzambi udi neebe. Wêwê ewu’s udi lupanza lwela maanyi lwa Nzambi.”

²²⁴ Kadi bu muvwabi ne mmuprofeta, ne cilema cyende yêyè, kadi Nzambi mmwena dibanza kudi muprofeta Wende. Bufuku abu Yêyè wakamumwenekela, kwamba ne: “Nda wambile musadidi Wanyi Davidi ne, Ndi ngaanyisha mwa kuneemeka bukutu bwende, Ndi mumunange bwa ciine aci, bwalu yêyè mmuntu wa pa mwoyi Wanyi Mêmè, ne Ndi mumanye ne dîbà dyâkûmbanyi dya musheete Wanyi wa cipungidi kwikalawu mu mushindu awu, bwa kuteekiibwawu mu cintu kampanda, kadi Ndi anu... Kî mmuvù bwa bwalu abu kwenzekabu to. Mêmè nêndekelè bwa mwanende wa balume kucyenzaye, kadi Ncyakumulekela yêyè ucyenza to.”

²²⁵ Pa dîbà adi ki Natana ulwalwa ewu ne: “EMU MMUDI MUKALENGE WAMBA: Davidi, dibuulula dinene dyûdi mupete adi ndya mafi anu muvwa diwakapeta pawakambwisha musheete wa cipungidi adi.” (Uh-huh! Uh-huh! Nwamonu anyi?) “Kûcyênjiku to. Kuciteciku to! Kadi Nzambi wâmbi ne Yêyè neânzè bwa ‘mwaneebe wa balume kucyenzaye.’” Ki bwalu’s! Nwamonu anyi? S’ki bwalu mbwabu!

²²⁶ Davidi wakalaabiibwa bwa kwambaye cyôci aci bwalu ùvwa mwa kucimona kumpala, anu muvwa Abraham wenda ukebangana ne Cimenga kampanda pa buloba amu. Nudi bamanye, ùvwa wenda ukebangana naaCi mbwalu ùvwa ne cya kwikala ne mwoyi panwapa dituku kampanda, Abraham awu, mu ciine Cimenga aci. Ki kuyaye watwa eku watwa eku wenda uCikeba. Kadi anu mu mwaba umweumwe uwaye ukebela awu, civwa cisanganyiibwa anu kumutu kwende menemene mwine musangu awu, ne necyalukile mu Bukalenge bwa bidimu cinunu ne yêyè neasombe mu cyôci Cimenga aci. Kadi bu muvwaye muprofeta, ùvwa muteekiibwe ne musonsodiibwe, ùvwa mumanye ne kuvwa Cimenga mwaba kampanda, ne yêyè mwikale wenda uCikeba. Kadi, nudi numona’s, dibuulula mu kaabujima dya cyôci aci divwa dimusokoka. Kadivwa bwa cikondo cyende to. [Katupa kaa mukaba wa mêtî munda

mutupu—Muf.] . . . too ne ku Yone, kwakaCimonaye cipweka cyumukila kudi Nzambi mu Dyulu. Civwa ncyôci Cimenga aci.

227 Nwamonu's, bidi bikengela bwa kantu ne kantu kiikale mu movù waku. Udi ukuna blé webe mu movù wa bintu bitoloka ne . . . anyi mu movù wa mabeji apoopoka ne umukosa mu movù wa luuya udi ulonda. Nwamonu anyi? Bikengela abande apicile mu cicolakola, pashiishe abandile mu mwepu, ne mu cizubu, ne utungunuka ukabwela mu . . . Bikengela ciikale mu movù. Bufuki bwônsò budi bwenda mu ntungunukilu. Nyuma wa Nzambi ngutu mwenze bufuki, nenku byônsò ne Nzambi ne bufuki bidi byenda mu ntungunukilu. Bintu byônsò bitu biteekiibwe mu ntempelu abi bivwa citembelu cya byakamonaye mu Dyulu.

228 Panudi numona mucu udisuba uteeta bwa kwikala ne mwoyi, mbwena kwamba ne kudi mucu udi kawuyi ufwa to. Panudi numona muntu udisuba bwa kwikala ne mwoyi, cidi cileeja ne kudi tabernacle kampanda udi kayi ufwa to mwindile mu mwaba kampanda. "Ntenta wa pa buloba ewu yèyè munyanguke tukaadi ne mukwabo mwindile." Taatù wa mu Dyulu mwimpè awu wakangaanyishila bwa mêmè kuya paanyima paa ridô dîngà dituku bwa kucimona. Mbanganyi bakaadi bumvwe . . .? . . . Nwamonu anyi? Kutangila dyamwamwa dya ridô wa cikondo. Ki cyôci aci civwà anu cimwecimwe menemene anu mûndi nnuyiisha nwênù bônsò emu, ki bôbò bavwa biimane baba. Misuuka mwinshi mwa cyoshelu, yela lubila ne: "Too ne dîbà kaayi?" Kaciyi anu bwalu bukwatakaja to, muntu anu wetu wa meeji ewu ne: "Too ne dîbà kaayi, Mukalenge?" Nwamonu anyi? Patucidi tudyumvwa nanku mpindyewu apa, mùdi bidimu bitukaadi naabi ebi, bu mudi Mwaneetu Bill Dauch udi musômbe apa udi ne bidimu makumi citeetu ne bisatu ewu. Kudi cintu kampanda ciikale cijinga kwikala cyakabidi nsongaalume awu. Kudi cintu kampanda . . . Udi mufwanyine kufila cintu kana cyônsò. Mushindu mwine wûndi mufwanyine kujinga kwikala nanku's we. Mwaneetu Jack, ne bakwabo bônsò baa kutudi. Kwalukila, Mwaneetu Hierholzer, udi mwab'ewu ewu, kubwela mu bunsongaalume amu. Citudi tucijingila kucyenza ncinyi? Bwa kwikala mwânà mutekete ne kwikala kunyeemakana cyakabidi eku ne eku anyi? To, mukalenge! Bwalu tudi tudyumvwa ne tudi bafwanyine kwikala ne dîbà dyâbûngî dya kutumbisha Nzambi utudi banange ewu.

229 Nenku nwênù bânà beetu bananga, nyewu ndi ne Mukenji ewu mu dinda emu, kudi Buloba dyamwamwa dya musulu budibo babiikila ne mbwa kalolo kashidi. Mwômò amu netuMutumbishe munda mwa bikondo, ne munda mwa bikondo byônsò, ne Cyendelele. Tudi tudyumvwa nanku bwa cinyi? Bwalu ndondo udi munkaci mwa kubiikila Ndondo. Nenku bu mudiku ndondo mwikale anu ubiikila, bikengela kwikale Ndondo kampanda bwa kwandamuna ku dibiikila adi bwa

cyanaana kakuvwa mwa kwikala dibiikila nansha dimwe to. Kumpala kwa kwikalaku bufuki kampanda, bikengela kwānji kwikala dyambedi Mufuki bwa kufuka bwine bufuki abu, bwa cyanaana kakwena . . . Aci's cidi cileeja cileeji ciine cya ne bwòbù abu budiku.

²³⁰ Monaayi baakwidi aba, bônso bapatuke mu njila. Monaayi dilaabiibwa adi, dimpè, kakuvwa cintu cibi bwa dilaabiibwa adi to. Bya mwomumwe ne nwênù beena Mpenta, kadi tangilaayi numone kajila kanudi nwendelamu mpindyewu. Dituku's dikaadi dishintuluke kacya anu ku Mpenta, cintu kampanda cikwabo ciikale munkaci mwa kwenzeka. Bu ne kakuvwaku muprofeta mu ditunga amu to, nunku Davidi's mmubinge. Aci n'cya bushuwa. Kadi kuvwa Naatana mwimane mwaba awu, mushindikiibwe, muteekiibwe, mufidila bujaadiki kudi Nzambi ne mmuprofeta.

²³¹ Tangilaayi! Musheete wa cipungidi mu Bible utu misangu yônso anu cimfwanyi cya Dîyi bwetu twêtù, bwalu Dîyi dya Nzambi ndivwa munda mwa musheete wa cipungidi amu. N'enku civwa . . . Monaayi musheete wa cipungidi wakatwalabo awu, tangilaayi numone mwākacyēnzàbo. Kawakateekiibwa mu mwaba wawu wa ku cibangidilu mulongolola kudi Nzambi to. Mpindyewu, Nzambi mmwambe mu Mikenji emu ne wòwù uvwa ne cya . . . mushindu uvwabi ne cya kwenjiibwa, muvwa musheete wa cipungidi ewu ne cya kutentemunyiibwa, ne ùvwa ne cya kutentemunyiibwa kudi banganyi. Kadi Davidi yèyè, mu dilaabiibwa dyende adi . . .

²³² Wèwè mwaneetu wa balume, eci kacikupiciku to. Ne nwênù bânà beetu baa bakaji, nwênù badi baswe kwikala bayiishi bakaji ne bikwabo, eci kacinupiciku to. Dilaabiibwa dyenu nansha diikale dya bishi, bidi bikengela bwa nwênù kubwela mu mwaba udi Nzambi mulongolole. Dilaabiibwa dya Davidi divwa anu dimpè, kadi mu didyenza amu yèyè wakalwa musaluke kadi kusambuka ne mukalu. Cyakenzaye ncinyi? Wakasambuka mukalu. Pamutu paa kuteeka musheete wa cipungidi pa mwaba wawu wa ku cibangidilu awu, yèyè wakawambwila mu ditempu dipyadiipya kabiyi lwà kumutu kwa myoyi ya beena Lewi to. Musheete awu uvwa ne cya kwikala mwambwisha pa dikaaya dya beena Lewi, didi lwà kumutu kwa mwoyi. Dîyi kadyena mu meeji to, Didi mu mwoyi! "Kî mpa ditempu dipyadiipya to." Civwa ncinyi? Cintu . . . Civwa cileeja cintu kampanda cya cipyaciipya, cyàkenzà Davidi mwab'awu aci, cyakula bwa dingumba kana dyônso divwa mwa kwikalaku adi. Kabyena bikengela bwa Dîyi dya Nzambi kwikaladi ku . . . kwambwibwadi kudi bakulu batangidi baa ditunga anyi beepiskopo to, ne bakwabo, baa mu mangumba abu to. N'Dibatiiza dya Nyuma Mwimpè mu mwoyi wa muntu, kadi kî mmu nkwa kampanda wa bukwântèndeleele to. Nyuma

Mwîmpè mbubanyi bwa dinanga dya Nzambi mu myoyi ya balume ne bakaji bwa kutumikila. Nwamonu anyi?

²³³ Cîvwa mpa makaaya a bambi Bende, bambi Bende bavwa mbeena Lewi. Bavwa bawuteekela pa dikaaya dyabo dya dyabakaji ne bambula musheete wa cipungidi awu mushindu ewu, bwalu ùvwa lwà kumutu kwa mwoyi wabo. Bôbò mbavwa ne bujitu bwa Dîyì pa mwoyi wabo. Amen! Mpindyewu nwênù nudi ne bujitu bwa dingumba dyenu pa mwoyi wenu, bujitu bwa disangisha dyenu: bwa ne ní nwíkala mwa kwibaka *cikampanda*, anyi kwenza *cikansanga*, anyi kwenza cintu kampanda cikwabo. Bujitu bwa ne mbantu bakwabo bûngì kaayi banwikala mwa kupetela dingumba dyenu adi; pamutu paa bujitu bwa Dîyì dya Mukalenge, bwa bantu abu kumonabu Dîyì dya Nzambi nkaayaadi kabayi mwa kumonaku cintu cikwabo nansha cimwe to. Kadi nyawu nukaadi baDiteeke mu ditempu dipyadipya patudi twakulangana apa. Nwamonu anyi? MbaDyâmbwile mwab'ewu too ne mu nsangilu mene wa bukwântèndeleele, pa makaaya's. Ncyêna muswe kulwa mudyudyanganyi to, kadi Nzambi asweku ankwacishe bwa mpindyewu. Ndi mêmè anu nnwambila Bulelela cyanaana.

²³⁴ Mpindyewu, diikale dipete bwenzeji bwa twitabaayi ne bwa nsangilu ya bukwântèndeleele ayi, Dîyì, Dîyì dilelela dya muvù wa cikondo aci divwa dilenguludiibwe, bwalu bavwa ne disaluka dipite bûngì. Kadi Davidi, mfumu mwela maanyi awu. . . Yêyè uvwa mfumu, kadi ùvwa *mfumu* mwela maanyi. Wêwè udi wamba ne: “Mêmè ndi mwambi, mwela maanyi.” Nanku shaala mwambi, kwikadi wâteeta kwikala muprofeta to. Nwamonu anyi? Pawikala mutangadiki, shaala mutangadiki.

²³⁵ Vulukaayi Uziya, mu matuku a Yeshaayi, mfumu wa citende awu. . . muprofeta wa citende awu. Uziya uvwa muntu munene, muntu mwela maanyi, Nzambi uvwa mumubeneshe; kuðibeneshaye yêyè mwine. Eyowa, nkaavwa munuyiisheku pa cyôci aci mwaba ewu musangu kampanda. Nanku dîngà dituku yêyè kudyelaye muulu kudyakidila mu mushindu wa ufika ne ku didyambidila ne ùvwa anu mwa kwangata mudimu wa mwakwidi, nanku kwangataye mudilu ne kubwelaye kumpala kwa Mukalenge. Kadi. . . Baakwidi abu kumwambilabo ne: “Kwenji nanku to, Uziya!” Kadi kudyelaye muulu's. Muprofeta kayiku ne cya dimwambila to. Baakwidi mbavwa bamanye mulongo wabo, bôbò mbavwa balame mulongo wabo awu, kwambaye ne: “Awu mulongo kî ngwebe to, Uziya. Kwenji nanku to!”

²³⁶ Ee, yêyè kubambila ne “Bwikilaayi mukana!” Kadi kubwelaye ne—ne mudilu, bwa kulambulaye, wangata mudimu wa mwakwidi; yêyè uvwa mfumu mwela maanyi, kayi mwakwidi to. Kadi baakwidi abu bavwa bateeta bwa kumwambila ne: “Wêwè udi mfumu mulenga wa dikema, udi mwela maanyi,

Nzambi's mmutubeneshile ku wêwè eku. Kadi wêwè udi mfumu, kwèna mwakwidi to.”

237 Nunku kabivwa bikengela bwa nwênù bampaasata kwambila muprofeta cya dyenzaye, anyi nwênù batangadiki nwambila mpaasata to. Nwamonu's, muntu ne muntu udi ne wende mudimu piikalabi ne wôwò awu mmumanyiibwe bimpè menemene.

238 Pa nanku yêyè kubwelaye ne mudilu awu, kadi kutuuciikaye ne nsudi e kufwaye.

239 Mpindyewu ki Davidi nyêyè ewu, mfumu. Davidi nyewu uteeta bwa kwenza cintu cyôci cimwecimwe aci mwaba ewu. Kudyangacilaye yêyè mwine bujitu abu. “Ee, aci's ncilenga, bikengela anu twêtù kuya.” Ûkènzakana ùtâtangila bantu abu: “Udi wamba bishi, kapiteena? Wêwè's udi ne binunu dikumi.”

240 “Butumbi kudi Nzambi's we, Davidi, ngũmvù Nyuma.” Kaa, yêyè's uvwa muumvwe! S'ncyà bushuwa ne yêyè uvwa muMuumvwe. “Udi wêwè wela meeji bishi, Davidi? Udi muMuumvwe anyi?”

241 “Butumbi kudi Nzambi's we, Yêyè's udi pambidi paanyi pônso apa! Twânjibi kucikenketa bwa tumonebi nî ncyà bushuwa, tumonebi. Musheete wa cipungidi udi ne cya kwikala penyi?”

242 “S'nkutudi twêtù! S'ùdi ne cya kwikala munkaci mwetu twêtù.”

243 “Bivwa bikengela twêtù kukonka nganyi? Bushuwa's, musheete wa cipungidi awu.” S'ncintu anu cimwecimwe aci cya ne buloba abu bûvwà bwa—bwa Izaleela pamutu paa kwikalabu bwa beena Peleshete. Ncyà bushuwa, mbya kwôkò aku. “Kabidi mêmè paanyi, bu mûndi ngumvwa dilaabiibwa's.”

244 Baakapiteena baa nkama abu, disangisha dijima adi ne: “Butumbi kudi Nzambi's we!” Kutuutabo bikashi byakabyaka, kwelabo mbila, kujabo maja, ne kutupikabo muulu ne panshi.

245 Bavwa ne Nyuma's, kadi nudi nwela meeji ne Taatù uvwaku wela meeji kaayi? “Mushindu mwine wûndi Mêmè ewu mutume Natana, muprofeta udi pa buloba wawa's we! Bôbò's mbamanye cidi cikengela kwenza, ne Davidi's mmumanye, kadi mpindyewu yêyè nyawu ukaadi musaluke yônso ne musambuke too ne mukalu wende mwine ne mukafike too ne ku dyenza dya *cikampanda*.”

246 Eyo, monaayi ne, “kuWambwila pa makaaya” ki civwa ndongamu wa ku cibangidilu wa Nzambi. Kudi bintu bitaanu bidi *ne cya* kwikala. Ndi muswe bwa nwênù kubifunda, panwikala . . . Ndi nnumona munkaci mwa kufunda's.

Nunku nyewu tukaadi ne tusunsa makumi abidi, tusunsa makumi abidi ne bya mu njila paanyima paa dîbà dikumi, pa nanku nênditâcîshè bwa kujikija patwamba kufika pa dîbà

dikumuni ne umwe, kwòkò mushindu. Nèndwìjakajè nye lubilu ne mwanyi mwònsò.

Muntu nansha yèyè mwa kwikala ne meeji matooke a bishi mu dikwacila dya Nzambi mudimu, nansha mwikale ne meeji matoke a bishi, nansha mwikale ne dilaabiibwa búngì bishi, nansha mwikale Presbytérien, Baptiste, mwena Mpenta wa bishi; nansha wèwè mwikale mwepiskopo, mulami, cyònsò cyùdì aci, mpaasata, mutangadiki, muprofeta, cyònsò cidi cifwanyine kwikalaku aci; kudi bintu bìdì ne cya kwikala bitaanu bìdì ne cya kutangidiibwa dyambedi. Nansha dilaabiibwa diikale búngì bishi, nansha dimweke dilenga dya bishi, nansha bantu beela mbila ya bishi, byònsò bìdì Nyuma wenza abi, kudi cintu cidi *ne cya* kwenjiibwa.

²⁴⁷ Mpindyewu, bânà beetu wanyi, panucidi anu nulongolola dibèji dyenu apu, nudiku mwa kuumvwa mpindyewu ne mbwa cinyi anyi? Mpindyewu vulukaayi ne, nukaadi bònsò beelele meeji, ne nukaadi balongeshiibwe munkaci mwenu, kabiya ne. . . (nwamonu's, ndi ngaakula mu ditunga dijima) . . . ne ncitu mwitabuujè dyakula dya mu myakulu to. Mémè ntu ngiitabuujà dyakula dya mu myakulu, kadi udi anu mwa kwakula mu myakulu peebe kuyi anu ne Nyuma Mwimpè to. Kolinto wa Kumpala 13, udi wamba ne: "Nansha mémè ngaakula mu myakulu ya bantu ne ya banjelo, ncidi anu cintu cyanaana." Nwamonu anyi? Aci's ndilaabiibwa dya Nyuma Mwimpè, ne dyòdì kadyena ne bwalu bwa dyanza ne musuuka udi munda mwebe to. Udi mwa kwikala wakula mu myakulu kadi uvila Dìyì. Mémè ewu nkaadiku mucimonemone cyenzeka, ne nwènù nutu anu peenu nucimona. Nwamonu anyi? Muntu mukaji's udi mwa kuyiisha Evanjeeliyo kadi. . . Nwamonu anyi? Badi mwa kwenza byònsò. . . Badi bakosa nsuki yabo, kadi batungunuke anu ne kwela kwa mbila ne kwakula kwa mu myakulu ne bikwabo byònsò. Uh-huh, aci's ncyà bushuwa bwa menemene. Bikengela wèwè kuditeeka mu njila wa Bulelela bwa Dìyì.

²⁴⁸ Monaayi! Muntu nansha yèyè mwa kwikala ne meeji matooke a bishi, nansha Nzambi mwa kukwata nende mudimu munene wa bishi, nansha cyònsò cidiye aci, udi ne cya kwikala eci nunku: udi ne cya kwikala. . . Cintu cidiye wamba aci cidi ne cya kwikala pa dîbà diteeka kudi Bible. Muntu kampanda wamba ne: "Ee, Mòsà kale wawa." Ndi mumanye cyàkenzà Mòsà, kadi kî ncidi Nzambi munkaci mwa kwenza leelu ewu to. "Ee, kuntu kwaka, kukaadi bidimu makumi asatu, Luther wakamba. . ." Aci ncifwanyine kwikala anu cimpè, kadi kî ncidiYe munkaci mwa kwenza leelu ewu to. "Ee, kukaadi bidimu makumi anaayi, Mpenta wakamata." Kadi kî ncidiYe munkaci mwa kwenza leelu ewu to. Nwamonu anyi? Cidi ne cya kwikala pa dîbà diteeka.

²⁴⁹ Cidi ne cya kwikala bilondeshile Mifundu. Cidi ne cya kwikala mu movù, ncintu ciibìdì aci. Ciisàtù, cidi ne cya

kwikala bilondeshile mushindu udi Dîyi dya Nzambi dyambe ne neciikale awu.

²⁵⁰ Kadi wêwè udi wamba ne: “Butumbi kudi Nzambi’s we! Nyuma Mwîmpè mmutuulukile, aleluuyah, menemene anu mwakatuulukilanganaYe mu Dituku dya Mpenta amu.” Kadi’s mbifwanyine kwikala bishiilangane leelu. Yêyè’s wakatuulukila pende Davidi, kî mmwômò anyi? Bushuwa’s, Wakamutuulukila. Wakatuulukila Uziya, kadi’s civwa cya kacyi mu cyôci to! Nwamonu’s, bikengela wêwè kuya mu ndondo kupita apu mpindyewu. Nwamonu anyi? Bikengela wêwè kuya mu ndondo kupita apu. Mpindyewu, kanudyûmvù batacishiibwe ku mwoyi to, ikalaayi anu—anu mu kaneemu.

²⁵¹ Nenku monaayi, cidi kabidi ne cya kulwila kudi muntu wa ku disungula dya Nzambi. Kacyi disungula dya cyena mangumba to, kacyi disungula dya bantu to, kadi bilondeshile disungula dya Nzambi. Nenku piikalabi ne mmukenji wa kudi Nzambi, wa ku dibuulula dinene dya kudi Nzambi, didi ne cya kulwa kudi muprofeta Wende. Mpindyewu, nwênù baswe Mufundu wa cyôci aci, ng’Amosa 3.7. Nwamonu anyi? Mpindyewu, bidi ne cya kwikala nanku.

²⁵² Kudi bintu bitaanu bìdici ne cya kwikala: Cidi ne cya kwikala mu movù waci. Cidi ne cya kwikala pa cikondo cidi Nzambi mwambe ne necyenzeke. Cidi ne cya kwikala cifunda mu Dîyi dya Nzambi. Cidi ne cya kwikala mu movù wa cikondo cya Nzambi, nwamonu’s. Ne cidi ne cya kwikala ku disungula dya Nzambi.

²⁵³ Ne Nzambi katu ne dijinga dya nî nganyi nî nganyi wa kutudi bwa kuumvwijaye Dîyi Dyende nansha, Nzambi m’Mudyumvwijidi wa Yêyè Mwine. Yêyè kêna dijinga ne maaseminere etu twêtù aa to. Kêna dijinga ne lungenyi lwetu to, ndukutukutu. Nwamonu anyi? Eva wapaketa aci, uh-huh, kadi wapakangila Dyumvwija ku lungenyi lwende lwine alu.

²⁵⁴ Wêwè udi wamba ne: “Kaa, mulumyana, muntu wawa’s ngwa meeji matwe.” Ee, aci kaciyena cyumvwija cintu nansha cimwe to. Cya bushuwa. Aakaba’s uvwa muntu wa meeji matwe. Beelehasa’s uvwa muntu wa meeji matwe. Sataana’s uvwa mutambe kutalama ne kubabidila, mudimuke, kakuyiku nansha umwe wa kunudi aku mufwanyine kumukandameena to, nansha umwe.

²⁵⁵ Mêmè ncyêna ngeeyemena...nansha umwe...lungenyi nansha lumwe to, ndi mêmè ngeeyemena anu Nzambi. Nwamonu anyi? Nzambi udi bishi? Yêyè udi Dîyi. Nenku pa dîbà adi Nzambi udi umvwija Dîyi Dyende Yêyè mwine bishi? Teeleejaayaaku ne ntema mpindyewu, bintu ebi kabinupici to. Nzambi udi umvwija Dîyi Dyende Yêyè mwine bishi? Pa kwenza ne Dyôdi dyenzeke, kabiyi anu *dimwepele* apa to, kadi *dyônsò* adi bwa movù awu.

²⁵⁶ Kî nkwamba ne: “Noa patukaaku uye kayiisha, wêwê udi musonsodiibwe” to, kadi: “Ibaka bwâtu, wêlêku biibi, ubulongolole mushindu *kampanda*, ne mushindu *kansanga*.” Kadi bu yêyê mwa kwikala mukateeke ciibi lwâ kuulu ku lusongo pamutu paa muntaku? Kadi bu yêyê mwa kwikala mukateeke dididiishi muntaku, ciibi lwâ kuulu ku lusongo? Nwamonu anyi? Bidi bikengela bileejiibwe bilondeshile cikondo aci, bwalu mmushindu awu menemene wikalâ Nzambi ne cya kukwata naaci mudimu. Cidi ne cya kwikala mushindu awu, ne cidi ne cya kulwa ku disonsodiibwa.

²⁵⁷ Mvwa muumvwe kabambaayi mukwabo wamba musangu *kampanda*, wamba ne: “Ndi ngiitabuujja ne muntu awu utu usambidila babeedi, ndi ngiitabuujja ne mbîmpè. Kadi bwa ne yêyê mmuprofeta,” yêyê ne, “mêmè ndi ngiitabuujja ne mmuprofeta wa Nzambi; kadi bwa ne mmulongeshi, mona’s, yêyê’s mmwena ‘Yesu Nkaayende.’” Cidi . . . Udi mufwanyine kumubiikila ne mmuntu wa mushindu kaayi mwine awu? S’mmuntu udi kayi mumanye cidiye wamba’s.

²⁵⁸ Mwaku mwine *muprofeta* udi wumvwija ne “yêyê awu mmubuuludi wa Diyî dya Nzambi,” dyumvwija dilwalwa anu kudi yêyê awu nkaayende. Nenku ki bwa cinyi leelu ewu bidi bitukengela bikole muntu munene wa nanku awu udi ne cya kutumiibwa kutudi mu mmwenekelu wa muprofeta Eliya, bwalu neciikale dibuulula dya Nzambi dimanyishiibwe kutudi ku dishindika, dileeja ne ndituku ne dîbâ ne muvù mudi Nzambi mulaye ne necyenzeke. Nenku, vulukaayi ne, nebamwambe mambavi; ki mutubi misangu yônsò, ne ki mwikalabi misangu yônsò. Mubengiibwe, anu mwikalabi ne cizubu neciikale mwa kudikoka . . . Dyambedi nebânji kumwitaba, bwalu cizubu cidi cishaala cikwate blé anu too ne padiye upatuka udileeja kudi dîbâ. Mpenta neabwikile Mukenji dileji dyende, kuWupeesha ciibi cyunzulula anu too ne paalwaWu kutangalaka, nenku pashiishe cizubu necidikoke, ne blé neashaale mwanyika mu Bwikadi bwa Mwânâ, nwamonu’s, bwa kubobaye.

²⁵⁹ Kakwakwikalaku dingumba nansha dimwe to, nuvulukaayi anu nanku. Mwaneetu Jack udi apa ewu mmulongi wa maalu malonda, bààbûngî baa kunudi mwab’ewu ki cidibo. Kî nkwanji kwenzekaku ditabuluja nansha dimwe kakuyiku dingumba dibangilepu mu bidimu bitwe ku bisatu paanyima paa ditabuluja adi to. Ncya bushuwa anyi? Kadi nkwaka munene wa cishima wa Nzambi wa mu matuku a ndekeelu aa ewu, ukaadi muye too ne ku bidimu makumi abidi; kadi nyêyê ewu mu ntanta wa mùliyô mujima wa kilomeeta kule ne dingumba, wenda uya anu kule dîbâ dyônsò; cizubu cidi munkaci mwa kudikoka, kakuyi dyelangana dya mu diboko, kakuyi kantu nansha kamwe ne Cyôci aci to. Nwamonu anyi? Cidi misangu yônsò anu cidikoka cyumukaKu. Kacyena mwa kwikalaku kabidi to, cikaadi m’blé mpindyewu. Kadi twêtù tudi

anu babishi beetu baa menemene aba. Uh-huh. Ncya bushuwa. Bikengela twikale baanyika mu Bwikadi bwa Mwànà bwa kuvwijibwa bapole, ki cyònsò cìdiku ncyòcì aci. Babishi anu beetu baa menemene aba; katuyiku ne ndondo, ne bunsantu, cintu civwa cikengela twètù kwikala naaci munkaci mwetu aci to, bwa kumanya ne Nyuma wa Nzambi udi ne mwoyi awu, udi ukwata mudimu mu Dìyi Dyende ne mucikàle utuleeja maalu, ne leelu.

²⁶⁰ Tudi ne batentudi baa mashimi biikale bajuuka. Ciine aci mbwa kwenza cinyi? Bwa kuseeswishangana. Bible mmwambe ne nebajuuke. “Anu muvwa Yambele ne Yane bakandameene Mòsà anu, ki mwikala kabidi bòbò aba mu matuku a ndekeelu.” Nwamonu anyi? Badi benza cintu cimwecimwe aci, balwa kadi kuCitentula, anu menemene’s. Nwamonu anyi? Nwadimukaayi! Tangilaayi Dilongesha dya Bible. Tangilaayi mukenji udi ulonda bimanyinu abi! Cicidi anu cilongelu cyòcì cimwecimwe cya kale cya mukenji aci anyi? Cìpwäyi mwoyi!

²⁶¹ Nzambi wakatuma bishima ne bimanyinu bwa kukoka ntema ya cisamba Cyende. Paakalwa Yesu mwikale anu wondopa babeedi ne bikwabo, s’ki cyakenza kabidi baprofeta. Bavwa badyambidila ne: “Kaa, butumbi’s we, Yêyè ulwalwa, Neikale Mufaalesa. Neikale Musadoka.”

²⁶² Kadi Yêyè wakamba ne: “Nwênù lukongo lwa nyoka ne nyoka ya ntooka.” Yêyè ne: “Nudi baa tatwênù dyabulu, byenzedi byende mbinudi bafwanyine kwenza.” Yêyè ne: “Nwênù kanuyi byende mubidi wa Mwànà wa muntu, ne kanuyi banwe Mashi Ende to, kakwena Mwoyi munda mwenu to.” Yêyè kaaKaCyumvwija to. Kabivwa bikengela bwa kuCyumvwijaYe to. Aleluuyah. Aci civwa mbwa muvù mukwabo. Uh-huh. Yêyè uvwa wamba anu civwa cikengela kwambaYe ne: “Ntu ngenza misangu yònsò anu cidì cisankisha Taatù, ne ciine aci nkulama kwa Dìyi Dyende. Mêmè nciyi ncyenza to, mwoyi Wanyi ne byenzedi Byanyi byòbì kabiyi bikumbanangana ne Dìyi Dyende diNdi ne cya kwenza adi to, pa dîbà adi kanuNgiitabuuji to, Ncyêna Yêyè to; kadi byòbì bikumbanangana, pa dîbà adi itabuujaayi byenzedi panwikala kanuyi mwa kungiitabuuja Mêmè,” mwakambaYe.

²⁶³ Monaayaaku mpindyewu bintu bìdì ne cya kwikala bìdì *ne cya* kwenjiiibwa ebi.

²⁶⁴ Mpindyewu, monaayi, Nzambi kavwa mubabuulwile cintu aci ku mushindu Wende mulongolola to, Ûvwa mucibuulwile ku disonsodiibwa, kadi civwa mmu kajila kavwa kakayi kòkò to. Nwamonu’s, disonsodiibwa nedyëndè anu bilenga, kadi dyòdì diikale mu kajila kadi kakayi kòkò to, nediludikiibwe bibi. Byenze bu mùdì mwa kwangata dizaji ne kudiludikila buludi mu cintu ciludikila, nedilonde njila wadi too ne ku cintu ciludikila aci, kadi lupeepele lwòlò lutuute ludi mwa

kudipambula. Mpindyewu, mu mashinyi ebe a kadyendelandela awu, wenda upweka ne njila mu lubilu lwa kilomeeta makumi citeema ne yisambombo, lukama ne dikumi ne ùmwè ku dîbà kadi lupeepele kukutuutalu, udi mwa kujaalamija ndundu yebe ya mashinyi, kuàkùpa kuàluja cyakabidi mu njila. Kadi kwèna mwa kwaluja dizaji mu njila to; kakwena mwaba awu cintu nansha cimwe cya kuludika naaci yadi ndundu to, didi dipangila cintu ciludikila aci. Nwamonu's, didi ne cya kwenza lwendu dyenda diya anu mu kajila kaadi kaa ku cibangidilu aku.

265 Ki mudibi kabidi ne Diyì dya Nzambi didi ne cya kwenza lwendu dyenda dilonda anu kajila kaaDi kaa ku cibangidilu aku. Kaalupeepele nansha kamwe kakaakutuuta ne kuDipambula to; kaadingumba nansha kamwe, anyi cintu nansha cimwe, kacyakuDipambula to; kaadikengeshiibwa nansha kamwe kakaakuDipambula to: Dyôdi ndiludikila pa kaaba kampanda! NeDikalengè anu kulenga, kaaba aku. Ne pashiishe Nzambi, padiDi dikalenga kaab'aku, Nzambi neaDishindike ne: "Zwîng!" Uh-huh, anu menemene cyakambaYe ne Neènzè. S'ki cyôci eci mu Mifundu, eci ne: "EMU MMUDI MUKALENGE WAMBA: 'Necyenzeke!'" S'ki cyôci eci. Nwamonu anyi? S'ki bwalu mbwôbù abu.

266 Mpindyewu, Nzambi kavwa mucibuulwile mu mushindu Wende mulongolola to. Pa nanku bôbò baakaya kacyzenza kabiyi ku Diyì Dyende, ne kabiyi mu muvù to, bya mwomumwe anu ne mudibo babyènzè mpindyewu ewu emu. Pàtù bantu, nansha bôbò ne meeji matooke a bishi, bateeteteete bwa kuMwenzela mudimu pambelu paa mushindu Wende mulongolola, batu misangu yônsò anu babinyangakaja. Bu mudi Baalama, Baalama uvwa udyambidila ne ùvwa ukwacila Nzambi mudimu.

267 Nudi nwela meeji ne Nzambi utu ushima anyi? Nzambi kacya utu ushintulula mmwenenu Wende anyi? Ee, bantu leelu ewu badi benza maalù bu ne Yèyè utu ushintulula mmwenenu. PadiYe mwambe ne bakaji kabiikadi bakosa nsuki yabo apu, badi bôbò bamba ne: "Twêtù tudi mwa kuyikosa, Docteur *Kampanda* mmwambe ne tudi mwa kuyikosa. Mwaneetu *Kampanda* mmwambe ne wèwè ewu utu anu ne mmwenenu mutambe kubumbakana be." Uh-huh, uh-huh. Nwamonu anyi?

268 "Ee, *cikampanda* cidi mwa kwenzeka anyi? *Cikansanga* cidi mwa kwenzeka anyi?"

269 "Eyowa, uh-huh, s'mmudi *Kampanda* mwambe."

270 Nzambi katu ushintulula mmwenenu Wende nansha.

271 Nudi nwitabuuja ne Baalama uvwa muprofeta anyi? Bible mmwambe ne ki civwaye. Nudi nwitabuuja ne yèyè uvwa muprofeta anyi? Mpindyewu, vulukaayi ne, Baalaka wakalwa kudiye e kwamba ne: "Pweka ukeele cisamba eci mulawu, bwalu badi pa buloba bujima. Kabeena nansha dingumba to, nansha

ditunga to, badi anu musùmbà mutangalakangane cyanaana; kadi twètù tudi bantu baa myânzù mitumbuke baa mu ditunga edi. Mpindyewu pwekaaku kuntu kwaka ukeele cisamba aci mulawu, nenku mêmè nênkufutè bwa bwalu abu.”

272 Ki Baalama kwenza anu menemene mutubi bikengela bwa muprofeta kwenzaye amu, kwambaye ne: “Ncyakuya nansha. Anji shaala wêwè anu mwindile kaaba aka, bufuku ebu, mmonebi cidi Nzambi wamba bwa kwenza aci.”

273 Pa nanku kubwelaye, kwambaye ne: “Mukalenge, nyewu kudi bantu kampanda balwe naanyi mwab’ewu, baswe bwa mêmè kupweka kuya keela cisamba cikwabo mulawu kuntu kwaka.” Yèyè ne: “Cyûdi Wêwè muswe bwa mêmè kwenza pa bwalu abu ncinyi?”

274 Nzambi kwambaye ne: “Kuyi to, bwalu ncisamba Cyanyi!”

275 Baalama kupatuka, kwambaye ne: “Alukilaayi kumbelu. Ncyêna mwa kuya neenu to, Nzambi wangambidi ne ncìcyênjì to.” Mpindiewu, ki Dîyì dya ku cibangidilu dya Nzambi ndyôdi adi ne: “Kuyi to!”

276 Ee, ki bôbò kwalukilabo, kwambabo ne: “Udi mumanye’s, mwepiskopo webe kî mmuswe kuteeleja to.”

277 “Ee,” mwakamba mfumu, “nênwămbilè citutu twenza. Cidiye naaci dijinga nndambu wa mfranga, ngeela meeji ne ki cidi mwa kumutwishisha. Anyi pâmwâpa nêmmuvwijè mukulu mutangidi wa ditunga dijima, pâmwâpa nêmmupetèlè cintu kampanda cya cinene cya dyenzaye. Ndi mufwanyine kumuvwija mwepiskopo, kanwena bamanye cîndi mufwanyine kwenza to. Monaayi, ndi ndwambila cîngenzà. Nwênù bakwetu aba kanwena nansha ne kalaasa kiine kalonga kakumbane bwa kumutwishisha to; wenu ngaakwilu wa ne *his* ne *hain’t*, ne *tote* ne *fetch* ne *carry* awu, kêna mu yèyè to. Yèyè kî mmufwanyineku kunuteeleja nwênù to, netutume musùmbà wa bantu baa balonge tulaasa twa menemene kuntwaku, baa myânzù mitambe kutumbuka abu.”

278 Kupwekabo e kuya kuntwaku, kwambabo ne: “Docteur Baalama, *Docteur* Baalama, wetwawu. Ndi mukutwadile myoyi ya kudi mfumu.”

279 “Beetwabu mu dinda emu, bânà beetu.” Nwamonu anyi?

280 “Mpindyewu, Docteur Baalama...” Nenku, kaa, myaku miine’s, mushindu mwine wakalwayi cya bushuwa kupongoloka’s we. Ki bôbò ne: “Mpindyewu, mfumu wămbi ne neakubandishe cipidi, ne kabidi yèyè mwine neakupeeshe luumu lunene. Kabidi, udi mumanye’s, bāvwa bakupeeshe anu tufranga bûngì *kampanda* bwa wêwè kwangata bujitu abu, kadi mfumu yèyè mmwambe ne neavudije mfranga ayi misangu isatu, neayivudije misangu yinaayi, bu wêwè anu mwa kubwangata.” Dibà adi, Baalama mwaba awu,

byanza kubangabi kumusansakana's. Kupetaye cingenyinyeni cikutakane kadi ki kusalukaye mu meeji.

²⁸¹ Mpindyewu, vulukaayi ne, kusokaye Nzambi mwimanyine pa cyôci aci, mulaabiibwe, kadi kusakaye Nzambi kule kwa menemene ne ndongamu wa ku cibangidilu. Nenku's ki cyôci aci menemene cidi Mpenta mwenze! Bwa kwikala bamanyike, nwênù ba-Unitaires, nwênù ba-Trinitaires, bwa dimanyika nwênù kudivwija mangumba bwa kupanganangana, nwênù kudivwija malongolodi ne kufwa! Kanwadyakujuukulukaku kabidi to. Kadi, nudi numona's, bivwa bikengela nwênù kwikala bashaale ne cya Nzambi cya ku cibangidil-...Yèyè wakanupatula mu Assemblée amu's mbwa kunuvwija cisamba kampanda, kadi nwênù nwadivwiji bulongolodi ne nwalukidi mu bilushi byôbi bimwebimwe munukaavwa (mfwilaayi luse) bapatuke amu, cintakanyi cyôci cimwecimwe munukaavwa bapatuke amu: "Anu mudi mbwa walukila ku bilushi byende ne mudi ngulube walukila ku bitoci byende amu." Nwamfwilaayiku luse bwa pândi mwambe aci, mfwilaayiku luse, aci kî ncîmpè bwa pa cibumba cya ku cyambilu eci to. Nwamonu anyi? Aci kaayi ndi mucyâmbè anu mu musunya. Monaayi mpindyewu. . . ki cyôci aci cîndi njinga kwamba, kulûka. Bivwa bikengela mêmè kwikala mucyâmbè mushindu awu. Mwaku awu uwva pa wôwò, kadi mwikale anu muwângâte bibi. Nwamonu anyi? Mvwa muwângâte anu bîmpè, kadi muumvwike bibi ku maci, nudi bamanye's. Bilushi: "Anu mudi mbwa walukila ku bilushi byende amu."

²⁸² Piikalabi ne Assemblées de Dieu, Nsangilu wa Bônso awu, ùvwa muvwije Mpenta bulongolodi anu kwine kuntwadijilu kwaka ne mubabweje mu cyôci aci mu mushindu wa kabayiku mwa kwitaba mabuulula, kanwena bamanye ne, nwênù ba-Unitaires aba, nudi benze cintu cyôci cimwecimwe aci anyi? Mmunyi munuvwaku mwa kwakidila Diyîisha dya "dimiinu dya nyoka, dikubiibwa dya Cyendelele," ne bintu bikwabo bidi bipatuke ebi? Nudi batambe kudyenza bulongolodi bwa ndendende mu mushindu wa kanuyiku nansha mwa kuCiitaba bwa cibwele mu cyenu ciibi to, uh-huh, uh-huh, cintu cimwecimwe cyakenza Baalama aci. Kadi Nzambi kaakashintululaku mmwenenu Wende nansha.

²⁸³ Pa nanku Baalama kuyaye kuntwaku e kwambaye ne: "Mukalenge, tangilaaku mpindyewu, s'nyewu ndi cya bushuwa mupeteleku paa kudiila wa cyula bwa nshaala paanyi kampanda. S'Udi anu mumanye mûndi mêmè ewu anu muntu cyanaana, kadi nyewu ngaapetediku paa kudiila wa cyula bwa nshaala paanyi kampanda. Udiku Peebe wamba bishi bwa ciine aci mpindyewu, Mukalenge?" Mpindyewu, kabivwa bikengelaku yèyè kwikala mwambe aci to! Yèyè's uvwa mumanye anu menemene civwa Nzambi mwambe bwa kwenza!

284 Ki mudi kabidi muntu ne muntu wa kunudi udi mubatijiibwe mu dîna dya “Taatu, Mwâna, Nyuma Mwîmpè” mumanye, pa byena-bwalu bikwabo bya Bible bidi ne cya kwikala mu dituku edi ebi, s’udi anu mumanye cya dyenza pa Cyôci aci ne, nkuCiitaba’s! Paudi umona Nzambi ushindika patooke tòò ne “Cidi Bulelela,” awu’s n’Nzambi umvwija Dîyi Dyende Yêyè mwine. Kadi wêwè neucyènzè anyi? To, bulongolodi bwenu abu kabwakukulekela ucyenza to!

285 Bââbûngî baa ku bambi mu Tucson amu bàdî bàtèèlejà mu dinda emu abu. Mwaneetu Gilmore, ncyèna neebe cilumbu to; Mwaneetu Brock, Assemblée wa Kumpala, ne ekeleeziya wa Bulunda. Nwênù balumyana, mémè’s mvwa muntwamu mu cikondo cyônsò aci, kanuyiku nansha bafwanyine kungiitabila bwa mémè kubwela to. Mémè...Cya bushuwa, kanuvwaku mwa kungiitabila to, kanwena mwa kungiitabila kadi kushaala anu cinudi aci to. Kanwena mwa kwitaba dibuulula to, bwalu nukaadi bavwijiiibwe dingumba. Kadi teejeaayi, anu mwakashiibwa Uza bwalu yêyè uvwa mwinshi mwa disonsodiibwa dya mafi adi amu, ki mudi kabidi beena Kilisto balelela bââbûngî munkaci mwa kujimija dilabula dyabo mu mangumba mafwe a kale awu, bwalu badi batwa cyanza cyabo pa Musheete wa cipungidi paabo kabayi bateekiibwe bwa kucyenza. Mpindyewu nudi mwa kuCiitabuuja, anyi kubenga kuCiitabuuja, aci ncinutangile anu nwênù. Nzambi ngudi Mulumbulwishi wenu. Kacya Nzambi katuku muumushe Dîyi Dyende to. CyakambaYe kuntwadijilu aci, ki cidiYe wamba musangu wônsò.

286 Yêyè wakambila Baalama ne: “Kuyi to!”

287 Kadi pasiishe Baalama kwalukila, kwamba ne: “Kadi Mukalenge, ndiku mwa kuya anyi’s?”

288 Mpindyewu tangilaayi! Nzambi kwamba ne: “Ndaaku!” Mpindyewu, Yêyè wakamupa dyanyisha dya kuya. Adi ndiswa dya Nzambi dya cimfulààmwòyi, kadi kî ndiswa dya Nzambi dya mbangilu to. Nudi numona lutatu lwakayaye kabwelamu alu anyi?

289 Nenku muntu kana yônsò udi wibaka cintu kampanda, dingumba kampanda, anyi cintu kampanda pambelu paa Dîyi dya Nzambi, aci ndunteka ne cyôci necidishinde! Necifwe bulelela anu mudi nî ncinyi nî ncinyi cyônsò eci, bwalu Dîyi dya Nzambi m’Mubidi wa Mukaji musela ùdî wènda ùkola. Kwèna mwa kwikala naaWu mwikale wônsò anu dikàsà, wônsò anu diboko, wônsò anu cibelu to. Bintu ebi bilwalwa mu movù wabi.

290 Kadi Mpenta, nwênù nukaadi bamuvwije yônsò cintu anu cimwepele, ki bwa cinyi kanwenaku mwa kupeta dibuulula dipyadiya to. Ki bwa cinyi nudi nushaala anu mwaba unudi awu ne nufwa. Wôwò udi utentemuka. (Ngâmbi bikumbane; ncyèna muswe kunucyokesha to.) Kadi Nzambi katu ushintulula

mmmwenenu Wende to, dipangadika Dyende dya kumpala ndijaalame anu menemene. Pa nanku Nzambi katu ushintulula mmwenenu Wende to, Yêyè udi anu ùkulekela utùngunuka mu diswa dyebe dya cimfùlààmwòyì adi. “Nzambi utu Nzambi mwîmpè,” bu mùtù Oral Roberts wenza kwamba amu. Yêyè’s utu kabidi Nzambi wa ukwacisha bwôwà!

²⁹¹ Tangilaayi, anu bu munutu nwamba ne: “Butumbi kudi Nzambi, ndi muswe ngiikale ngaakula mu myakulu!” Yêyè neakulekele uyaakula, kadi aci kî ncimanyinu cya ne udi mupete Nyuma Mwîmpè to.

²⁹² Nudiku bavuluke cyakamba Tomase, mwena mpatà wa kale awu anyi? “Amba anu mêmè mupeteku cileeji kampanda, bikengela ngèlè minu mu mputa Yende ya misonso ayi, mu byanza Byende, ne mu lubadi Lwende alu, bwa cyanaana ncyà—ncyà—ncyà—ncyakuCiitabuujuaku mene to.” Mpindyewu, s’ki bwalu mbwôbù abu, cintu cyôci cimwecimwe aci.

²⁹³ Yesu kwambaye ne: “Nyôyì eyi, Tomase, elaaku minu yebe mwômò emu piikalabi ne ki cyûdi wêwè muswe kumanya.” Nwamonu anyi? Nwamonu anyi? Mpindyewu, pawikala muswe kulonda njila wa Tomase, tungunuka ndaaku anu kumpala. Kadi Yêyè wakamba bishi? “Difutu dya badi kacya kabayi banji kumona kadi biikale biitabuuja ndidi ditambe bunene.”

²⁹⁴ Monaayi, monaayi, mu kwenza kwa cyôci eci aku, wakakebela muntu wa meeji matooke awu lufu, mukatwe cyanza cyende pa musheete wa cipungidi paabi kabiya bikengela kwikalaye mucyènzè to. Muntu munene, wa meeji matooke, wela meeji ne dilaabiibwa ne bikwabo byônsò abi bivwa anu bilenga, kadi’s musheete wa cipungidi ngawu ukaavwa wenda uya mu mushindu mubi. “Ngombe,” mudi Bible mwambe, “yakatetuka,” kacyi beena Lewi to. Ngombe yakatetuka nenku ditempu dikaavwa ditonkoka; nenku muntu wa meeji matooke, mwikale ne mwoyi mùle tente ne dinanga, kutwaye cyanza pa musheete awu bwa yêyè kuwukandamija, kadi kutuucikaye e kufwaye bwalu muntu nansha umwe kavwa mwa kulenga musheete wa cipungidi to pa kuumusha mwena Lewi. Nudi numona mudi Nzambi ushaala mulamate ku Dîyi Dyende, mulamate ku kajila Kende, mulamate ku dîyi Dyende dituma anyi? Uziya wakatuucika ne nsudi. Ki Davidi nyêyè ewu, mukebele muntu lufu lwa cikàdi, ne dikenga dinene; balaaba kudi Nyuma, bônsò babidi abu, kadi biikale pambelu paa kajila kaa Nzambi. Ncyà bushuwa anyi? Yêyè’s wakafwa. Kaa, cintu aci kadi kukwacishaci Davidi bwôwà bwa wàmba kufwa, mwab’awu kwinyikiibwawu dî—dîna adi, bu mwabadibo kudi Mwaneetu Jack amu. Nwamonu anyi? Yêyè kumutwa cimanyinu mwab’awu’s.

²⁹⁵ Misangu miine bûngiyi yikaadi mangumba menzelenzele beena kwitabuuja baa meeji matooke cintu cyôci cimwecimwe

aci's we. Ekeleeziya wa Katolike, wa ba-Méthodistes, wa ba-Baptistes, église de Christ, nansha mene beena Mpenta, bôbò's bakaadi bapetêshe bààbûngì lufu lwa nyuma ku cintu cimwecimwe aci. PaakalwaCi, ne biine bintu ebi, baakajandula ne. . .nenku kabacyena ne mushindu wa kuyabo kule to, bwalu aci.ncidi dingumba dyabo diitabuujá.

²⁹⁶ Tangilaayi leelu ewu, bibilu binene bya butangadiki ebi, cintu cyôcì cimwecimwe aci. Kabeena ne cidibo benza cikwabu to anu kutamba kubavwija "mwânà wa iferno misangu ibidi, babi kutamba muvwabo ku ntwandijilu." Cidi cibavwijila bwalu butamba kubakolela, cya bushuwa, bwa kulwa ku Bulelela. Badi benza dimwe dya ku matabuluja aa, ne bôbò bônso balwamu, benza bintu bya lukutukutu ndambu, bapatuka baalukila mu mààbò kadi kubangulula anu yêyè mpekaatu umweumwe ewu. Padibo anu bumvwa bamba bwa ditabuluja dikwabo, ki bôbò abu ne: "Aa, s'nkaavwa mupete ndambu wa bintu abi, s'nkaadi mubiteeteteete. Kabyena ne bwine bwa nsongo to." Nwamonu anyi? Kì mbamanye kajila to. Kabeena bamona to.

²⁹⁷ Mvwa muumvwe mutangadiki wetu munene Billy Graham ewu, musòmbe dinda kampanda ku didya dya dinda mushindu ewu, kwambaye ne: "Mémè. . ." Monaayi, wela Bible muulu, mu Louisville, Kentucky, wamba ne: "Ki cileeji lu cya Nzambi *ncyaci*." Nenu aci's ncilelela, muntu awu wakamba bulelela. Kwambaye ne: "Udi uya. . .Pòlò uvwa ubwela mu cimenga kampanda ne ukudimwija muntu umwepele mucima, dya walukila paanyima paa cidimu cijima ulwa ubasangana makumi asatu baa ku muntu umwepele uvwa mukudimune mucima awu." Yêyè ne: "Kadi mémè ndi mbwela mu cimenga kampanda nkudimwija bantu binunu makumi asatu mucima, kadi ngaalukila paanyima paa ngondo yisambombo nciyi mwa kusangana makumi asatu to." Yêyè ne: "Nudi bamanye mwaba udi cilema anyi?" Yêyè ne: "Nwênù bayiishi beena lulèngù aba," mwakambaye, "nudi anu kacya nwasòmbe ne dikàsà ditenteka pa birò ne—ne biikale anu nubiikidila bantu abu ku telephone pamutu paa kuya kabakumbula paanyima paa didya dya diloolo bwa kuyiikilaku naabo."

²⁹⁸ Kaa, mwoyi wanyi kadi kwataaku kapyá's. Mémè kadi kudyambidila ne: "Éyì mulume munene wa Nzambi, ndi ngumvwa bingenza bibi ku mwoyi bwa kupangakana neebe mwab'ewu, kadi bayiishi beena lulèngù pa bidi bitangila muntu umwepele uvwa Pòlò mukudimwische mucima awu bavwa mbanganyi? Cyakenzaye yêyè, wakamwangata e kumubweja mu Diyì, wakamubweja mu Mukenji, wakamufikisha too ne pa kaaba kavwaye upeta Nzambi; mwoyi wende ukwata kapyá, yêyè kuteemesha kapyá mu citupa cya buloba aci! Kadi cintu cimwepele cinudi nwênù nwenza's cidi anu kubweja bantu mu ekeleeziya wa ba-Baptistes anyi wa ba-Méthodistes, anyi cintu

kampanda, kabyena bikemesha to mudiku kakuyi cintu nansha cimwe cya citeemesha kapya.” Uh-huh. Eyowa’s, mukalenge!

²⁹⁹ Kadi tangilaayi cidi Dîyì dilaye bwa leelu ewu. Tujandulaayi bwa ne mba-Méthodistes anyi, mba-Baptistes anyi, mbeena Mpenta anyi, anyi ncinyi, bwa leelu ewu. Bwa mpindyewu nudi mwa kuya kabalaayi Mifundu yenu ayi. Angataayi Mifundu yîngânùtèèledi eyi. Ne Bwakabuulwibwa kabidi. . .

³⁰⁰ Bu ne mvwa ne dîbà, mvwa mwa kubibala, kadi ncyêna anu naadi to. Ncicidi ne tusunsa bu dikumi ne tubidi anyi dikumi ne tunaayi nanku awu. Bikengela njikije pa dîbà, pa dîbà dikumi ne umwe, piikalabi ne ndi mpatuka pa dîbà menemene.

³⁰¹ Monaayi Maalaki 4, Bwakabuulwibwa 10, Bitampi Mwandamutekete. Bible kî mmwambeku ne. . . Tangilaayaaku mpindyewu! Kuvwa Mwanjelo, Musanjeela ufumina mu Dyulu, ne musanjeela wa pa buloba. Ne musanjeela yônsò uvwa bwa cikondo cya ekeleeziya. Wakamba ne: “Mu matuku. . .” wakula mpindyewu, “kwakalwa mwanjelo, Musanjeela” (mwaku ewu *mwanjelo*, mwaku wa mu Anglais udi umvwija “musanjeela”). “. . . upweka ufumina mu Dyulu, ne Wakateeka dikàsà Dyende pa buloba bûme ne pa mbû, ne wakadicipa kudi Ewu udi ne mwoyi kashidi ne kakwakwikala kabidi cikondo to.” Ncya bushuwa anyi? Ne mwanzankongolo kumutu Kwende, ne bintu byônsò ebi biikale byenzeka. Mwanjelo awu uvwa n’Kilisto! Cya bushuwa! Kadi cyakambaYe ncinyi? “Kadi mu matuku a mwanjelo wa mwandamutekete, cikondo cya mwandamutekete cya ekeleeziya.”

³⁰² Misangu yônsò anu kundekeelu kwa cikondo cya ekeleeziya nkutubo bakafikisha cintu aci menemene ku. . . bukwântèndelèlu bwikale mu cimvundu mu mushindu wa Nzambi utuma musanjeela, nenku ki Mukenji wa ciine cikondo cya ekeleeziya aci ngwôwò awu. Pashiishe badi bangata mukenji wende, bwalu yèyè mmushaale ne mwoyi anu bwa ntanta mwîpi cyanaana, nenku Nzambi. . . pashiishe badi bangata mukenji wende pamutu paa bôbò kutungunuka naawu pamwe ne bikwabo bya Cyôci aci, badi bôbò benza di—dingumba. Ne pashiishe badi balwa benza dikwabo dingumba; mukwabo musanjeela, bangata mukwabo.

³⁰³ Nwènu bônso nudi bamone mu mukanda wanyi, byônsò nebizodiibwe mu *Bikondo Mwandamutekètè Byà Èkèleeziyà*, cidiYe mungambile; pândi mwimanyine bu ntemu wa Nzambi bwa kulumbulwishiibwa mu dituku dya Cilumbulwidi bwa Cyôci aci. N’Cifumine kudi Nzambi, kî nku ngeelelu wanyi wa meeji to. Monaayi, mwab’ewu. Mvwa ngeela meeji—mvwa ngeela meeji bishiilangane ne cyôci aci, bu ne bivwa bikengela bwa mêmè kwangata meeji aanyi mêmè mwine. Bu muvwa Mwaneetu Jack mungambile bwa Mwanjelo awu, ne “Kilisto awu uvwa mmubidi mutumbishiibwe.” Kadi kabivwa nanku to,

civwa cileeja ne Mukenji uvwa wa cya bushuwa, Bunzambi budi Kumutu kwa bônso, Yèyè uvwa Nzambi. Nwamonu anyi? Anu cintu ciine menemene cîmvwà nyiisha cya mu Dîyî aci. Dîyî ditu misangu yônso difila anu bujaadiki bwa Dîyî.

³⁰⁴ Mpindyewu, lukasalukasa mpindyewu, patukaadi tudilongolola bwa kujikija mu katanci kakese emu apa.

³⁰⁵ Mpindyewu, Yèyè kwamba ne: “Mu matuku a Mukenji wa mwanjelo wa mwandamutekete, mwanjelo wa pa buloba awu, cikondo cya mwandamutekete cya ekeleeziya, pa dîbà adi maalu masokoka ônsò aa atu majimine kale munda mwa bikondo bikwabo bisambombo bya ekeleeziya ebi awu adi ne cya kubuuludiibwa pa dîbà adi mene.” Ee, ki cyôci menemene cyakamba Banjelo abu. Ki Bitampi Mwandamutekete mbyôbi ebi, anyi dikangula dya miine maalu masokoka aa. Kadi teetaaku bwa kutwala Cyôci aci kumpala kwa mangumba awu’s. Bibengangane ne bidibo bôbò . . . Mwaneetu, ôwò’s adi adikanga anu mudi cinyamankòle, kadi’s ki mùtùwu ènza misangu yônso. Kadi’s mmuvù!

³⁰⁶ Mbanganyi badi bamanye ne eci ncikondo cya mwandamutekete cya ekeleeziya? Bámbe ne: “Amen.” [Disangisha didi dyamba ne: “Amen.”—Muf.] Cikondo cya Laodikiya, cya civumvu cidi Nzambi utwila mukana Mwendé. Ne bôbò badi batwila Nzambi mukana mwabo; kakwenaku cikondo cikwabo mu Bible cidi Yesu usanganyibwa pambelu mwikale uteeta bwa kukookola, bwa kupingana munda to. MbaMwele pambelu, kakuyi dyelangana dya mu diboko nansha dya kânà. Yesu nganyi? Dîyî! Dîyî ndivwa dyediibwe pambelu. Bizubu mbiimanshe blé pambelu! Yèyè mmwambe ne: “Ndi mwimane ku ciibi nkookola, nenku muntu kana yônso udi mu nkanu ayi ùmvwè Dîyî Dyanyi.” Éyî Nzambi wa yaaya, wâfwakù luse’s we!

³⁰⁷ Pavwa mpa dîbà adi, paakafwa muntu awu apu, paakamona Davidi ne dilaabiibwa adi ne ùvwa mwenze cilema. Éyî Davidi wa yaaya, wêwè mpaasata, kwèna mwa kumonaku twitabaayi yebe mifwe ne mangumba audi anu kacya wakwataku awu anyi? Kwèna mwa kumonaku cidibi byenza anyi? S’bidi bishipa Uza kampannda’s. Bafwe mu nyuma, kadi ki nwênù kwasa didikonka mudiku kakuyi ditabuluja; nulekela bakaji beenu bakosa nsuki yabo, badilaaba bilaabu kwisù, bavwala tuputulù; nutuma bânà beenu baa balume balela mu tulaasa twa *ba-ricky*, ne bikwabo bya mushindu awu, mudi cyabibidi cyabo baalukila ku mààbò bakaadi babakyanganyi baa balume ne balume ne baa bakaji ne bakaji, ne bikwabo byônso.

³⁰⁸ Tangilaayi kiipacila kaa Davidi: ùvwa uya ne musheete wa cipungidi kumbelu kwende *yèyè mwine*. Awu mwaba kî nguvwa cimenga cikulu to, awu kî nguvwa mwaba uvwa ukengediibwa to, ùvwa ukumbanyina kwikalawu mu Yelusalem. Kadi Davidi

uvwa yêyè uya naawu kumbelu kwende yêyè mwine, ùvwa ukeba bwa ditabuluja kwikaladi mu dingumba dyende yêyè. “Kaa, wêwè mwikale mwena Assemblée, mbîmpè. Wêwè mwikale Unitaire, mbîmpè. Wêwè mwikale mwena Mpenta, mbilenga.”

309 Byenze muvwa muntu kampanda wamba, wamba ne: “Mwaneetu Branham, mmunyi mûtù wêwè ufikaku ku dyenza ne muntu mwine akuteeleje?” Yêyè ne: “Ndi mwa kumona Billy Graham, yêyè udi ne dingumba ne dingumba dyônsò diikale nende mu ditunga emu. Ndi mwa kumona Oral Roberts, mwena Mpenta yônsò mmumulamate anu yêyè. Kadi,” mwakambaye, “wêwè nyawu ubengangana ne cintu cyônsò mu kaabujima.” Uh-huh. Yêyè ne: “Mmunyi mene mûdîku wêwè ufika ku dipeta muntu mwine’s?”

310 Mêmè kwamba ne: “Awu n’Nzambi!”

311 “Mêmè Mukalenge ngudi mucikune kumpala kwa difuka dya dyulu ne buloba. Mêmè ngwîkala mwa kucimyamina mâyi muunya ne bufuku bwa bamwe baa kudibo kabàlu kucidyapula mu cyanza Cyanyi to,” Yeshaayi. “Mêmè ngwîkala mwa kumyamina mâyi, Mêmè ngudi mucikune. Ndi mufunde mênà abo mu Mukanda kumpala kwa difuka dya dyulu ne buloba, ku didyanjila kulongolola. Mêmè ngwîkala mwa kucimyamina mâyi, nwênù tungunukaayi anu ne kwenda kuya kumpala. Mêmè ngwatwala mâyi, cyenu nkuÈla cyanaana.” Cya bushuwa. Nwamonu anyi? “Mêmè ngwîkala mwa kucimyamina mâyi muunya ne bufuku bwa umwe wa kudibo kalu kucidyapula ku cyanza Cyanyi to.” Ki bwalu mbwabu’s.

312 Muswe bwa kafikawu mu nsesa ya Davidi, pamutu paa mu Yelusalema. Kakuvwa mwaba muwulongolwela nansha umwe to pa diine dîbà adi, nenku ki mudibi kabidi leelu ewu. Maalu masokoka manene adi mavunguludiiibwe kudi Bitampi Mwandamutekete aa, kakwena mwaba mu dingumba nansha dimwe to... bivwa bikengela kulekela kwikala dingumba kampanda bwa kuCyangata. Kacya anu ku Luther too ne ku ba-Unitaires baa beena Mpenta abu, kakwenaku mwaba nansha umwe udi mwa kuCyakidila to. Nansha muntu mene kêna mwa kuCyakidila kadi kusha alaye mu dingumba dyende to. Nebikengele kulondaye blé anyi kuyaye ne cizubu, eci anyi eci cwaswaye kulonda aci.

313 Kilisto ki wetu Musheete wa cipungidi, Dîyì. Bòbò mbaswe dingumba dyabo adi. Yêyè kêna, monaayi, kêna mwa kwambwibwa mu matempu mapyamapya a dingumba awu to, Mukenji Wende kawenaku mwa kuya mwambula mu ditempu dya dingumba dipyadiya padiWu ne cya kwambwibwa ne kulwa pa mwoyi wa mupofeta to. Kabyenaku mwa kwenzeka nanku to. Yêyè ngwâkacîlaya, Civwa mwa kwikala nanku, ne mushindu awu ngudiCi ne cya kwikala.

314 Pa nanku dingumba kadyadyakuWakidilaku to, nansha bôbô kabeeena mwa kuWakidilaku to. Kadi bôbô badi bampofu ku Wôwò awu anu muvwa beena Yuda paakakudikabo Yesu ku nkuruse apu, paakamba Yesu ne: “Taatù, bafwileku luse, bôbô kî mbamanye nansha cidibo benza aci to.” Kanwikadi nwabadyombola to, kadi elanganaayi anu meeji cyanaana: bwalu anji ambaayi tûng bu ne nwnênù mbàvwà mu ngiikadilu mwine awu biikale ne mèsù mafofome mu mushindu wa kanuyi mwa kutabala ne kumona cidi munkaci mwa dyenzeke?

315 Nansha bôbô abu kabavwa mwa kumona ne Awu uvwa n’Nzambi wabo mene to. PavwaYe mukùdika ku nkuruse aku apu, ne bôbô munkaci mwa kwimba Musambu wa 22 mu ntempelu, mu ntanta wa mwinshi mwa mètres nkama yibidi ne mwaba awu ne: “Nzambi Wanyi, Nzambi Wanyi, WâNdekèdì bwa cinyi? Bâtùbulu makàsà Aanyi ne byanza Byanyi.” Nwamonu anyi? “Mifuba Yanyi yònsò, bakaadi baNdèngèmèène. WâNdekèdì bwa cinyi?” Nenku mwab’awu, Nzambi mene uvwabo bimba mu misambu awu, biikale ne bumpofu bukumbane bwa kuMupoopesha pa nkuruse, kadi kabayi bacimanye to.

316 Mpindyewu, Bible kêna wambaku ne ekeleeziya wa Laodikiya, mwine udi udyambidila mudiye mutambe bunene ku bidimba byende bya cyena mangumba awu, ne neikale “butaka, mwena dikenga, mupele, mpofu, kadi kayi mucimanye” anyi? *Mpofu* udi umvwija cinyi? *Mpofu* udi umvwija bwa ekeleeziya wa Laodikiya ewu ciwaye umvwija bwa ndekeelu wa ekeleeziya wa beena Yuda, bampofu pa bidi bitangila Kilisto mwine uvwabo biimanshe pambelu awu, ukookola, uteeta bwa kubwela; “butaka, mwena dikenga, mupele, mukengeledi wa luse, mpofu, kadi kayi mucimanye to.” Éyì Nzambi, wâfwakù luse’s we!

317 Mbwa cinyi budi blé kayi mwa kushaala mwanyika mu Bwikadi bwa Mwânà awu kuntu kwaka, bwa kumona dîbà ditudi twêtù ne mwoyi edi? Eyowa’s, Kilisto ki wetu Musheete wa cipungidi, kadi mushindu Wende wa ku cibangidilu wa dicyenza. Nenku’s ki Yêyè ewu. . . Bavwa ne Nyuma Wende anu bîmpè, aci tudi bamanye. Badi bindila Mukalenge, bamona ndongamu Wende pa Dîyì Dyende dya ku cibangidilu mu muv wadi bwa kwikaladi dishindika, aci’s ki cibwa cikengela bwa twêtù kwikala munkaci mwa kwenza mpindyewu. Ne Yêyè—Yêyè udi usokolola diitabuujja dyabo ku Dîyì Dyende, baMumona ushindika ndongamu ne ndongamu yònsò uvwaYe mulaye, kacyi màyelè a bantu a dingumba to, kacyi dyenza dya bidimba bwa musheete wetu twêtù wa cipungidi to.

318 Bôbô badi ne musheete wa cipungidi wa ba-Méthodistes, musheete wa cipungidi wa ba-Baptistes, musheete wa cipungidi wa ba-Presbytériens, muntu ne muntu mwikale ubwela mu musheete mwine ewu bwa dikenga dinene dilwalwà; “Butumbi kudi Nzambi’s we! Mémè mvwa mubatijiibwe mu musheete wa

cipungidi wa ba-Méthodistes, wa ba-Presbytériens, musheete wa cipungidi wa beena Mpenta.” Kudi Musheete wa cipungidi anu umwepele, ki Yesu Kilisto, ne Yèyè udi Dìyì!

³¹⁹ Monaayi, Nzambi wakambila muprofeta, kwamba ne: “Dyaku mukanda muvunga awu,” mu Dipungila Dikulukulu. Muprofeta wa Dipungila Dipyadipya, Yèyè kumwambila ne: “Dyaku kakanda kakese aku.” Bwa cinyi? Bwa muprofeta ne Dìyì kwikalabi cintu cimwe! Nwamonu anyi? Ki Musheete wa cipungidi ngwôwò awu, Dìyì dya Nzambi.

³²⁰ Nzambi mmulaye, Dìyì Dyende, muvwaDi mwa kuula ne muvwaDi mwa kwenzeka paakasungulaYe Mukaj’Ende musela, muvwaDi mwa kwenjiibwa. Cidi munkaci mwa kwenzeka anu kumpala kwenu mene, mu Dîna dya Mukalenge, ne ciine aci nku Dìyì dya ku cibangidilu! Mukenji wa cikondo cya ib’a muloolo ukaadiku.

³²¹ Mbanganyi badi bavuluke Haywood paakafundaye ne:

Nekwikale Bukênkè lwà ku dîbà dya diloolo,
Ncya bushuwa ne nenupete kajila kaa ku
Butumbi.

³²² Eyowa’s, mulayi wa ib’a muloolo wa Bitampi Mwadamutekete, wa Bwakabuulwibwa 10, Maalaki 4, Luuka 30 ne 10. Nubalaayi Dutelonoma 4, 4.1 ne 4, pashiishe mvensa wa 25 ne wa 26, nenku numone cidiYe mwambe bwa dituku dya ndekeelu edi. Ewu uvwa m’Môsà wambila beena Izaleela bwa ne “Nulame Dìyì dyônsò, kanusakididi kantu nansha kamwe to!” Môsà, muprofeta awu nguvwa mubànde kuntu kwaka ne mumone Dìyì dya Nzambi adi. Ne baakamufundilaDi ne dyakashindikiibwa ku cyanza cya Nzambi Yèyè mwine ciDifunda. Yèyè kwamba ne: “Nulame Dìyì dyônsò, kanusakididiKu kantu nansha kamwe anyi kanuumushidiKu kantu nansha kamwe to.” Nudi mwa kubala aci mu mvensa wa 25 ne wa 26 ya mu Dutelonoma 4.

³²³ Monaayi! KanusakididiKu, kanuumushidiKu to; bwalu wêwè mwenze aci, Nzambi neumushile cyebe citupa ku Mukanda wa Mwoyi. Nenku cidi cileeja ne wêwè kuvwa dimiinu Dyende to.

³²⁴ Nwavulukaayi! Bintu byônsò bitu Nzambi mutulaye, bintu byônsò bitu Nzambi mutwâmbile, bintu byônsò bikaadi byambiibwe kunudi mu Dîna dya Mukalenge abi, mbyenzeke! Kacyakacya Nzambi katu mwanji kwenzaku mulayi wa munda mutupu to, kadi Yèyè utu anu mushaale mukwate ku mulayi wônsò ukaadiYe mwambe, mutwâmbile, citu anu Bulelela. Bidimu byônsò makumi abidi ebi, nwênù beena Shreveport, ndi munuyiishe ku bukole bwa Nzambi, ne nsômbelu wa bukalinga wa mpaasata wenu, nenku ndi nwangata bu bantemu leelu ewu. Nansha mene bakaji bâkaavwà bapite ne cikondo cya kulela; balume, bâna, ntatu, dyondopiibwa, ciprofeta, bintu bivwà mwa

kwenzeka, nansha cimwe cya ku byôbì abi kacya kî ncipangileku to! Mpindyewu, nushaalaayi kule ne mangumba awu, ôwò awu ngadi anulombola too ne ku lufu.

³²⁵ Samwele wakiimana dituku dikwabo, ki bôbò kwamba ne: “Tudi baswe mfumu, tudi baswe kwikala mudi baa pa buloba bakwabo bônso.”

³²⁶ Bôbò . . . Samwele kwamba ne: “Kanwangaciku mfumu awu to. Yêyè neangate bânà beenu baa balume balela, ne bânà baa bakaji, neênzè *bikampanda* ne neênzè *bikansanga*.”

³²⁷ Awu ne: “Eyowa, ndi mumanye ne udi mubinge.”

³²⁸ Kadi Samwele kwambaye ne: “Nteelejaayaaku. Kacya nkaadiku mwangate mfranga yenu anyi? Kacya nkaadiku munulombe kaa pa luse bwa mêmè kudya anyi? Kacya nkaadiku munwâmbile ne bidi bikengela numpeeshe difutu kampanda bwa mêmè kunwenzela disangisha anyi?” Mpindyewu lumbulwishaayaaku nwênù nkaayeenu, nansha mpindyewu! Nwamonu anyi? Kwambaye ne: “Kacya nkaadiku munwâmbile cintu kampanda mu Dîná dya Mukalenge cidì kaciyi cyenzeke anyi?” Cintu nansha cimwe.

³²⁹ “Kaa, eyowa, Samwele, kacya kutuku mwanji kutulomba mfranga ne nkaa pa luse to, kacya kutuku mwanji kujinga bintu binene to. Samwele, bwa aci ncy bushuwa, ne byônsò byûkaadiku mutwâmbilâmbile mu Dîná dya Mukalenge bikaadi anu byenzeke. Kadi, Samwele, citudi twêtù tukeba ndyetu peetu dingumba’s nansha bya munyi!”

³³⁰ “Nanku ndaayaaku nudyângâte. Abu budi anu mbwenu.” Ney bushuwa.

³³¹ Udi mwa kudyelela meeji ne udi munkaci mwa kwenzela Nzambi mudimu, kadi pawikala upatuka mu mushindu wa Nzambi wa dicyenza, neutungunuke anu ne dicinyangakaja, mutungunuke anu wenda unyangakaja. Éyì nwênù Ekeleeziya wa Nzambi udi ne mwoyi! Bu nwênù mwa kuswa mfwilaayiku luse bwa mushindu wanyi wa ci-Irlandais ne dyela dyanyi dya mapiku, kadi mu meeji aanyi matooke ne bunsantu bwa mwoyi wanyi, nwênù beena Assemblées de Dieu, nwênù ba-Unitaires, ba-Presbytériens, ba-Méthodistes, cyônsò cinwikala aci, nyeemaayi bwa kusungila mwoyi wenu. Vulukaayi, patukaayi muntwamu.

Matunga àdi àpanduluka, Izaleela nyewu
ùtâbuluka, (Bâdìlongolola bwa bàshâàdilà
abu.)

Bimanyinu byâkadyànjilà baprofeta kwamba;
Matuku a cyena mangumba mmabala ku minu,
mûle ne bintu bidi byenza bwôwà,
“Alukilaayi, Éyì nwênù bàdi batangâlâjîibwe,
kùdì beenu sungasunga.”

Dituku dya bupikudi didi pabwîpì,
 Myoyi ya bantu yidi yàmba kwimana bwa
 bwôwâ;
 Ujiibwâyi ne Nyuma Wende, ikalaayi ne
 myëndù yenu milongolola ne misukula,
 Bândulukàayi! Bupikudi bwenu bùkaadi
 pabwîpì.

³³² Nudi nwitabuujà aci anyi? Tukaadi ku cikondo cya nshiikidilu, tukaadiku. Mufundu ukaadi ku cimanu, Dilwa dya Cyakabidi dikaadi pabwîpì, Mukaaji musela udi munkaci mwa kusungudiibwa, mwa kumyaminiiibwa mâyi, mwa kukokiibwa bwa kupatuka.

³³³ Mpindyewu, aci kî mbwena kwamba ne ùpâtudiibwa mu ekeleeziya to, mbwena kwamba ne ùpâtudiibwa mu cyena mangumba. Udi ne cya kwikala uya mu ekeleeziya, kadi kuyi kashaala mwena bulongolodi kampanda to. Yesu uvwa wenda pamwe ne malongolodi ônsò awu, kadi Yêyê kaakashaalaku nansha wa mu bumwe bwa ku ôwò to. Anyi Kaakaditekaku luseke lumwe ne bumwe bwa ku ôwò to, ncya bushuwa, kadi Yêyê uvwa munkaci mwawu. Mwômò amu ki mudi mukengela kutangalajila Bukênkè. Kadi shaala wêwè anu mwaba wûdì awu, mwikale utangalaja Bukênkè. Nwamonu anyi? Ki cyôci aci cidì Nzambi ukwacila neebe mudimu. Cisamba cya mwoyi udi ne nzala, enzaayi bwa bamanye ne Yesu Kilisto ngwa cya bushuwa, umwèumwè anu muvwaYe makeelela amu, ki mudiYe leelu; ne ki mwikalaYe bwa kashidi.

³³⁴ Bidi mwa kwenzeka ne, mulume anyi mukaji mwikale ne meeji ônsò matooke, ùteeta ne mwende mwônsò bwa kwenzela Nzambi mudimu kampanda, kadi ucyenza mucitangija mu mushindu mubi. Mwikale ne dilaabiibwa dishuwashuwale dya Nyuma Mwîmpè pambidi pende, kadi mucitangije mu mushindu mubengangane ne ndongamu wa Nzambi bwa cikondo, kadi ubweja cimvundu cinene mu cintu cyônsò nkòông. Mpindyewu, panwikalà nwitabuujà ne aci m'Bulelèlè, ambàayi ne: "Amen." [Disangisha didi dyàmba ne: "Amen."—Muf.] Twafùmu ku diCibala. Kubweja cimvundu cinene mu cintu cyônsò nkòông pa kupanga kulonda njila wa Nzambi mulongolola bwa cyôci aci.

Tusambilaayi.

³³⁵ Éyi nwênù ekeleeziya, mwab'ewu ne mu ditunga dijima, ikalaayi bateeleje musadidi wenu mudipwekeshe ewu mu dinda emu. Mmwômò anyi? Tangilaayi mwaba unuvwa nusanganyiiibwa kukaadi ndambu wa bidimu pavwa cyôci eci cicibangilaku; tangilaayi mpindyewu numone ne nditentula bûngì kaayi dikaadi dipetele paa kudiila wa cyula pa Cyôci aci, ne mmiliyô minene ne miliyaala ya ndola bûngì kaayi yikaadi mibwele mîntùta ne mîntùta mu malongolodi awu. Nwamonu anyi? Batungunuke anu ne kwikala kule ne Dìyi dya

Nzambi. Bitanda ne malongolodi kî mmushindu udi Nzambi usalula Nyuma Wende to. Ûdi Yèyè uMusalwila buludi anu mu Dîyî Dyende, bwa kuDivwija ne mwoyi. Nenku piikalabi ne wêwè uvwa mulongolola ku Dîyî adi kacya ku cibangidilu cya buloba, Dîyî dyônsò nedilwe anu kwambakana pamutu paa Dîyî. Anu mudibi ne kabulu kaa mashi kaa muntu kakaakwikala ne kabulu kaa mashi kaa muntu kamwepele, ne kabulu kaa mashi kadi kàlondà kiikale kaa mpuusu nansha; netwikale tubulu twa mashi twa muntu. Kadi bidi bikengela kwānji kwikala dyambedi kabulu kaa mashi bwa kuntwadijilu aku. Aci ncyā bushuwa anyi? Ambaayi ne: “Amen.” [Disangisha didi dyamba ne: “Amen.”—Muf.] Ee, piikalabi ne nkabulu kaa mashi kaa Dîyî kuntwadijilu aku, tubulu tukwabo twa mashi twa Dîyî's ntulongolola bwa kwenzatu mubidi mu kaabujima.

³³⁶ Kanwikadi bānà batekete to, anu mu dinanga nkaayaadi, kadi ikalaayi bantu bakole mu Nyuma ne mu dilumbulwisha. Lumbulwishaayi bwa kumanya ne ndi munwāmbile Bulelela anyi ncyēna munwāmbile. Lumbulwishaayi bwa kumanya ne n'Dîyî dya Nzambi anyi kî ndyôdi. Lumbulwishaayi bwa kumanya ne dîbā ndyôdi ditudi twamba edi anyi kî ndyôdi. Lumbulwishaayi bwa kumanya ne bintu ebi byakalayiibwa anyi. Mpindyewu, mbishindikiibwe anyi? Ku bintu bya ne kakwenaku muntu wetu wa pa buloba ewu udi mufwanyine kucyenza to. Kadi Cikaadi cishaale cya ciibidilu kutudi mu mushindu wa ne tukaadi baCilekele anu cipongoloka citupita's. Anji indilaayi tūng, nwènù ekeleeziya, indilaayi.

³³⁷ Piikalaku muntu kaaba aka mu dinda emu udi kayi mumanye Yesu Kilisto, udi kayi mwanji kubingishiibwa mu dinda emu, mpekaatu yebe miye yônsò byenze anu bu ne kacya kutuku mwanji kwenza mpekaatu to, ne wêwè mwikale ujinga kwikala mushindu awu...bwalu vuluka ne, dîngà dituku, pāmwāpa leelu ewu, pāmwāpa mu tusunsa tutaanu tudi tulonda etu, kadi dîngà dituku mwoyi awu newikale mwa kwimana. Ne munda mwa munda amu nemubuuke muye bwa kiimana mu Bwikadi bwa Nzambi bwa kulumbulwishiibwa bilondeshile cyûdi wenza ne Mukenji ewu mu dinda emu aci, bilondeshile Mukenji ewu wûdi umona. Kaciyi...Kî mmêmè to, mêmè ndi anu cikolokolo cyanaana. Bu mudi cikolokolo eci, kaciyena mwa kwamba cintu pândi mêmè nciyi ngaakwilamu to. Nenku nansha mêmè paanyi ncyēna mufwanyine kwamba nî ncinyi nî ncinyi padi Nzambi kayi mwakwilemu to, kadi nutu numona mukaadi Nzambi mucishindikeshindike ne m'Bulelela. Wêwè udi muswe kwikala mwena Kilisto mulelela.

³³⁸ Mpindyewu, katwena ne mwaba bwa dibiikila dya ku cyoshelu to, kadi anu ku meesa mene kûdi musômbèle aku. Mwaba ngwewu mupate ne bantu bafimpakane, bûlepù baye ne mwa naka. Ncyēna ne mushindu wa kunubiikila ku cyoshelu

to, kakwena cyoshelu kaaba aka bwa kunubiikidilaku to. Kadi cyoshelu cidi mu mwoyi webe amu. Kwênàku mwa kulekela kaaditwishibwa kakese aku kaa ne “Yesu Kilisto ngwa cya bushuwa” kàseemena pabwìpì leelu ewu bwa kukoka mubidi Wende ùdì mushaale awu kùdì, bwa kuMwenzela cidiilu munda mwa mwoyi webe amu anyi? PiikalaYe kayimu to, udiku mwa kwela cyanza cyebe muulu, bu cimanyinu kudiYe, wamba ne: “Mukalenge, nguujeku, nguujeku ne Dìyì Dyebe ne Bwikadi Bwebe, bwa ngaamonaku mwa kwikala ne mwoyi ku Wèwè” anyi?

³³⁹ Pacidi mutu ne mutu wònsò mwinyika apa, dísù ne dísù dyònsò dibwita, mu ditunga dijima, elaayi byanza byenu muulu kaaba aka mu bateleji badi bamweneka ne mèsù aba ne pambelu apu kabidi; nenku mêmè nênnwènzèlè disambila. Ki cyònsò cindiku mêmè mwa kwenza ncyôci aci, ncyèna mwa kucyuja to. Nzambi akubeneshe. Ncyèna mwa kucyuja to. Nzambi akubeneshe; ne wèwè. Nzambi ngudi mwa kuwùtja. Nzambi akubeneshe. Byanza nyewu byenda bijuuka mu bateleji badi bamweneka ne mèsù emu, myaba yònsò. “Cikùmbàjèku. Nguujeku, Éyì Mukalenge. Nguujeku.” Nenu mpindyewu, paanyima paa mêmè...Twasakidila, mwaneetu wa bakaji. Twasakidila, mwaneetu wa balume. Nzambi akubeneshe. Paanyima paa mêmè...Nzambi akubeneshe, mwaneetu wa bakaji munanga. Wèwè. Paanyima paa...Ngeela meeji mpindyewu ne ngaamanyi kubakula ciibungì cya beena meeji matooke, bàdì bàteetà kwikala nanku abu, ndi muswe kwela paanyi byanza muulu pamwe neenu.

³⁴⁰ Éyì Mukalenge, kundekediku mfika pa mwaba wa nkaadi anu mwimane to. Kacya anu mutungunuke, Mukalenge, kundekediku nshaala mwimanyine pa kantu kamwepele to, enzaku bwa ngiikale anu mutungunuke, Mukalenge, too ne pângiikalà mukumbaje kantu ne kantu kaudi Wèwè muntumine dîyì bwa mêmè kwenza aku. Nansha ciikale ciyiila mushinga wa bishi, nansha bindombe cinyi, nansha kwikale bijaanu bya bishi, nansha nkuruse mwikale mukole bishi, nêmvulukè nkuruse uwakambula Wèwè awu.

Pa nanku nêngàmbulè nkuruse mulambula ewu

Too ne pàampèèsha lufù budishikaminyi,
Pa dîbà adi ngààlukilè Kwètù, bwà kuya kaasa
cifulu cyà butumbi,
Kudi cifulu cya butumbi bwanyi mêmè.

Yesu udi ne cya kwambula nkaayende nkuruse,
Cibì baa pa buloba bujima benda bakupa
maboko anyi?

To, kudi nkuruse bwa yònsò wa ku bânà Bende,
Kudi nkuruse bwanyi mêmè.

³⁴¹ Nzambi munanga, Dîyì dyamanyi kupatuka. Kadyena mwa kwalukila kadiyi ne cididi dyenze to, neDipeteku anu kaaba kaaDi mwaba kampanda. Piikala dimiinu dimane kukunyiibwa, Dyôdi nedidimyamine mâyì too ne mwakoladi. Ne muntu nansha umwe kêna mwa kudidyapula ku cyanza Cyebe to: “Bônsò badi Taatù muMpeeshe nebalwe kûNdi, muntu nansha umwe kêna mwa kubadyapula ku cyanza Cyanyi to. Taatù Wanyi mmubaMpeeshe kumpala kwa difuka dya dyulu ne buloba”; paakateekiibwa ndongamu yônsò, mushindu awu, Yesu wakapeebwa Ekeleeziya Wende, Mukaj’Ende musela.

³⁴² Dibaka dya mafi dya maalu a pa buloba, ne mangumba aa. Wêwè wâkalwa ne wâkafwà pa buloba, Wêwè kuMupikula, Wêwè kuMubingisha, Yêyè kacya katuku mwênzè bwalu mene to. Yêyè wakawaciibwamu ku buteyi, mpofo. Anu mudi musambu wamba ne:

Musangu kampanda mvwa mujimine kadi
mpindyewu ngaapeteki,
Musangu kampanda mvwa mu Laodikiya,
mpofo, kadi mpindyewu nkaadi mmona.

Nenku ngàsà ngutu mulongeshe mwoyi wanyi
bwa kuciina,
Ngàsà ngudi mutuuyîshe diciina dyanyi;
Mushindu mwine wakamweka ngàsà awu wa
mushinga mukole
Dîbà dîncîvwà ngiitabujilakù's wè!

Ne mâyì a Nzambi kumacilawu pa musuuka wanyi. Mvwa ngenda nguuminyina.

³⁴³ Nzambi, ku kaacyoshelu kakese kaa mwoyi ne mwoyi mwab’ewu ne mu ditunga dijima aka, swaku bwa mâyì adi afumina mwinshi mwa cyoshelu cya Nzambi awu afukukile pa Ekeleeziya Webe mu dinda emu; ne aMumyamine, Mukalenge, bwalu muvù ngewewu ukaadi wamba kujika. Wêwè uMupe Mwoyi, Mâyì a Mwoyi awu, bwa Wàmòna mwa kwikala mwadija mu Bwikadi bwa Mwânà bwa kubobeshiibwaye bwa diyeeba Dyebe dinene adi.

³⁴⁴ Taatù, ndi mbalombela bôbò. Kadi cicolakola cidi ne cya kuuma, pa nanku ncyêna mwa kucilombela cyôci nansha; cidi ne cya kufwa, pa nanku cyôci ciine ncifwe. Kadi mêmè ndi ndombela blé, Mukalenge, udi munkaci mwa kwangata mbungakeenu munda mwa Mubidi wa Kilisto awu. Enzaku, Mukalenge, bwa mâyì matalale a Nzambi awu alame matama Ende mabolesha ne binsonji bya disanka ne bya lwumvu too ne paalwa katumba kaa dinowa naaku kuMwangata bwa kuya nende kumbelu. Mu Dînà dya Yesu, mmûndi nKulambulabi byônsò emu, Mukalenge; bipeta mbyebe Wêwè. Amen.

[Mwaneetu kampanda wa bakaji mu disangisha ùdi ùfila mukenji. Katùpà kàà mukàbà wà mèyi munda mutupù—Muf.] Amen.

³⁴⁵ Pa nanku Taatù Nzambi, tudi tuKwela twasakidila. Nenku, Taatù, tudi tulomba bwa mwaneetu mutekete wa bakaji, mwena mudimu mukaji ewu, bwa ikalè ne makanda. Ndi mvuluka cikondo cingàakafikà mêmè—mêmè ewu mu bwikadi bwende, mushindu wàkalwà Nyuma pambidi pende ne kufila mukenji umweumwe wakafila Mwanjelo wa Mukalenge ku Musulu kwaka dituku adi awu ne: “Anu mwakatumiibwa Yone Mubatiiji bwa kudyanjidila dilwa dya kumpala dya Mukalenge Yesu, wêwè udi mutumiibwe bwa kudyanjidila diibîdi.”

³⁴⁶ Pa kumona ne cikaadi cyenda cyangata mmwenekelu mpindiyewu cikabwela mu citupa cya blé, Nzambi, tudi tuKwela twasakidila bwa byônsò biWênji. Myoyi yetu mmyûle tente kupita ne pa cyakwidi ciine. Ndi ndyumvwa mûle tente menemene, Mukalenge, mu mushindu wa nciciyi anu mmanyana mwa kwamba cikwabo cintu nansha cimwe to. Kadi tudi tuKusakidila cyakabidi, Taatù, bwa byônsò biWätwänzèdi. Mu Dîna dya Yesu Kilisto.

Ndi muMunange, . . .

TuMwimbilaayi anu cyanaana, mpindiyewu. Vulukaayi ne, Yêyè udi kaaba aka.

Bwalu Yêyè wakannanga kumpala,
Ne wakampetela lupandu
Ku mucu wa Kalvariyo.

³⁴⁷ Bidi binufikishaku ku didyumvwa bashaadile menemene, bashaadile menemene anyi? Bashiyiibwe munda mutupu mwônsò, biikale anu badilongolole bwa Nyuma, nwamonu's.

Kwata ku cyanza cya Nzambi cidi kacyi
cishintuluka!
Kwata ku cyanza cya Nzambi cidi kacyi
cishintuluka!
Ashila ditekemena dyebe pa bintu bya
Cyendeleele,
Kwata ku cyanza cya Nzambi cidi kacyi
cishintuluka!

Kwalakanyi mabanji a cyanaana a buloba ebu
to,
Àdi ànyangukà lukasa aa,
Ashila ditekemena dyebe pa bintu bya
Cyendeleele, (Kàdi kî mpa dingumba to.)
Kwata ku cyanza cya Nzambi cidi kacyi
cishintuluka!

Kwata ku cyanza cya Nzambi cidi kacyi
 cishintuluka!
 Kwata ku cyanza cya Nzambi cidi kacyi
 cishintuluka!
 Ashila ditekemena dyebe pa bintu bya
 Cyendeleele,
 Kwata ku cyanza cya Nzambi cidi kacyi
 cishintuluka!

³⁴⁸ Mbanganyi badi bateeta kwenza cyôci aci? Ela cyanza cyebe muulu. Mpindyewu olola anu cyanza dyamwamwa dya meesa, teekanganaayi byanza muntu ne muntu mu cya mukwende, mushindu *ewu*, bônso cyapamwe. Nudi mwa kwikalaayi basombèle panshi, bidi anu bîmpè, anyi cyônso cinudi baswe kwenza aci. Teelejaayi ne ntema. Tûwîmbaayi bônso pamwe mpindyewu. Eci cidi cileeja munyoololo wetu wa dinanga dya Nzambi udi kawuyi mukoseke awu. Tudi bakwatangane ku byanza bwalu tudi biitabuuje Nzambi. Tudi balengangane bwalu tudi bânà baa muntu balume ne bakaji, Nyuma umwëumwë udi utûtuka awu, Dîyi dya Cyendeleele dya Nzambi disombèle mu myoyi yetu diikale dimweneshiibwe.

Paajika lwendu lwetu,
 Patwikala bashaale ne lulamatu kudi Nzambi,
 Cisombedi cyetu cilenga-kumona ne cya
 cibalakana mu Butumbi aci,
 Musuuka wetu mwambwibwe neucimone!

Kwata ku cyanza cya Nzambi cidi kacyi
 cishintuluka!
 Kwata ku cyanza cya Nzambi cidi kacyi
 cishintuluka!
 Ashila ditekemena dyebe pa bintu bya
 Cyendeleele,
 Kwata ku cyanza cya Nzambi cidi kacyi
 cishintuluka! (Nyuma wa Mukalenge!)

Kwata ku cyanza cya Nzambi . . .

Teeka wêwè anu meeji ebe pa Yêyè, wamonu's. Ewu ki mushindu wa masangisha atwikala ne cya kusombamù mu matuku adi kumpala eku.

. . . cyanza cidi kacyi cishintuluka!
 Ashila ditekemena dyebe pa bintu bya
 Cyendeleele,

Dîyi ki cintu cimwepele cidîku cidî cya Cyendeleele.

Kwata ku cyanza cya Nzambi cidi kacyi
 cishintuluka!

Kwalakanyi bya pa buloba bya cyanaana...

(Dimanyika, dilonga dya tulaasa.)

Bìdì bìnyangukà lukasa abi, (Bitangilaayaaku leelu ewu, cikaadibi byenze.)

Keba bwa kupeta mabanji a mu Dyulu,

Ôwò awu kaàkujìminakù to!

Kwata ku cyanza cya Nzambi cidi kaciyi cishintuluka!

Kwata ku cyanza cya Nzambi cidi kaciyi cishintuluka!

Ashila ditekemena dyebe pa bintu bya Cyendeleele,

Kwata ku cyanza cya Nzambi cidi kaciyi cishintuluka!

³⁴⁹ [Mwaneetu kampanda wa bakaji udi wakula mu mwakulu mwenyi. Mwaneetu mukwabo wa bakaji udi ufila dyandamuna—Muf.] Mushindu mwine utudi tuKusakidila's, Mukalenge. Patudi basòmbe mu cikondo cidi kaciyi cya tuseku eci apa, cyenze anu bu cya madilu, mbwalu tudi bakungamangane ne dijiikiibwa dya buloba budi bupunga ne lufu, bufwe mene ebu; ekeleeziya udi upunga ne lufu, mufwe mene ewu.

Éyi Nzambi, kungwijaaku blé Webe lukasa's, Taatù. Lwâku kwòkò lukasa's, Mukalenge Yesu.

³⁵⁰ Beneshaku cisamba Cyebe, Taatù, twadilaku myoyi ya bantu meeji matooke ne ndondo. Swaku tuseemene kule ne maja a ditùtuka adi akoseka lukasa awu, tujaalame mu mabanji a ndondo a bwici bwa Nzambi. Enzaku nanku, Mukalenge. Lamaku myoyi yetu mishindamija ne dinanga ne meeji matooke.

³⁵¹ Beneshaku cisamba Cyebe myaba yònsò, Taatù. Patukaadi tuumuka mu mwaba ewu apa swaku bwa tuye mu Dîna dya Mukalenge Yesu bwa kwikala twakula cidi cya meeji matooke, cidi Bulelela, cidi cijaalame, swaku bwa tunyeeme cidi cibi, Mukalenge. Pakaadi muntu ubanga kutudinga, swaku bwa tumwele nyima ne lukasa lwònsò, twélè mineku yònsò ya bundu, ya bukooya ne maalu a pa buloba nyima, tubyèla anu nyima cyanaana tuya kutuyaaya. Tùkwàcishèku, Nzambi munanga. Utufwimbe, utupeku mbungakeenu, utucibule, ne ùtùvwijè bimfwanyi bya bânà baa balume ne baa bakaji baa Nzambi bwa twamona mwa kwenza maalu ne ngiikadilu mulenga wa Nyuma Mwimpè. Tudi tudilambula twètù biine Kùdi, bakwatangane ku byanza, mu Dîna dya Yesu Kilisto. Amen.

Tujuukilaayaaku kuulu. Mwaneetu Nolan.



KUTEETA BWA KWENZELA NZAMBI MUDIMU
KACIYI DISWA DYÀ NZAMBI LUA65-1127B

(Trying To Do God A Service Without It Being God's Will)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisambombo mu dinda, mu matuku 27 a ngondo wa dikumi ne umwe, cidimu cya 1965, ku didya dyanza bwa Bwobumwe bwa Buloba bujima bwa Beena Kantu-ku-byanza baa Evanjeeliyo mu Kaabujima ku Washington Youree Hotel mu Shreveport, Louisiane, U.S.A. Ndyumusha pa mukaba wa mêyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org